


Hethadenee  
waunauyaunee vadan  
Luke Vanenāna



The Gospel According to Luke in the Arapaho Language of the  
United States of America

**Hethadenee waunauyaunee vadan Luke Vanenā<sub>na</sub>**  
**The Gospel According to Luke in the Arapaho Language of the United States of**  
**America**

Public Domain

Language: Arapaho

Translation by: Michael White Hawk and John Roberts

2015-05-06

---

PDF generated using Haiola and XeLaTeX on 11 Nov 2022 from source files dated 2 Aug 2022  
49903679-7190-57d9-b73a-1c2da4854577

## Contents

Luke . . . . .	1
----------------	---

## Hethadenee waunauyaunee vadan Luke Vanenāna

<sup>1</sup> Hanau waunauthathee hadnedanuu hejadenenau hadjenanuu hauthase vavese hauthedau hena hayauhuhau nanāe hājavaānethauwuthajauthaunin, <sup>2</sup> Hasevenānauau nanaa hehethee jasesee vasesā hāenuu nau nejaanuu hanadedaunau; <sup>3</sup> Hasethajaunau hethadee heee nananenau jea, vavesethaugudenau vahee hayauhuhau hehetheejasee hadnewauthaunauwunathane nedānee, javaānethadee Theauthenus, <sup>4</sup> Hadeaenauwu hethauwu hena hayauhuhau nesechauhauthehane. <sup>5</sup> Hena hese Herod, naja Judea, jasaa vevethahehe Zacharias haseede, hadauchunanede Abia: nau henene hedaunāhene Aarauneau, nau heneseedaunin Elisabeth. <sup>6</sup> Nau haenesauuthāhenauau hathaāhenith Hejavaneauthu, thaunaugudethee vahee nanavaavedaunau nau hauchuwudaunau Vahadāde dejauthauwuvade. <sup>7</sup> Nau hehauwunesaunenauau, hanau henee hehauwunesaune Elisabeth; nau wauwu haenesauu vaehahenenauau. <sup>8</sup> Nau hethauwu, henee daunausuvadanedau hethaāhenith Hejavaneauthu hāenauauchaude, <sup>9</sup> Nesedaunethe vevethahehehau, nesedaude hadnejaāde yehauthe hevadannauauwunene Vahadāhenith. <sup>10</sup> Nau haunauude henanedanede haevevethahedaune jathee nauauchuu jaa. <sup>11</sup> Nau haenauhauva hautheaune Vahadāde haetheaugune hejavese jaanaa. <sup>12</sup> Nau hāenauhauwaude Zacharias, haejanethajau, nau nāthajaude haedasaa. <sup>13</sup> Hau nuu hautheaune, jevanāthajau hathāhuk, Zacharias: havevethahede nanedauwuhuu; nau hadasea Elisabeth hadjaneseewaude hāau, nau Jaun hadeseau. <sup>14</sup> Nau nananin hadaunauwuthajau nau hadeneethajau; nau hadnewauthathee neethajauthee hāejanese. <sup>15</sup> Hanau haudvasāthaa hathaāhenith Vahadāhenith, nau haudnehauwuvane daudause dadajevenenaje, wauāthe neauthunaje; nau haudnechauchaunaudede Hevadannauwuthauwunene Hejavaneauthu, haa hehethee hāejanese. <sup>16</sup> Nau haudnewauthaa dāeyaunenede Israel hadjaechuwauyāaunaude hese Vahadāhenith Henesaunaunenau. <sup>17</sup> Nau haudnedauwaunaude nauguu Vadanauwuthauwu nau neesenaudāhenith Elias hadjaechuwauyāauau vadauhau henesaunaunenau hese dāeyaunauau nau nejenedauvathee gaugauuthajaudenau hadauethadee; hadnesaanudede henanedanede hesanaa hese Vahadāhenith. <sup>18</sup> Nau Zacharias naudedusaene nuu? wauwu vanaehahenenau nau nadasea wauwu vadavehahenede, hathauhuk hautheaune. <sup>19</sup> Nau hautheaune hanaāauchuhananadethāde, Nananenau Gabriel henee theaugudaunauau hathaāhede Hejavaneauthu; nau janeautheavānau haudnāedauwunathana, nau hadnauhauthehathana nuu neethajaude waunauyauau. <sup>20</sup> Nau, naune, nananin haudnejanadene nau haudnehauwuneanade, haunaude hese nuu hayauhuhau nauauchaugu hethauwu, hanau nananin daujethauwaudauwu nadanedede, nuu hadnethauwunauauchuu nauauchaugaune. <sup>21</sup> Nau henanedanede haedauyauhauvanauau Zacharias, nau haegaugauanadauwu henee dauguthetheaugude vadannauauwu. <sup>22</sup> Nau hāejenauāhede, haejenanadetha: nau haeaenauwu daunauhauthāde vadannauauwu: haevathasauwuna nau haejanade. <sup>23</sup> Nau hethauwu, henee, chauchaunu hese hāesevadanedaude haeyehau hese nehayau hedauauwu. <sup>24</sup> Nau hee hena hese henene Elisabeth hanaāenesaunenith, nau haegauduse nehayau hayauthaunenethe hesese hee, hanaāenehede, <sup>25</sup> Hesau

Vahadāde naasehānau hesee hāedaugauhauvānau hadgudanauwunānau nāedayāhede henaneda. <sup>26</sup> Nau nanedauchaauwaude hesese hautheaun Gabriel haejeauthewau hehethee Hejavaneauthu hesee hedan Gananee haseenaugu Nazareth, <sup>27</sup> Hesāhedāeyaun haenenehauwaune henanin Joseph haenaneeseenith, hehethee hedauauwu David; nau hesāhedāeyaun Mare haenaaseede. <sup>28</sup> Nau hautheaun haedasaa, nau hanaānehethāde, Haunauwuthajau, nananin vechauthane, Vahadāde hanedaunaunāne: hauwunaunane hesānaa. <sup>29</sup> Nau hāenauhauwaude, haejanethajaude hedanadedauin, nau haegaugauanade daun hadnesenaunenechuhude nuu hadnesauau. <sup>30</sup> Nau hautheaun, Jevanāthajau, hathāhuk, Mare: hanau nananin vechauthāne Hejavaneauthau. <sup>31</sup> Nau, naune, nananin hadnesaunin, nau hadneahene, nau JESUS hadeseau. <sup>32</sup> Hadvasāthaa, nau Vāa Hejavaa hadethauva: nau Vahadāde Hejavaneauthau hadvenaude naja theaugudau henesaunaune David: <sup>33</sup> Nau hadnajawaudauau hededanin Jacob jethaujenee; nau henajanede hadnehauwuthauvadauaune. <sup>34</sup> Hanaānehethaude Mare nuu hautheaune, Haddusenesau nuu hanau nāhauwāenaunau henane? <sup>35</sup> Nau hautheaun hanaāauchuhananadethāde, Hejavaneauthau Hevadanauwauthauwu hadnedasāne: nau naunauthauau Hejavaa haddugauyāaunāne; henaheee jea henee Naunaudāde hadnesaunewaude Heau Hejavaneauthau hadnethade. <sup>36</sup> Nau, naune, have Elisabeth, jea wauwu henesaunede hadneahede wauwu dauvadavehahenede: nau nuu nanedauchaunethe hesese wauwu hehauwunesaune neethade. <sup>37</sup> Hanau Hejavaneauthau vahee nenedede hayauhuhau. <sup>38</sup> Nau naune, Vahadāde daununānau hahagu Mare, hadnaasauau nuu hasenehene, nau hautheaun hanaāenauthāde. <sup>39</sup> Nau Mare hanaāethauwauthede hena hese, nau hanaāehaude jauaudanenauauwu nauhauhaunee hesee hedan Juda; <sup>40</sup> Nau hanaejeđāde hedauauwunene Zacharias, nau haenaunenechautha Elisabeth. <sup>41</sup> Nau hethauwu, henee, Elisabeth hāenedauwauthaude daunaunenechuhunith Mare, dāeyaunaa haenauauwujā hethauwaudauau; nau Elisabeth haechauchaunaude Vadanauwauthauwu: <sup>42</sup> Nau haevasanade, nau hanaānehede, Hauwunaunane hesānaa, nau hauwunaunade dāeyaunaa hethauwaudauau. <sup>43</sup> Nau naudauhuthedasaa nuu, henee henaune Navahadāhewaunāde hadnedasānau? <sup>44</sup> Hanau, naune, chauchaunu hanadedaunau haunaunenechauhude hāenedauwaudauwau naunaudaunuu, dāeyaunaa naunauauwujahede naunaudauau hee haunauwuthajaude. <sup>45</sup> Nau hauwunaunade hesā henee hethauwuthajaude: hanau hena hayauhuhau hadnethauwunaasauau neethāedauwunade hehethee Vahadāhenith. <sup>46</sup> Nau Mare hanaānehede, Navadathuwu hauwaunehāde Vahadāhenith, <sup>47</sup> Nau navadathuwu neethajaudaunaude Hejavaneauthu Nānayauhāde. <sup>48</sup> Hanau nedaugauhauwaude hadavenuhuhau hedaununaunau: hanau, naune, hewaunehaa heejasesee vahee henaededaunau hauwunaunade hadnethanau. <sup>49</sup> Hanau hena Naunaudāde vanasaunee hayauhuhau hasehānau; nau vadanaunee heneede. <sup>50</sup> Nau nauwunaunaude henee headaunādaunau henajāthee henaedede nau nausunee henaedede. <sup>51</sup> Nenauhauthethāde hedāahede hejadena; neneāsauaunaude hesāethajauhuhau hedāhene. <sup>52</sup> Nejananaude naunaudāhenethe hehethee hetheaugudaunene, nau nejejenanaude hadavenuhuhau. <sup>53</sup> Negaudauhaude hasenahehau nauguu hethadenee; nau nethauyādahehehau negudanaude jessaa. <sup>54</sup> Nenedahewaude heau Israel, nedauyewuwude hedauwuyau; <sup>55</sup> Neesenehethaude havasevāene, Abraham nau hedāeyaunewau jethaujenee. <sup>56</sup> Nau Mare haenedauguva

hanāenethe hesese heee, nau hanaāejaehaude nehayau hedauauwuu.  
<sup>57</sup> Wauhā Elisabeth hanaāevadauauaude hadneejanēsāde; nau hanaāeahede.  
<sup>58</sup> Nau henedaudevādaunau nau henethesaunau haenedauwauthaa  
 hasauwunaunāde Vahadāhenith haenauhauthehaa vanasaunee  
 hauwunaunadede, nau haenetheneethajauvaa. <sup>59</sup> Nau hethauwuu,  
 henee hāenasaudauchunese haejenauusanauau hadgauguusenith  
 dāeyaunauau; nau haedethanauau Zacharias, thauguu heneseedaunin  
 henesaunaune. <sup>60</sup> Nau henaune hegau, hāheyaugaune, Jaun hadnethade,  
<sup>61</sup> Nau hathauhaugaunee hehauwuseenauau hādauānauau nuu neseede,  
<sup>62</sup> Nau haevathasauwunanauau henesaunaunin, haadeneseenethe.  
<sup>63</sup> Nau haenaude dasewauthaunauha, nau haewauthaunauhā,  
 Jaun haseede, hahagu. Nau haunauude haegaugauuthajaudene,  
<sup>64</sup> Nau haegaunadenanauau, nau henethaune haegauchauunauaune,  
 nau hanaāanadede, nau haevaveenethedauna Hejavaneathu. <sup>65</sup> Nau  
 nāthajau haeedasā haunauude henee hathāeauchaunauthee: nau  
 vahee nuu nehedaunau haegaugauudedaune jedauwuu hathāauau  
 jauaudanenauauwuu Judea. <sup>66</sup> Nau yahee hathāenedauvade haejenanauwu  
 hedahenauau, haudduthā naa dāeyaunaa, hahagaunee? Nau hejadenene  
 Vahadānith haenedaunaunaa. <sup>67</sup> Nau henesaunaune Zacharias  
 haechauchaunaudene Vadanauwauthauwu, nau haeaeeyānautheda,  
<sup>68</sup> Vaveenethedaunaa Vahadāde Hejavaneauthau Israel; hanau haenauujāda  
 nau daujauaudaunaudauau hedenanedane, <sup>69</sup> Nau thauwaudanaude  
 henenese hadnenayauhānauau jedauwuu hedauauwunene hedaununaune  
 David; <sup>70</sup> Dau nausunanadede hedenaa Hevadanaeyāhewau neenaedenethe  
 hājeenaedenauau; <sup>71</sup> Henee hadnenanedanenauau hehethē haujauthavene,  
 nau hehethē hejadenaa vahee hāthāāsānavādaunene; <sup>72</sup> Hethauwuu hauwu-  
 naunadede nesayānāedauwunaude havasevāene, nau hadnedauyewuwude  
 Hevadanenesedauwau; <sup>73</sup> Deneauwauhude yeseē havasevāene Abraham,  
<sup>74</sup> Henee hadvenānauau, jenāthajau hēhethē hejadenene haujauthavene  
 hadnenayauhānauau hadnevevethedaunaunauau. <sup>75</sup> Nauguu vadanaunee  
 nau chuwuu hathaāhede, vahee heseē hadenaededaunene. <sup>76</sup> Nau  
 nananin, dāeyaunaa, haeyāhe Hejavaa hadnethane: hanau nananin  
 hadnedauwaudauwu Vahadāde hadnesaanudene hevaunaa; <sup>77</sup> Hadvāde  
 haeyaude hadnenanedanedaunee hededane hadjaegudanauwunaude  
 hewauchudaunenēnau, <sup>78</sup> Hehethē havathē hauwunaunadede  
 Hāsaunaunene; nanaa Naugusaje hehethē hejavaa hadnenauujādaunānauau,  
<sup>79</sup> Hadvenaude heseē hathāetheaugunethe hadauveeyaunee nau  
 hadaudugauyāsaa gaujauaudahede, hadnedauwaudauau hauauthene  
 heseē hadaudādauyaunee. <sup>80</sup> Nau dāeyaunaa haeseau, nau hevadathuwu  
 haedāeaune, nau haenaadaude hadaunechaudanee haunau heseē  
 hadneenauhauthethāde Israel.

## 2

<sup>1</sup> Nau hethauwuu hena hese hauchuwude haeneāsanaunee hehethē Caesar  
 Augustus henee vahee henanedane hadnayāadee. <sup>2</sup> (Nau nuu nayāadede  
 haenedauwunesede deauchuwunanenede Cyrenius Syria.) <sup>3</sup> Nau vahee  
 haeuāchaudene hadnayāadee haunau hanesāde heseē nehayau hededan.  
<sup>4</sup> Nau Joseph jea haeyehau hehethē Gananee, hehethē hedan Nazareth,  
 jedauwuu Judea, jedauwuu hededan David Bethlehem neseē, (hanau  
 naadahagu hedauauwunene nau nedānee David,) <sup>5</sup> Hadnethenayāade  
 naguu Mareheau heauthehewauthādaune hadnewaune wauwu haehāthane  
 hee henesaune. <sup>6</sup> Nau hethauwuu, henee hajesenausunanedaunee, hese  
 haevadaunaunee hadneejanēsāde. <sup>7</sup> Nau hanaāejanesāde henedauwusaune

heau, nau haeajetha, nau haesevana hewauchuhauchave nedau  
 vethehenethe; hanau haeneau vethehedaunauuwuu. <sup>8</sup> Nau hena vavade  
 vedauuwuu haudānajauāhehauau haeaudenauau, haeaunaunehanaauau  
 haeaunauyauhauvanauau hedajauanenau vegau. <sup>9</sup> Nau, wauhā,  
 Vahadāde hedauthaune haedasā, nau havathee haeseenaupasāunauau  
 Vahadānith; nau haevasenāthajauau. <sup>10</sup> Nau hautheaun jevanāthajauau  
 hathāhaugaanee: hanau, naune, nauchaudaunathana hethadee  
 waunauyauau havathee neethajaude, nanaa hee vahee henanedane.  
<sup>11</sup> Hee nananena janese nuu desene hededan David Henayauthāhe,  
 nananede Chris Vahadāde. <sup>12</sup> Nau nuu hadneaenauwuna; Nananena  
 hadveehauna dāeyaunaa hanajehede, saese hewauchuhauchave  
 nedauvetheheth. <sup>13</sup> Nau nauhauna hena haewauthanaauau hejavaa  
 hautheaunauau nauguu naa hautheau haevaveenethedaunanauau  
 Hejavaneauthu, nau hasenehehaugaanee, <sup>14</sup> Havathee hauwaunede  
 hese Hejavaneauthau hejavaa, nau dasee vedauuwuu nanethaunaane,  
 hethadee hathanavana henanedane. <sup>15</sup> Nau hethauwuu, hautheaunauau  
 haejaenauthā hese hejavaa, Wauhā hadehaunau Bethlehem,  
 hanathadagaanee nuu haudānajauāhehauau, nau nauhaudauwuu nuu  
 hayewhu javeauau, nanaa Vahadāde hāēdauwunādaunene. <sup>16</sup> Nau  
 haenauchuhanaunauau, nau haevahanauau Mare nau Joseph,  
 nau dāeyaunauau haesaeseene hewauchuhauchauwauuwuu hene  
 nedauvethehenethe hewauchuhauchāve. <sup>17</sup> Nau hāenauhauwauthee,  
 haenēnauthedanauau nuu hathauthedaunāheth. <sup>18</sup> Nau  
 vahee hathāenedauvade haegaugauanadauwu hene hayauhuhau nuu  
 hathauthedaunāthee haudānajauāhehau. <sup>19</sup> Nau Mare haeaunaunede  
 vahee nuu hayauhuhau, nau haegaugauanade hedahaa. <sup>20</sup> Nau  
 haudānajauāhehauau haejaesanaauau, haevaveenethedaunanauau nau  
 haevaveenethedaunanauau Hejavaneauthu hee vahee hanathadavathee  
 nau hathauhauthāthee, neethāedauwunāheth. <sup>21</sup> Nau hāenasaudaunese  
 hadneegaugusede dāeyaunaa heneede Jesus, haseadagu nuu haseede  
 haenaneeseāde hautheaunau haunauau deejethāsee. <sup>22</sup> Nau hese  
 hāewaudeauchaude hasaunee hedauchuwude Moses hāevadaunaane,  
 haeyehauthanaauau hese Dadaunedan hadjenanauwunauth. <sup>23</sup>  
 (Hathauthaunauhunee hauchuwudaunaa Vahadāde, Dajee  
 haunauahee hene nedauwusau vadade hadnethade hese Vahadāhenith:)  
<sup>24</sup> Nau hadnausāyauunee neesenedaunee hauchuwudaunaa Vahadāde,  
 Hanesethee vedāenauau, wauāthe hanesethee neauthuvedāesaunauau. <sup>25</sup> Nau,  
 naune, hena henane haenedau Dādaunedan, Simeon haenaneeseede;  
 nau naa henane haechuvā nau haethauwuthajau, haejauwuwude  
 hadneneethajauthee Israel: nau Vadanauwauthauwu haethāsade. <sup>26</sup> Nau  
 haeauthedaunaa Vadanauwauthauwu, hene hadjenauhaudauau  
 gaujauaudahede, haunaude hadnauhauwaude Vahadāhenith Chris.  
<sup>27</sup> Nau haejeheenaunasa Vadanauwauthauwu jedauwuu Vadannauuwuu:  
 nau hāene henehā Hejavaeneauthusau jedanāde hadnesehāde thauguu  
 hasauau hauchuwude, <sup>28</sup> Hanaējavethenaunaude hejadena, nau  
 haevaveenethedauna Hejavaneauthu nau hanaēnehede, <sup>29</sup> Vahadāhene,  
 hewaunehaa nanehāejenanaude hauwauwaunave hadnauwauau  
 nanethaunaane, hasauau hadanadede: <sup>30</sup> Hee nasesā naunauhauwauau  
 havāde Henayauthāhe, <sup>31</sup> Naa nananin hadnesaanudene hathāhedaunee  
 vahee henanedane; <sup>32</sup> Hese hadneesene Hathāauau henanedane,  
 nau havathee hadnanedanede Israel. <sup>33</sup> Nau Joseph nau henaune hae-  
 gaugauanadauwu hena hayauhuhau hanasenehethavathe. <sup>34</sup> Nau Simeon

haevevethasa, nau haeāedauwuna Mareheau henaune, Naune, Naa dāeyaunaa haneejenanade hadneaunenauaudenenee nau hadneejaegauhadenenee hauwauhuu Israel; nau hanau nauhauthethau hadnevathevade; <sup>35</sup> (Haa, gaugachu hadneegauchuguhune nehayau havadathuvaa jea;) henee gaugauuthajaudenau hauwauhuu vadauhau hadneauthasuu. <sup>36</sup> Nau hena haenesā Anna, haeyāhe, hedaunau Phaniel, hanaadāde Aser: haewauthanenau hejajenewau, nau haenethenaedeva hechu nesaudauchu jajene hehethee neesede; <sup>37</sup> Nau haenevesāne heee nasaudausauau yānenee jajene, nananede haejethauunaude vadannauauwuu, hau haenesedauna Hejavaneauthu nauguu naugauyaude nau vevethahede dajāee nau hese. <sup>38</sup> Nau haejejedā heee haevaveene jea Vahadāhenith, nau haeheauthedauna vahee nethāejauwuwudethee jauaudaunauthadede jedauwuu Dādaunedan. <sup>39</sup> Nau hāesedauthee vahee hayauhuhau hasauau hauchuwude Vahadāde, haejaesanauau hese Gananee, hadahethee hedan Nazareth. <sup>40</sup> Nau dāeyaunaa haeseau, nau haedāeaune hevadathuwu, haechauchaunaude haeyaude: nau Hejavaneauthu vadaude haethāsade. <sup>41</sup> Nau wauhā henehā haechaunenau hese Dādaunedan hadauchuvejanenee vasevadanese Hadavechauthadede. <sup>42</sup> Nau denesenenee hejajenewau, haechaunauau hese Dādaunedan hanau nesedaudenee vasevadanese. <sup>43</sup> Nau hese hāevadauaunee, hāejāesathee, dāeyaunaa Hejavaneauthusau haenasedaunaa Dādaunedan; nau Joseph nau henaune haejaenauwu. <sup>44</sup> Hau henanedaa haenehauvā hathanauwauhaugane, nau haejanaugudaunee; hanaāenaudehauthee henedauānene nau henedaehāhene. <sup>45</sup> Nau hājeveehauthee, haejaesanauau hese Dādaunedan, daunaudehauthee. <sup>46</sup> Nau hethauwuu hāenasese hanaāeveehauthee jedauwuu vadannauauwuu, haetheaugune nahethāe hauthedahehau, haejaathea, nau haenau-naudedauna. <sup>47</sup> Nau vahee hathāenedauwauthāthee haegaugauanadauwu hedaeyaunene nau hedauchuhanehedanene. <sup>48</sup> Nau hāenauhauwauthee, haegaugauanavanauau: nau henaune, Nā, nau du hanesehāane? hathāhuk, naune hāsaunau nau nananenau nenaudehane nejeneethajane. <sup>49</sup> Nau hathauhuk, nau du haenaudehena? gauhajaene nachāe wauwu hanedaudauwau Nāsaunau henesethaude? <sup>50</sup> Nau haejaenauwu hasenehethāthee. <sup>51</sup> Nau hanaāenethaunaude, nau haenauusanauau Nazareth, nau haethauwaudaunā: hau henaune haeanaunedene vahee nuu nehedaunau hedahaa. <sup>52</sup> Nau Hejavaneauthusau haeneenaneane hedaeyau nau hajedāde nau vechauthaude Hejavaneauthu nau henanedanede.

### 3

<sup>1</sup> Wauhā yauthaunenee jajene wauwu neenanajane de Tiberius Caesar, Pontius Pinade nausunajawaudauau Judea, nau Herod nanajawaudauau Gananee, nau henauhauwauau Theneb nanajawaudauau Iturea nau vedauauwuu Trachonitis, nau Lysanias naja Abilene, <sup>2</sup> Annas nau Caiaphas vevethahenajanauau, Hejavaneauthu nanadede haedasaa Jaun heau Zacharias nauaunee. <sup>3</sup> Nau haedade vahee vedauauwuu hanathaudanee Jordan, haeauthedaude dusaahede haudneauthuu gaugauuthajaudenau hadneegudanee wauchudaunenau; <sup>4</sup> Naathauthaunauhuu wauthaunauhanaa hedanadede Esaias haeyāhe, Jasaye haevasenehe nauaunee, Hesaunuu hathaāhede Vahadāhede, nesedee hevau chuwuu. <sup>5</sup> Hadauchugauaudayauau hadnechauchaunaa, nau hadauchāe hauane nau jauaudane hadjananee, nau jajāvāe



hadchuvanee, nau hadauhauauyauau bau\* hadneyauthauau; <sup>6</sup> Nau vahee henanedanede hadnauhaudauau Hejavaneathu hedenayauthaunene. <sup>7</sup> Haenaānehethaude waunauthanee henanedanede henee hedaādaunau haddusaanaude, Hau hedenaededaunenau seseyānauau, hanaa hāedauwunādaunenau haddaugauhudauwuna nauthee hasenaunaude hadnauusanauau? <sup>8</sup> Hethadee nesedee hadeheaenaunee hadnaugauthuu haugaugauuthajaudenenau jevaauthenehee hadahenauau, hāsaunaunene Abraham: hanau nāedauwunathana, Hejavaneauthau neene nesehaude nuu hauunaugānau Abraham hedāeyaunewau. <sup>9</sup> Nau wauhā jea hauunauchu janenanee hethājee hauhaudee: vahee hauhaudee jeneeaudehuk vevenaundenau haddauwauhude, nau hadneewaudeadaunee. <sup>10</sup> Nau henanedanau haenaudedanaa, hauddusedaune? hathāhuk. <sup>11</sup> Hanaāēdauwunaude, Daun nanesevechudaunade, jvena daun janevechudaunenith; nau daun hevethenede jenaasedaude, hahagu. <sup>12</sup> Wauhā haenaāenuusathee hauāyāhehauau haddusaahethee, Hechauhauthethāhe hauddusedaune, hathāhuk, <sup>13</sup> Nau hathāhaugaunee, javaauthaunaudaunāthe henee nethautheavane. <sup>14</sup> Nau vanenanenau hanaasedaunethe, hanaasenehethāde, Nau haddusedaune, hathāhuk? Nau javaauthasenehaa henaneda, hathāhaugaunee, javaauthenanedauneeva henaneda, nau hadnanethauaunahedava haunaudaunadenenau. <sup>15</sup> Nau henanedanau hathanavāhuk, nau vahee henanedanede haegaugauanavaa hedāhenenau Jaun wauau Chris haenane, nau wauāthe hajee; <sup>16</sup> Jaun hanaāauchuhanehethaude, hathauhuk vahee, Hadneedusaanathana hee naje; hau hanesāde javaānaudāde javaāhenau jaunaude hewauhugu hewauaunaa nāhauwunegaunavane, hadneedusaanāna hee Hejavaneauthu Vadanauwauthauwu hee heseda. <sup>17</sup> Henaunasāhau nanewauunauau, nau hadgaunauhauau heyauthee nedauthauayāde, nau hadnauānauau wauchunethauauhanau nedauthānauau jenayaunau; hau jenethauayaunau hadvadauchauauau hesedaa nedaujesaudaunahee. <sup>18</sup> Nau waunauthanee hanasejāesaunee hayauhuhau hanathauthedaunaude henanedanau. <sup>19</sup> Hau Herod naja haeaunaunewau hee Herodias henauhauwauau Thenebeau henenene, nau vahee hathāewausaunee hanasedaude Herod, <sup>20</sup> Haewauhaunene nuu vahee henee dauaugauhude Jauneau duguhunauauwu. <sup>21</sup> Wauhā hāevahesedusaahedaunee henanedanede, hethauwu henee Hejavaneauthusau haenethedusaā, nau haevevetha, hejavaa hanaāegaunanenee, <sup>22</sup> Nau Hejavaneauthuvadanauwauthauwu haejejanauhusane hedanayaunaa hedanayau haenaasaunee waude vedāene nau hanadede haejenauusa hehetha hejavaa, hasenehuk, Nananene vechauthauau Nāa, nananene vaveenethedaunathane. <sup>23</sup> Nau Hejavaneauthusau nehayau wauwu wauau hanasauau jajeneva, hanane (hathanavade) heau Joseph, nananenith heau Heli, <sup>24</sup> Nananenith heau Matthat, nananenith heau Levi, nananenith heau Melchi, nananenith heau Janna, nananenith heau Joseph, <sup>25</sup> Nananenith heau Mattathias, nananenith heau Amos, nananenith heau Naum, nananenith heau Esli, nananenith heau Nagge, <sup>26</sup> Nananenith heau Maath, nananenith heau Mattathias, nananenith heau Semei, nananenith heau Joseph, nananenith heau Juda, <sup>27</sup> Nananenith heau Jonanna, nananenith heau Rhesa, nananenith heau Zorobabel, nananenith heau Salathiel, nananenith heau Neri, <sup>28</sup> Nananenith heau Melchi, nananenith heau Addi, nananenith heau Cosam, nananenith heau Elmodam, nananenith heau Er, <sup>29</sup> Nananenith heau Jose, nananenith heau

\* **3:5** “Bau” probably should be “vau” (meaning “way” or “road”), in line with the rest of the text, since the letter “b” appears nowhere else except in foreign names.

Eliezer; nananenith heau Jorim, nananenith heau Matthat, nananenith heau Levi, <sup>30</sup> Nananenith heau Simeon, nananenith heau Juda, nananenith heau Joseph, nananenith heau Jonan, nananenith heau Eliakim, <sup>31</sup> Nananenith heau Melea, nananenith heau Menan, nananenith heau Matthatha, nananenith heau Nathan, nananenith heau David, <sup>32</sup> Nananenith heau Jesse, nananenith heau Obed, nananenith heau Booz, nananenith heau Salmon, nananenith heau Naason, <sup>33</sup> Nananenith heau Aminadab, nananenith heau Aram, nananenith heau Esrom, nananenith heau Phares, nananenith heau Juda, <sup>34</sup> Nananenith heau Jacob, nananenith heau Isaac, nananenith heau Abraham, nananenith heau Thara, nananenith heau Nachor, <sup>35</sup> Nananenith heau Saruch, nananenith heau Ragau, nananenith heau Phalec, nananenith heau Heber, nananenith heau Sala, <sup>36</sup> Nananenith heau Cainan, nananenith heau Arphaxad, nananenith heau Sem, nananenith heau Noe, nananenith heau Lamech, <sup>37</sup> Nananenith heau Mathusala, nananenith heau Enoch, nananenith heau Jared, nananenith heau Maleleel, nananenith heau Cainan, <sup>38</sup> Nananenith heau Enos, nananenith heau Seth, nananenith heau Adam, nananenith heau Hejavaneauthau.

#### 4

<sup>1</sup> Nau Hejavaneauthusau wauwu haechauchaunaude Vadanauwauthauwu haejehedesa hehethee Jordan, nau haeyehauthaa Vadanauwauthauwu nauaunee, <sup>2</sup> Yāyauau hese hananeedauchunese haenayāthehaa Haujaune, nau hena hese haeheejevethē: nau hāevathenese, haenaāsenade waunee. <sup>3</sup> Nau Haujaune hathāhuk, hith nananene Haāthauwuāvaa Hejavaneauthau hāedauwunene naa hauunauga hadejauaujaunenede. <sup>4</sup> Nau Hejavaneauthusau haeauchuhanehe hathauhuk, Wauthaunauhuu henane hehauwuunaede jauaujaunau jasaa, hau hee haunauude hedanadedauene Hejavaneauthu. <sup>5</sup> Nau Haujaune haenauauhuchauhaa hauanee hadaujauudanene, nau haenauhauthehaa vahee najanede hathāauauvaa henanedanede chauchaunu. <sup>6</sup> Nau vahee nuu najawaude hadvenathane, nau hauwaunede, hathāhuk Haujaun: hanau henee nananenau devenanau; nau daun navadauvenau hadevenauau. <sup>7</sup> Hith nananene henaheee hevevethedaunenagu, vahee hadnehanāhene. <sup>8</sup> Nau Hejavaneauthusaun hanaāauchuhananadethāde nau hathāhuk, Hedehau naugauvaa, Haujau haugau hathauthaunauhuu, Nananene hadevevethedaunaude Vahadāde Hāsaunau, nau hanesāde haudnevevethedaunaude. <sup>9</sup> Nau hanaāehauthāde Dādaunedan, nau haejenanaa naunauchuu vadannauauwuu, nau hith Haāthauwuāvaa Hejavaneauthau hauwujanauau hede hehethee, hathāhuk: <sup>10</sup> Haugau hathauthaunauhuu, Hadāedauwunaude hedautheaunau haddunānaune: <sup>11</sup> Nau hejadenenau hadejedunānaune, havaaugugausene heaudaa dasee hauunaugāe. <sup>12</sup> Nau Hejavaneauthusaun hanaāauchuhananadethāde nau hathāhuk, Hasenehee, Nananene jevanayāthehene Vahadāde Hāsaunau. <sup>13</sup> Nau hāevathenayāthedaude vahee, hanaāejathāde haujau najee, <sup>14</sup> Nau Hejavaneauthusau hanaāejaenaudāhede Vadanauwauthauwu haduu Gananee: nau hanaāauthedaunenede hanaāeneāsanaunee vahee hathāauau Gananee nauanee. <sup>15</sup> Nau haechauhautheha vevethahenauauwuu, nau vahee haevaveeneha. <sup>16</sup> Nau haenauusa Nazareth, needaunauuchauhade: nau dajauaunee nesedaude haeyehau vevethahenauauwuu vadanese, nau haetheaugu dasauhaudauu wauthaunauha. <sup>17</sup> Nau haevenau hewauthaunauhanene haeyāhew Esaias. Nau hāegaunanauu wauthaunauha, haeveede hadauwauthaunauhunee, <sup>18</sup> Vahadāde Hedauwauthauwu nanadeaunānau, hanau dehedusaanānau

javeda hadnauthedaunu hethadenee waunauyaunee hadavenuhunethee: hanejevāde haudnenayauhu naudauwuthajauthee, hadnauthedanau haud-jaejenanathee wauwaunauau, nau hadnejanauhauthāthee nanenauguthee, haud-jaejenanathee\* hasenethaunauau, <sup>19</sup> Haudnauthedaudauwau hethadee jaunaunauau jaje Vahadāde. <sup>20</sup> Nau haeauauvane wauthaunauha nau haejaevena vevethahehew, nau hanaāejanaugude. Nau vasesā vahee hathāanedauthee vevethahenauauwuu haenāauhauvanauau. <sup>21</sup> Nau hanaāejasesenehethaude, nuu desenee nuu hathauthaunauhuu hethauvaa haunaudaununenau. <sup>22</sup> Nau vahee haesegaugauudedadaunene, nau haegaugauanadauwu hethadenee hedanadedadaunene hethāenehethaunene. Nau gaunuu jee heau Joseph? hahagaunee, <sup>23</sup> Nau hanaāenehethaude, Nananena hadethauwunehesena nuu heeejegausudede, Naudaunehāhe, nehanenayauhade: henee nanāthadauwaunee nanāsedauunee Capernaum nanehasedaunee nechau hede nehayau havedauauwuvaa. <sup>24</sup> Nau hathauhuk hethauwuu nehethathana, Hegau haeyāhe hehauwuvechauthau nehayau hevedauauwuvaa. <sup>25</sup> Hau hadauthedaunathava hethauwuu, waunauthathee henevesānauau neanedauthee Israel, hesee deanedaude Elias, hejavaa denausunaugauhuu nasau jajene nau nedaudachu hesese, devasauau hasenaude denanadesanauau vedauauwuu; <sup>26</sup> Hau hehauwunesāhene hejevādaunene Elias, vavade Sarepta, hedan Sidon, hesā nananede henevesā. <sup>27</sup> Nau newauthathee naugaugauwuhuhauau neanedauthee Israel deanedaude Eliseus haeyāhe; nau hehauwunesā henayauhade vavade Naaman Syrian. <sup>28</sup> Nau vahee hathāetheauguthee vevethahenauauwuu, hāenedauwauduu nuu hayauhuhau, haeechauchaunaudenenau hasenaunaude, <sup>29</sup> Nau haegauhānauau, nau haenunanatheguthanauau hedan, nau haeehauthanauau hauchauguu jauaudanee haduunee hededanenau needaunesehenee neaudnedauauwuguthauthee hauthedaunaānee. <sup>30</sup> Hau haejavechautha hehethee nahethāe, haejathāau, <sup>31</sup> Nau haenauusa Capernaum, hedan Gananee, nau haeauthedauna vadanesenenee, <sup>32</sup> Nau haegaugauanadauwunenau hasechauhauthehaude hedanadedauau, hanau hedanadedauau haenauthaunenau. <sup>33</sup> Nau vevethahenauauwuu henane haeanedau hevadathuwu haewauchāhene haujaun, nau haevasanade, <sup>34</sup> Jenehāaa; hathāhuk, haudduseha nananene Jesus Nazareth? gauhāejau haudnauauhāane? Haenaunathane hadāhene; Vadanauau Hejavaneauthau. <sup>35</sup> Nau Hejavaneauthusau haeneuva, dādaunauguu, hathauhuk, nau jenauchune. Nau haujau hāegausagewaude nahethāe hanaāejenauthaude nau haejaseneha. <sup>36</sup> Nau vahee haegaugauanavaa, nau haeanadethadenenau jae, nuu hayew hanadede; hathāhuk, hethauwuu nauguu haenauthenehetha haenesedauwauna wauchāhenethe haujaunau, nau hanaāejenauāhethee. <sup>37</sup> Hanaāauthedaunenede nanadee jasesee gauānee vedauauwuu, <sup>38</sup> Nau haegauhā haenauā vevethahenauauwuu, nau haejedā Simon hedauauwuu. Nau Simon henene henaunene haenaudauwauvāhene; nau haeauthewaunauthasanauau. <sup>39</sup> Nau haetheaugudauna, nau haeneude hasauwauvahede; nau haenauthaa: nau nauhauhaunee haegauhā nau haedauyauhauvanauau. <sup>40</sup> Wauhā hesese hāenaesade vahee hathāenethenauthee hasauwauvahehehau hanasejaechauwauvāhenethe haenauuchaudaunau; nau haedajevasana nau haenayauha. <sup>41</sup> Nau haujaunauau nauguu haevanauusanauau

\* **4:18** There is a midline hyphen in “haud-jaejenanathee” which doesn’t appear in same word earlier in the verse. There are no other midline hyphens in this text at all, and this hyphen is probably without significance.

haewauthanauau, haeneānadenauau, nau haenehenauau, Nananene Chris Heau Hejavaneauthau. Nau haeneneuva haejechuwauanadeha: dauhaenauwunethe dau Chris denede. <sup>42</sup> Nau hāesenenee, hanaāejathāude hesee hadaunechaudanee, nau henanedanau haenaudehaa, nau haedasaa, nau haedauduvaa, haudjenauthaude. <sup>43</sup> Nau hanaāēdauwunaude, haudnauthedaudauwau najanede Hejavaneauthau gauchuhunee hedanau nauguu: haugaunaasejejenananau. <sup>44</sup> Nau haeautheda vevethahenauauwuu Gananee.

## 5

<sup>1</sup> Nau hethauwuu, henanedanede haeneenavadaunedauwaudauwu hedanadedauene Hejavaneauthu, haetheaugu sathauwu neajee Gennesaret, <sup>2</sup> Nau haenauhaude hanesanenee thewaunau haetheaugunenau sathauwu neajee: hau naunauyāhehauau haeeyauhaudesanauau, nau haeanahesadenauau henauyaundenenau. <sup>3</sup> Nau haejedā jasaa hethewaunene, Simon, nau haenehetha hadwauauwuhudede vanehaa hehethee vachuwauauwuu vedauauwuu. Nau haejanaugu, nau haechauhautheha henanedanau hehethee thewaunaa. <sup>4</sup> Wauhā hāevadauthedade, hanaāenehethaude Simon, wauauwuhude hadaudavee, nau henauwunau haunauyaude hadjathāne. <sup>5</sup> Nau Simon hanaāauchuhananadethaude, Hechauhauthethāhe, naunaugaunenesethānauau, nau nāhauwuthauujathāva: hau hegaugaunauau hadnaenauwuaudenau nauyaude haugau hasenehene. <sup>6</sup> Nau hāesedauthee nuu haewauthanenau hejathaunenau, nau haethauwunauaune henauyaundenenau. <sup>7</sup> Nau haeadethanauau henedaehanenau danachaugunethe jasaa thewaunaa, haudjaunethe, nau haudnedāhevāthee. Nau haenauusanenau, nau haechauchaunaudenauau hanesanenee thewaunau hanaāenauwuuu. <sup>8</sup> Hāenauhaudauau Simon Peda, haechauāgujanangu hejaedayānene Hejavaneauthusaun, nauchu, hathāhuk; haugauhauhauganenau, Hau Vahadāhene. <sup>9</sup> Haejenaunethajau, nau vahee hethāenethaunādaunau daunauanauthee nauwu hejathaunenau. <sup>10</sup> Nau nauguu James, nau Jaun, heauhau Zebedee, henedaehauhau Simon. Nau Hejavaneauthusaun hanaāēdauwunaude Simon, Jevanāthajau, hewaunehaa hee nananene haudnesedanaude henanenauau. <sup>11</sup> Nau hāenauuchaudethee hethewaunenau vedauauwuu, hanaāenauduu vahee, nau hanaāenethauguhauthee. <sup>12</sup> Nau hethauwuu, hāanedaude jasaa hedan, naune henane haechauchaunaude naunaujaunee haugauwude; hāenauhauwaude Hejavaneauthusaun haeuāneseve, nau haeautheva, Vahadāhene, vathēhānenagu hadeneeyaundanene hathauhuk. <sup>13</sup> Nau haeyethauha, nau haevasana, vanathēhānau: heyaudāhe, hathaukuk. Nau nauhauhaunee naunaujaunee haugauwude haenauthaa. <sup>14</sup> Nau haenesedauwaunā haudjāedauwunaunith henanedane: hau najesa hadnauhauthehau hadanayau vevethahevāhe, nau hadvā dauhenayauhane, Mosase neesedauvade, haudneāenuu. <sup>15</sup> Hau haeneenauthedaunene neānee: nau havathee haewautha henanedanede haeauānauuchaudene daujewaunejaathededane, nau haudnenayauhāthee hedaauwauvahedaunenau. <sup>16</sup> Nau haejathāau hesee nauaunee, nau haevevetha. <sup>17</sup> Nau hethauwuu jasaa hesee, hajesechauhauthethāde, Nesethajauhuhauau nau hechauhaudauwauhuhauau nanavaavede haetheaugunauau hejava, haejeehedesanauau hadauchāe hauwauhauauwudan Gananee, nau Judea, nau Dādaunedan: nau naunaudāde Vahadāde haetheaugu hadnenayauhaude. <sup>18</sup> Nau, naune, henanenauau haenauuchuhanauau henanene hee hedauwune haeesevāhene nau haenayāthejedananauau, nau

hadjenanauwunauthee hathaājenith, <sup>19</sup> Nau hāejevedethee haudnethejedanauthee hanau dauwauthaa henanedanede, hanaāenauauhusathee dasee hauauwuu, nau haejanauhaujānanauau, hehethee dasee hejavaa hauauwuu nauguu hedauwune nahethāe hathaājenith Hejavaneauthusaun. <sup>20</sup> Nau hāenauhaudauwunith hedethauwuthajaudenenau, hanaāēdauwunaude, Henane, hauwauchudaude gaunudanauwunane. <sup>21</sup> Nau wauthau-nauhāhehauau Nau Nesethajauhuhauau hanaāejasesegaugauuthajauthee, Hanaa naa hananadede nehedaduhude Hejavaneauthu? hathāhuk. Hanaa haudgudanauu wauchudaude, vavade Hejavaneauthau, naanesāde? <sup>22</sup> Hau hāenauwunith Hejavaneauthusaun hegaugauuthajaudenenau, Haudusethajauva hadahenauau? hathāhaugaanee, <sup>23</sup> Hayew gauchauaa, nehehāgu, Hauwauchudaude gaunudanauwunana; nau wauāthe gauhā nau javesa heheagu? <sup>24</sup> Hau hadaenauwu henee Heau henane naunaudāde dasee hathāauuuvadee negudanauu wauchudaude, (naasenehethauhaugu neasauwauvahedauwunith hesevahede) Hāedauwunathane, Gauhā, nau hedanau hauddau nau najesa nananene haudauuauwuu. <sup>25</sup> Nau nauhauhaunee haethauwauthe hathaājenethe nau haedane heaugusenadenau nau hanaāejathāaude hedauuauwuu haevaveenethedauna Hejavaneauthu. <sup>26</sup> Nau vahee haegaugauuthajaudene nau haevaveenethedaunanauau Hejavaneauthu, nau haechauchaunaudenauau nāthajauve, Naunaudauhauthānauau nuu desene, hāheagu. <sup>27</sup> Nau hāevathedaude haejathāau nau haenauhauva hauāyāhe Levi hanaaseenith, haetheaugune nedauudanauau hauāyaunau, nau jethauguhu hathauhuk. <sup>28</sup> Nau haevanauthā, haegauhā, nau haethauguha. <sup>29</sup> Nau Levi haevasevethheheha nehayau hedauuauwuu, nau haewauthanauau hauāyāhehauau nau hauthauau haenedauguvā. <sup>30</sup> Hau wauthaunauhāhehau nau Nesethajauhuhauau haeanevā hethauguhādaunau, naudu haenethevethewawauna nau haenedaveyāawauna hauāyāhehauau nau wauchudauhuhauau, hathāhaugaanee? <sup>31</sup> Nau Hejavaneauthusaun hanaāauchuhananadethāthee, hathāedāenaedethee hehauwuvathēhā naudaunehāhew; hau hathāasauwauvahethee. <sup>32</sup> Nāhauwujenauusa haudnadethu hethahethee hau wauchudauhuhauau hadnaugaudanenee hegaugauuthajaudenenau. <sup>33</sup> Nau hathāhuk naudu hethauguhādaunau Jaun denauaunenaugauyānethe, nau devevethahethee, nau naasedauthee hethauguhādaunenau Nesethajauhuhauau; hau hanethenaunauau havethehethee nau havaveyāthee? <sup>34</sup> Nau hathāhaugaanee, Gauhājeneenesehauva dāeyaunauauau nedauenenedaunee hauauwuu naugauyaude hajesanedaunaunāthee waunenenehew? <sup>35</sup> Hau hese haudnauauchuu, haudneedanauwunana waunenenehe, nau hee hadnaāenaugauyāthee hena hese. <sup>36</sup> Nau hanaāanadethaude jea jegausauhānee; Henane hehauwu jenane waunauyaunee neauthayew hadaugauthāyaunee, hith hesedauhuk, nau hadauwayaunee needaudenauuu, nau jasaa needanee hadau wayaunee hehauwunēauchauna gauthāyaunee. <sup>37</sup> Nau hegau henane hehauwujenane waunauyaunee vasevenenaje gauthānēnevajaunaa; nau wauāthe wayaugu vasevenenaje haddaudeauau nevajaunau, nau hadgusenauauau, nau nevajaunau haddenanaunauuu. <sup>38</sup> Hau waunauyaunee vasevenenaje hadedaunee hadauwayaunee nevajau, nau nanesaunthadee. <sup>39</sup> Nau hegau henane hesevanaagu gauthānevasevenenaje nauhauhaunee haevathehaa waunauyaunee; hanau gauthāyauau hethadee, hathauhuk.

## 6

<sup>1</sup> Nau hethauwuu naneseauwauau vadanese, haeehedesa jenayaunaa; nau hethauguhādaunau haegaugauunauwu wauchuunethauauhanau, nau haevethenauau, haegauneegudenauau hejadenenau. <sup>2</sup> Nau hauthauauau Nesethajauhuhau, Naudu hanesedauna waujaa nanavanau nesedaude vadanese hathauhaugaunee? <sup>3</sup> Nau Hejavaneauthusau hanaāauchuhananadethaude, Gauhājethaunauhaude nuu hasauau David neesedaude, nehayau deasenade, nau neethāenethaunāde. <sup>4</sup> Neesejedāde Hejavaneauthu hedauauwunene, nau needanauau nau nevethee nauhauthethājauaujau, nau haevena heethāenethaunaunau; waujaa nanavanau veyāgu hau jasaa vevethahevahehauau? <sup>5</sup> Nau hanaāēdauwunāthee, Heau henane nanethadāde vadanese. <sup>6</sup> Nau hethauwuu jea jasaa vadanese haejedā vevethahenauauwuu nau haeautheda: nau henane haenedau hejavehe hejadenaa haesevane, <sup>7</sup> Nau wauthaunauhāhehau nau Nesethajauhuhau haeaunauyauhauvaa, wauau haadenenayauthā vadanese; hadnejauaudaunauthee dauhanājauwauaunauthee. <sup>8</sup> Hau haeauenauwu hegaugauuthajaudenenau nau hanaāanadethaude henanene hesevenasanith, Gauhā nau yethaagu nahethāe. Nau haegauhā nau haeyethaagu. <sup>9</sup> Hejavaneauthusau hanaāēdauwunaude, haudnaudedanathana nananena hanesadee; Gaujenanavanau vadanese hethadāgu hasedaunee, nau wauāthe wauchudauneagu? henayauhāgu henaedede, nau wauāthe nanaunehāgu? <sup>10</sup> Nau hanaāēnaunauānede vahee, hanaāēdauwunaude henanene, Segauha hajade. Nau hanaasedaude: nau hejade haenayauhune jasaa hasaunee. <sup>11</sup> Nau haechauchaunaudenauau hasenaunade: nau hanaāaunauchuwuhadethee daun haudnesehauthee Hejavaneauthusaun. <sup>12</sup> Hethauwuu hena hese, haeehau hauanee haudnevevethahede, nau haunaude naugaunee haevevethedauna Hejavaneauthu. <sup>13</sup> Nau hāesenee, hanaāadethaude hethauguhādaunau; nau haedana vadadauchunesenee, hanaāeneseaude vadauhanauau. <sup>14</sup> Simoneau (jea haeaugauthea Peda haseauhuk), nau Andwheau henauhauwauau, James nau Jaun, Thenib, nau Bathaunaumew, <sup>15</sup> Matthew, nau Taumis, James heau Atheas, nau Simon Zenautes haseadagu, <sup>16</sup> Nau Judas James henauhauwauau, nau Judas Iskariot,\* hanane jea neheaudaunade Hejavaneauthusaun. <sup>17</sup> Nau haejenauunethauna nau haetheaugunauau hethauauwuu, nau hadauchunanenethe hethauguhādaunau, nau haevasenauthenedau henanedanede hehethee vahee Judea nau Dādaunedan, nau hehethee sathauwu hadajee Tyre nau Sidon hethāejenauujaatthēhādaunau, nau haudnenayauhāthee hedasauwauvahedaunenau; <sup>18</sup> Nau hathāenaunauthauwauvahethee wauchāhenethe haujaunau: nau haenayauhaunauau, <sup>19</sup> Nau haunaude hadaucha haevadauvasanau hanau daunudesanaunee hevadaude nau haevahenayauha. <sup>20</sup> Nau hanaāēnāuhauwaude hethauguhādaunau, Hauwunaunana nananena hadavenuhunena; hanau nananena najanede Hejavaneauthu, hathauhuk. <sup>21</sup> Hauwunaunana nananena hathāasenana hewaunehaa: hanau nananena hadnegaudana. Hauwunaunana nananena hathāevewauhuna hewaunehaa, hanau nananena hadnauchaunena. <sup>22</sup> Hauwunaunana nananena, henaneda hasānavānā, nau jaasauaunānā, nau naunaunauthevānā, nau hausāgudenauthe haneseedaunenau hadauwausaunee, haugau Henane Heāhene hee. <sup>23</sup> Haunauwuthajauau

\* **6:16** "Iskariot" is spelt with a "k" here but in 22:3 with a "c". Biblical names in this text generally but not always follow the spelling of the King James Version (KJV).

henee hesee heee, nau jajanauauau heee haunauwuthajaude: hanau, naune, hanavanasauau hadaugautheavadenenau hejavaa: hanau naneesedaugaune henesaunaunenau naneesehauhaugaanee haeyāhehau. <sup>24</sup> Hau naunauthauau hadnauauchaudaune hathāeveaunauaune; haugau hanesedanauwuna hauwauthenaedede. <sup>25</sup> Naunauthauau hadnauauchaudauna hathāegaudana; haudnasenana. Naunauthauau hadnauauchaudauna hathāauchaunena hewaunehaa, hadnaudauwuthajauna nau hadvewauhuna. <sup>26</sup> Naunauthauau hadnauauchaudauna, daunhāene vahee henaneda hāethadenee hasenehethānā, hanau henesaunaunenau naneesehauyaugaune jayaudauwaeyāhehau. <sup>27</sup> Hau hadāedauwunathava nananena hathāenedauvana, Vechauthaa nananena haujauthavenau, heneehaa hasānavādaunenau, <sup>28</sup> Hauwunaunaa hāwauwauchuvādaunenau, nau hevevethasaa hāwauwauchuhādaunenau nananena. <sup>29</sup> Nau henee haudauauvāde hajāeaunaa nau naugautha venene; nau hedanauaugu nananene hauddu jevaedanau jea naudauguvechude jevaethaa. <sup>30</sup> Hevenaa daun henaneda hānedauwunādaunenau nananene; nau jeva jaenedauwunaa hedanauwunānagu daun hanetheyaunenau. <sup>31</sup> Daun hasevathehānaune henaneda hesehānenagu, nechau jenaasehaude. <sup>32</sup> Hith nananena vechauthaunagu daun havechauthādaunenau nananena, haddusevaveeneva nananena? haugau wauwauchudauhuhauau nechau nevechauthaunee hethāevechauthādaunenau. <sup>33</sup> Nau hith nananena hethadāgu hasehaunā daun hāneneehādaunenau, haddusevaveeneva nananena? hanau naneesedaugaunee wauwauchudauhuhauau. <sup>34</sup> Nau hith nananena hehaunagu daun hāneejauaunaudaunādaunenau, haddusevaveeneva? hanau wauwauchudauhuhauau nechau neehauhau-gaunee wauwauchudauhuhau, hadnejanaasesedanuu. <sup>35</sup> Hau vechauthaa nananena haujauthavenau, nau hethadeha hasedauna, nau hehānagu, jevajavathehāe; nau nananena haudaugautheavadenenau hadvasauau, nau nananena hadnaāedāeyaunenena Javaājauuthee: nau neneneehaude nethāejevaveenenethe nau hauhauganau. <sup>36</sup> Hedauwuyaunee nananena, nananena Hāsaunaunenau jea hasedauwuyaunede. <sup>37</sup> Jevaachuwwu, nau nananene hadnaajauchuwuhane: nau jevaduguthāe nau nananena hadnehauwuduguhuva: hejaegudanauwuyāe nau hadnejaegudanauwunane nananene: <sup>38</sup> Vāe, nau hadnevenana nananene, vavesethajauauthāe, dāayāe, nau dāesathāe, nau haunauwauauthāe, hauchauva, henane hadvenāna. Nechau hadnaasethajauaunāna hasethajauauthānā hadnanesethajauaunana. <sup>39</sup> Nau hanaāanadethaude haejejegausuhu, Gaunanenauguhu jenenauājetha nanenauguhu? Gauhaudjenesauujanesenauau gauuhanaa? <sup>40</sup> Thauguthāhe hehauwujavaāhe hechauhauthehādaune: hau haunauude hanesāde daun haunauudaunāde hathāhenith hechauhauthehādaune. <sup>41</sup> Nau naudu hanauhaudauwu nananene hahavaa hejaheede hesesāe, hau haājevesehau havadauhaude hathāsewau hasesāe? <sup>42</sup> Wauāthe hauddusenehethau nananene hahavaa, Jāedaā, hadaugauhauwunathe hajaheede hasesāe, hau daujenauhauwaude havadauhaude hathāsewau nehayau hasesāe? Nananene jayaudauwunaedehe, nedauau haugauhune havadauhaude hathāsewau nehayau hasesāe, nau hadenaāeneauvane hadenaāeneaugauhauwu jaheede hethāsathau hahavaa hesesāe. <sup>43</sup> Hanau hauhaude hethahagu hehauwuseaude wausaunee vevenaundenau; nau wauāthe wauchahagu hauhaude hehauwuseaude hethadenee vevenaundenau. <sup>44</sup> Hanau hadauchude hauhaude neaenaunede hanasaunee hevevenaundenau. Hanau hauchahevesee henanenauau hehauwunaadauhauānuu hauyauchuwunau nau dauchuwusee

hehauwunaadauguunee dadajevenau. <sup>45</sup> Henane hethāde hehethee hethadenee heda nenuuchaude hethadenee; hau wauchāhede henane wausaunee heda nenuuchaude wausaunee: hanau waunauthaa hehethee hedahaa hede nanadenaunee. <sup>46</sup> Nau nau, Vahadāhene, Vahadāhene, haesena, hau nejesedauna hayauhuhau hasenehethathana? <sup>47</sup> Daun nādasāde nau nedaunānaugu hasenehenaunauau, nau hesedauhuk, haudnauhauthehathana haudnethāde: <sup>48</sup> Henanene henee nenesedenethe hauauwu naathāde, nau henee nejayauchauhuu, nau naneejenanauau hauauwuu dasee hauunaugāe: nau nauunauuu naje neje naunauthuu jaathāsāe henee hauauwuu, nau hehauwunauauvathāau: hanau daunāaudaa hauunaugāe. <sup>49</sup> Hau jaathedehe, nau janenaasedauthe, naathāde henanenau henee nedasauauvānethe vedauauwuu; nau neje jaathāsāe naunauthuu, nau nauhauhaunee naunenauauau; nau thauwusāe henee hauauwuu nevasauau.

## 7

<sup>1</sup> Wauhā hāevathanadede vahee hanasenehede daujajaathehade henanedanede, haejedā Capernaum. <sup>2</sup> Nau jasaa vanenenaja hewauwaune haevechautha haeaugauwune, nau haeyānajane. <sup>3</sup> Nau hāenedauwauthaude Hejavaneauthusaun, haeautheava vachaugananenau Jews, haeadetha hadjaunith nau hadnenayauhaunith hewauwaune. <sup>4</sup> Nau hāedauchauthee Hejavaneauthusaun, haeautheauwaunauthasanauau haugaunaunee, hanau hethāde naa henane naa haudneenesedaude, hathauhaugaunee: <sup>5</sup> Hanau vechaudauau nadedanenau, nau nenesedaunānaunau vevethahenauauwuu. <sup>6</sup> Hee Hejavaneauthusaun hanaāejasesenethaunāde. Nau hāeouchauau hauauwu, vanenenaja haejedādaunananenau henedaehauhau, Vahadāhene, jevawauchuthajau Nananene: haugau wauchāhenau hadjedāne naudauauwuu, hathauhuk: <sup>7</sup> Nanaa nājewauchanavadede dauudasathane: hau vavade nehedaunadede, nau naudautheau hadeenanedanede. <sup>8</sup> Hanau nananenau nanethenanenenau naunaudāhenau, nanethenu vanenanenauau, nau naāēdauwunauau hanesāde yehau nau naāejathāude; nau jasaa, Nahāje, hathauau nau jaunaude; nau naudautheau, Nesede, hathauau, nau nanesedaude. <sup>9</sup> Hejavaneauthusaun hāenedauwaudauau nuu hayauhuhau, haegaugauanava, nau haenauthegauthaagu, nau hanaāēdauwunaude henanedanau hethāethauguhādaunau, Hadādauwunathava, Haunauau nāhauwuehau vasee hethauwuthajuhu (naa hathāde henane), hegau, hehauwuu haduu Israel. <sup>10</sup> Nau henee hathāutheavathee, hāejaenuusathee hauauwuu, haeveehanauau wauwaune haenanedanene henee neasauwauvāhenith. <sup>11</sup> Nau hethauwuu jasaa hese, hanaāehaude hedan Nain haseenauyāgu; nau haewauthanenau hethauguhādaunau henethaunādaunau, nau hauwuhuu henanedanede. <sup>12</sup> Wauhā hāyānausade hejavaaa dajanaunaa hedan, naune, naa najaa henane naunudanade, jasāsau henaune, nau haenevesānene: nau haewauthane henanedanede hehethee hedan haenethaunaa. <sup>13</sup> Nau hāenauhauwaude Vahadāde haeauwunauna, Najenaudāve, hathauhuk. <sup>14</sup> Nau haedasa nau haevasane nauaunechauthau: nau hethāenauaunechauhādaunau haedādauyaugunenau. Haunaua, hāedauwunathane, Thauwauthe, hathauhuk. <sup>15</sup> Nau henee nenajaa haethauwaudaugu, nau haenaāejasesanadede, nau hanaāevenaude henaunene. <sup>16</sup> Nau nāthajaude haedasā vahee: nau haevaveenethedaunauau Hejavaneauthu, Havathee haeyāhe hanejauaude hadedanene; nau, Hejavaneauthau haenauujādauna



hensesaunau, hahagaunee. <sup>17</sup> Nau nuu dauauthedaunenede haenanadesanaune vahee Judea, nau nanadee gauānee vedauauwuu. <sup>18</sup> Nau hethauguhādaunau Jaun haeauthedaunaa vahee nuu hayauhuhau. <sup>19</sup> Nau Jaun haeadetha hanesenethe hethauguhādaunau haeyethautheava Hejavaneauthusaun, Gauhanane henee waudaudjaude? nau wauāthe gauhadnaudenauhauwau jasaa? <sup>20</sup> Hāedauchauthee henanenauau, Jaun Dusaayāhe janādautheavānauau Nananene, hathauhaugaunee, hanaāenaudedauthee, Gauhanane henee waudaudjaude? nau wauāthe gauhadnaudenauhauwau jasaa. <sup>21</sup> Nau vavade hāauchauau haenayauha haewauthanenau vavavāauhuhau nau havathee haugauwude, nau wauchāhenith haujaun; nau haewauthanenau nanenauguhuhau haevena nauhauthau. <sup>22</sup> Hejavaneauthusaun hanaāēdauwunāthee, Najajathāuau, nau hadāedauwunauva Jaun hathāhaugaunee, hayewhu hanathauhauthāna nau hathadauvana; hasejaenauhauthāde nanenauguhu, jeneejavesāhe daujavesade, naunaujaunee hedaugauwudaunenau dauyauadahethee, hayājadāhe daunedauvade, gaujauaudahehe daujaethauwauthede, hadavenuhu hethadenee waunauyaunee dauauthedaunade. <sup>23</sup> Nau hauwunaunade daun najewauchuthajaudaunāde. <sup>24</sup> Nau hāejathāunethe Jaun hedautheaunau, hanaāējasesanadedauau henanedanede hasenadenethe Jauneau, Hayew nananena haewaunenauhauthaunenau nauaunee? gaugauguyāse daunauauvasee? <sup>25</sup> Hau hayew nananena hāewaunenauhauthaunenau? Gauhenane hedāchaunau hejajehaunenau hedāchaunau? Naune, nethāeneenuhuthee, nau neneenaedethee thanāsee nenauchuwunethe hedauauwunenenu. <sup>26</sup> Hau hayew hāewaunenauhauthaunenau? Gauhaeyāhe? Haa, hadāedauwunathava nananena, nau javaāsee haeyāhehau. <sup>27</sup> Naa nananene, wauthaunese, Naune, hadjejenanauau Naudautheau hathaaguna, hadnesedaunāna hauvaunenau sayānee Nananena. <sup>28</sup> Hanau nāedauwunathana, hadedanenu nethāenesaunevāna hesānauau hehauwujavaāse haeyāhe hathāde Jaun Dusaayāhe: hau hena haugajehede hanedauhuk henajandedaunene Hejavaneauthu javaāhehuk. <sup>29</sup> Nau vahee henanedanede hathāenedaunāde, nau hauyāhehauau, hanaāechuwauthethajaudaunauthee Hejavaneauthu, haenethedusaanā dusaayāhew Jauneau. <sup>30</sup> Hau Nesethajauhuhauau nau nanavaavehehau yese nehayau haeausagudenauau hevathehādaunene Hejavaneauthu, haejenethedusaanā (Jauneau). <sup>31</sup> Nau Vahadāde hahagu, Hayew naudneedajenehethau henanedanede nuu henaedede? nau haethahenauthe? <sup>32</sup> Waude dāeyaunauauau hathahethee theaugunauthe haudaunauauwuu, nau danadethadethee, nau nanāhethee, Nevadauhana, hau nananena nejevadana; naudauwuthajaudauwunana nananena, hau nejevewauhuna. <sup>33</sup> Hanau denausade Jaun Dusaayāhe dejevethee jauaujaunau nau deejevanaa vasevenenaje; nau nananena nanethenaude haujaun, nethauna. <sup>34</sup> Heau henane daunausade dauvethede nau dauvanaa; Nauhauvaa naa henane naudaudāhe, nau vasevenenajevanehe, henedaehauhau hauyāhehau nau wauwauchudauhuhau, nethauna. <sup>35</sup> Hau haeyaude chaunuwuthajaudaunaude vahee hedāeyaunewau. <sup>36</sup> Nau hanesāde Nesethajuhu haeadetha haudjewaunenethevethehevāde, nau haeyehau haejedā Nesethajuhu hedauauwunene, nau haejanaugu hadvethede. <sup>37</sup> Nau, naune, hesā hedan, haeauhaugane, hāaenaunaude Hejavaneauthusaun daujanaugunith hadvethehenith Nesethajuhu hedauauwunene, haejāchaude jāavasaa chauayau, <sup>38</sup> Nau haetheaugu hegauwune heauthene haevewau, nau hanaāējasesahesadede heauthene

heee hedejee nau haeheahenauwu heee henethaanene, nau haenedane heauthene, nau haechauane heee chauayau. <sup>39</sup> Wauhā Nesethajuhu hāadethaude hāenauhauwaude, haejaevenanadethade, Naa Henane, haeyāheyaugu, hanaenaunaude daunhadāhenith nau daunhathāhenith nuu hesāne hevasanādaune: hanau wauwauchuduhu, hahagu. <sup>40</sup> Nau Hejavaneauthusau hanaāēdauwunaude, Simon, haudnāedauwunathane nananene. Nau hanaāenehethaude, Hechauhauthethāhe, nanehe. <sup>41</sup> Hena jasaa sayānedanauwuyau haenesenenau hesayānedanauwunādaunau: hanesāhenith yauthaunevadadausauau vāejethā, nau jasaa yauthauyauau. <sup>42</sup> Nau hāeyauhuunee haunaudauhudaunene, haenanethauaunegudanauwuna nesauuu Jeāedauwune, hanaane hevechauthādaune javaānee? <sup>43</sup> Simon hanaāējaāedauwunaude, Nauchāe nananenith heneehejavaāgudanauwunaune. Nau hanaāēdauwunaude, Nananene neaenauwu. <sup>44</sup> Nau hanaāeyethaagude hesāne, nau hanaāēdauwunaude Simoneau, Gauhaunauhauwau nananene naa hesā? Nananenau nejedānau haudauauwuu, nananene hāehauwuvene naje heee nauaudau: hau neheahesadede nauaudau heee hedejee, nau neheahenauau henethaa. <sup>45</sup> Nananene hāehauwunedane hau naa hesā hāenauusanaunauau hehauwuthauujenedane nauaudau. <sup>46</sup> Naudauguhua nauguu javeda nananene hajechausānene hau naa hesā nechauanauau nauaudau heee chauayau. <sup>47</sup> Naa hāedauwunathane nananene hewauchudaudenau waunauthanee gaunudanauwunade; hanau dauvechauthāde javaānee hau daun vanehaa gaunudanauwunade vavade hasevechauthāde vanehaa. <sup>48</sup> Nau hanaāēdauwunaude hesāne, nananene hauwauchudaudenau jaegudanauwunane. <sup>49</sup> Nau hethāenedauguvādaunau dauvethethee hanaāejasesanadethee hegaugauuthajaudenenauau hanaa naa negudanauwu wauchudaudenau jea? <sup>50</sup> Nau hanaāēdauwunaude hesāne, Nananene hadethauwaudaude henayauhāne nananene; najesa hadnauwauthenesane.

## 8

<sup>1</sup> Nau hethauwuu waunee haejathāau nanadee hadauchanenee hedan nau hajaseehedan, dauaunauthedade nau daunaunauhauthethāde neethajaude waunauyaunee hasaunee henajanedanene Hejavaneauthu: nau vadadauchunesenee haenethaunaa, <sup>2</sup> Nau jasaa hesānauau, haenayauhau dewauchāhenethe haujaunau nau vavavāauhuhauau, Mare haseadagu Magdalene, naunudanavathe nesaudauchu wauchāhenethe haujaunau, <sup>3</sup> Nau Joanna henene Chuza Herod hadāhevāhe, nau Susanna, nau haewauthanauau hauthauauau, hevenādaunau hethāenethayaunenenu. <sup>4</sup> Nau hāeneenawauthaa henanedanede dauauāchaudenee, nau haedasaa hehethēe nanadee hedane, hanaāeanadede jegausauhānee: <sup>5</sup> Jenayāhe haewauneneāgude hejenayaunau: hauthauau haejajanesanau vaunaa; nau haeauguhudaunene, nau neahehauau hejavaa haeaudauvanauau. <sup>6</sup> Nau hauthauau haedasegaugauusanau hauunagāe; nau chauchaunu hāeveseeu, haenadadanau, hanau daujenajenee. <sup>7</sup> Nau hauthauau haejajanesanau hegauau dauchuuwusee; nau dauchuuwuse haenauguveseaunau, nau haeajedaunanā. <sup>8</sup> Nau hauthauau haegaugauusanau dasee hadauuthadee vedauauwuu, nau haeveseaunau, nau haeneeaunau vadadausauau jenayaude. Nau hāenehedauau nuu hayauhuhau, haevasenehe, Daun henaudaununede, nanehanedauvade. <sup>9</sup> Nau hethauguhādaunau haenaudedanā, duthanau nuu jegausudede, hathāhuk? <sup>10</sup> Nau hahagu, Nananena vanenana haudnaenauwuna jaeyaunau henajanedē Hejavaneauthu: hau hauthauauau janegausauhuthee; hadnenauhauthāthee

havajenauhaudauwu, nedauvahehauau havajaenauwu. <sup>11</sup> Wauhā, heyew hasauau jegausudede: Jenayaunau hedenehede Hejavaneauthau. <sup>12</sup> Henee vaunaa nanathee nenedauvathee; hanaāenauusade haujau, nau nedanauwunāthee hanadede hedahenauau, naseduhuu hethauwuthajauau, nau hadenanedanena. <sup>13</sup> Henee hauunaugāe nanathee, nanedauvanauthe nesedanuu hanadedaunau nauguu haunauwuthajaude; nau nuu hehauwuthājenenauau, vanehaa nethauwauduu, nau nauauchaudaunauthe vasehadede naneenaunegauhuthee. <sup>14</sup> Nau henee nejajanesāe thauhauthauchauyauau dauchuuwusee nanathee, hanesenedauvanauthe, naneejathāuthee, nau neenadejethathee hee haunaunethaude nau nethauyādahede nau haunauwudaude, hee nuu henaedede, nau hehauwunauuchaudenauau vevenaundenau hadauuyauthaunee. <sup>15</sup> Hau henee hadauuthadenee vedauauwuu nanathee, hethauvahethee nau hethadenee hedahenau nenedauwauduu hanadedaunau, naunaunedethee, nau nenauchaudethee vevenaundenau hee jenauwauaunee. <sup>16</sup> Hegau henane, hāesedeauchauuu nauauuthayau, hehauwaugau hee vasenau, nau wauāthe hehauwujenane thānee hauvaa; hau nethānauau nauauuthayau neetheaugunee daun janedāde hadenauhaudauau nauauuthayāgu. <sup>17</sup> Hayewhu hehauwuyauthesa, haudjauthasenesee; wauāthe hayewhu hehauwuyau hadjaenaunee nau hadnejaunauau hauthasauau. <sup>18</sup> Haunauyauhaudauwuu hanathadauvanā: daun nanethenaude, nananede haudnevenade; nau daunjanenethenaude, nananede haudnedanauwunade daun henetheyaunau. <sup>19</sup> Hanaāedasāde henaune nau henethesaunau, nau haejenedasaa hee dauneethenedaunenee. <sup>20</sup> Nau haeāedauwunaa jachau hathāhuk, Hānau nau hāthesaunauau theauguthee jathee, vanadaunauhauvānaune. <sup>21</sup> Nau hanaāauchuhananadede nau hanaāāedauwunaude, Nānau nau nāthesaunauau nuu nanathee nanedauwauduu hedanadedaunene Hejavaneauthu, nau naasedauthee. <sup>22</sup> Wauhā hethauwuu jasaa hese, haejedā thewaunaa nauguu hethauguhādaunau: nau hanaāāedauwunaude, hadeyehaunau hauchaunau neajee: nau hanaāejathethuauthee. <sup>23</sup> Hau hajechuauthee haenaugau: nau hanaāenauasaa neajee haenaudasa; nau haechauchaunane naje, nau haeanedaudauwugaujauadahede. <sup>24</sup> Nau hanaāedauchauthee, nau haeauwaudananaunau, Hechauhauthethāhe, Hechauhauthethāe,\* gaujauaudāhenauau, hathauhaugaunee Hanaāethauwauthede, nau hanaāeneudauau hasāse nau dasenaunanaunee naje: nau hanaāedauunauuu, nau hanaāedādauyauau. <sup>25</sup> Nau hanaāenehethaude, daude hadethauwaudadenenau? Nau haenāthajaunauau haejenaunethajaunauau, Dauhuthenane naa, hanathadagaunee; haachuwudede hasāse nau naje, nau hanaāethauwaudaunāde. <sup>26</sup> Nau hanaāenuusathee vedauauwuu Gadarenes, hauchaunau Gananee. <sup>27</sup> Nau hāeyehaude vedauauwuu, hena haenuchaunaa jathee hedan jachau henanene, haenethena haujaun dajechauau, nau haevedauauchauna, haejenaede hauauwuu, hau nedauthānavathe gaujauaudahehehau. <sup>28</sup> Hāenauhauwaude Hejavaneauthusaun haevasanade, nau haechaagujanaugudauna, nau hanaāēvasanadethaude, Hauddusehathe, Hejavaneauthusau, Nananene Heau Hejavaneauthau javaājauuthee? Nenedauwunathane Nananene jevanaunauchauthehe. <sup>29</sup> (Hanau haenesedauwauna wauchāhenith haujaun hadjenauahenith hehethee henanene. Hanau nauaunee dauhusedanāde: nau naunaunehade neduguhude hee vāejethāduguthaunau nau nesaunajethaunau; nau

\* **8:24** Possible missing “h” in “Hechauhauthethā(h)e” (“Master”).

haegaugachauagude heeduguhudaunau, nau haejathethasauaunaa haujaun hese nauaunee.) <sup>30</sup> Nau Hejavaneauthusaun haenaudedauunaa, Haudusee? hathāhuk, Nau hanaāēdauwunaude, Waunauthade: hanau dewauthanethe haujaunau hethāchadaunādaunau. <sup>31</sup> Nau haenedauwunanaunau hadjenesedauwaunathee hadjeyehauthee hethauvaa. <sup>32</sup> Nau hena haewauthanaunau neauthuwauchu nevethehethree hauanee: nau haenedauwunanaunau hadjenanāthee wauhaunee. Nau haejenana. <sup>33</sup> Hanaāēnauahethee haujaunauau hehethree henanene, nau haewauhaunesanaunau neauthuwauchuu: nau vahee neauthuwauchu haejathegauhunauau neenane janahuu yese neajee, nau haevanadeavenauau. <sup>34</sup> Hāene henee nachauwauthee daunauhaudu hasedaudenene, haedaugauhunauau, nau haejathāaunauau nau haeauthedanauau hedan nau vedauauwuu. <sup>35</sup> Hanaāēyehaudene hadnauhauwuu daun hasedaudene; nau haedauchau Hejavaneauthusaun, nau haeveehau henane, heneenauthāde haujaunau, haetheaugu heauthene Hejavaneauthusaun, haedāchaunene, nau haechuwuthajaune: nau haenāthajaudene. <sup>36</sup> Henee nenauhauwauthee haeauthedanauau neesenayauhade nenethenaude haujaunau. <sup>37</sup> Hadauchaa hathāauauvaa Gadarenes gauānee haejathethajenāhenauau; hanau dauusāhede: nau hanaāeyehaude nauauhuu jethee thewaunaa, nau hanaāējaesade. <sup>38</sup> Wauhā henane nenauthāde haujaunau haenehethaa hadnenethaunāde: hau Hejavaneauthusaun haejathethajenāhe, hathauhuk, <sup>39</sup> Jaeyehau haudauauwuu, nau hadnauhauthethā hathāenavasauau hayewhu Hejavaneauthau hasehāne nananene. Nau hanaāējathāaude, nau haeautheda nanadee hathāaunee hedan hathāenavasaunee hayewhu Hejavaneauthusaun hasehāde. <sup>40</sup> Nau hethauwuu hāējaenauusade Hejavaneauthusaun, henanedanede haeneethajaudaunaa: hanau haevadauyauhauwau. <sup>41</sup> Nau, naune, haejenauusa henane Jairus haseagu, nau hadāhevāhe vevethahenauauwuu: nau haeuāneseve Hejavaneauthusaun heauthene, nau haedetha hadjewaunejedānith hedauauwuu: <sup>42</sup> Hanau haenesāhene hedaunau wauau hanesenee jajenevāhe, nau haeayānajane. Hau hajesesade henanedanede haevauhaunaa. <sup>43</sup> Nau hesā haevathaude nesenee jajene hee, haevathede haunauude hevāējethāwau hee naudaunehāhehau, hau haejenayauhau, <sup>44</sup> Haedasa hegauwune, nau haevasane naunauchuu heduwune: nau chauchaunu haejenevathaude. <sup>45</sup> Nau Hejavaneauthusaun hanaa navasanāde hahagu? Hāevahethedauwaudene, Peda, nau hathāenethaunāde, Hechauhauthethāhe, henanedanede vauhaunane nau naneethenane, nau hanaa navasanāde, nesehene? hathauhaugaunee. <sup>46</sup> Nau Hejavaneauthusaun, hanaadee vasanānu, hahagu: haenauwau daujasesenauauau vadaude hehethree nananenau, hahagu. <sup>47</sup> Nau hāenauhauwau naa hesā daujeyauthese haejeyehau haeahenauau, nau hanaāēchauāgujanauwunaude, haeauthedauna hauthasee vahee henanedanede hathavasanaude, nau hasenayauhāde chauchaunu. <sup>48</sup> Nau hanaāēdauwunaude, Nauddau, nanehāauwauthenaedene: nananene hadethauwuthajaude henayauhāne nananene; najesa haunauwuthajau. <sup>49</sup> Hajesanadede, hena haejau hanesāde hehethree hadāhevahew vevethahenauauwuu, haeāedauwuna, Haudauna najaa; jevajenaunevene Hechauhauthethāhe. <sup>50</sup> Hau hāenedaunāde Hejavaneauthusaun, haenaāēdauwunāde, jevanāthajau: hethauwuthajau vavade, nau haudnenayauhade, hathāhuk. <sup>51</sup> Nau hāējedāde hauauwuu, henanedane haejevadaujedāne, vavade Peda, nau James, nau Jaun, nau henesaunaune nau henaune hesāhedāyaune.

52 Nau vahee haevewauhudaune, nau haeaudauwuthajauhā: hau hanaānehede, Jevavewauhuu; hehauwunaja, nauthe naugauhude. 53 Nau haeauthanauau haevachunaunanauau, dauaenaunauthee daunajanethe. 54 Nau haevanudana, nau hanaāedanaude hejadenene, nau hanaānadethaude, Hesāhee, thauwauthe, hathauhuk. 55 Nau hevadathuwu haejaedasaa, nau haethauwauthe chauchaunu nau hanaānehede hadnauchauvavathe. 56 Nau henehā haegaudauwuthajaunenau: hau haeāedauwuna hadjāedauvanethe henanedaa hasedaude.

## 9

1 Hanaāadethaude vadadauchu nesenee hethauguhādaunau hauānee, nau haejaanauwuna naudahede nau hadvaheneedauthee nanadee vahee haujaunaa, nau hadnenayaudethee haugauwude. 2 Nau haejenana hadnauthedaudauwunethe henajanedanene Hejavaneauthu, nau hadnenayauhaunethe hasauwauvahehehau. 3 Nau hanaāēdauwunaude, Jevaedanauwu hayewhu hee hajavechaundenenau, daudause haugaudauhunau, daudause newaugusajaānauthau, daudause jauaujau, daudause vāejethā; daudause jevanesauguvechudaunaa. 4 Nau daun hauauwu hadaujedānā jenaadauna, nau jenaathejathāauna. 5 Nau daun hajethauhauvādaunenau, hāenauahenā hena hedane, hadegauyāejaheva naudauuyāgu hadneaenaunauthee. 6 Nau hanaāejathāauthee, nau haehedesanauau hauauwudan, haeauthedaudauwu hethadenee waunauyaunee, nau haevahenayauthānauau nanadee. 7 Wauhā Herod naja haenedauva vahee hanasedaudenenee hee: nau haejaene, hanau haenaasenehedaunee gauuu, henee Jaun jaegauhāde hehethēe denajaa; 8 Nau gauuu, henee Elias naunauhauthethāde hedanayau: nau hauthauauau, hanesāde dajechauau haeyāhehauau jaegauhāde. 9 Nau Herod haenehe, Jaun nedavaāsauau: hau hanaa naa, nanedauwauthau? Nau haevadaunauhauva. 10 Nau vadauhanauau, hāejaenuusathee, haevahauthedaunaa hanasedaunethe. Nau hanaāedanaude, nau hanaāejathāauthee hevenanee hese hadaunechaunee hathauau hedan Bethsaida haseāgu. 11 Nau henanedanede hāenuu, hanaāethauguhauthee: nau haeesedana, nau haeauthedauna hasaunee henajanedanene Hejavaneauthu, nau haenayauha hathāevadaunayauhathēe. 12 Nau hāyānaesade, hanaāejenuusathee nesenee, nau hanaāenehethāde, Nanehāejathāaudenee henanedanede, hadeehaudenee hauauwudan nau vedauauwu nauanee, nau hadenethee, nau hadejasedauthee vethewau: daunechaunee hadaunauau. 13 Hau, Venaa nananena hadevethehedaunee, hathauhuk. Nau hanaāēdauwunauthee, Hau nanethenauwunauau hehauwujavānee hayauthaunāe jauaujaunau nau hanesethee nauwu; hanāyehaunee nau haunaudaunauhuu vethewau hee vahee nuu henanedanede. 14 Hanau wauau haeyauthaune vasevadadausauau henanenauau hanaadauchuthee. Nau hanaāēdauwunaude hethauguhādaunau, Janauguhā yauyauthauyauaunau. 15 Nau hanaasedauthee, nau haevajanauguhanauau. 16 Hanaāedanauau hayauthaunanenee jauaujaunau nau hanesethe nauwu, nau hanaāejēnāaugaude hejavaa, haevethasa, nau haenaāejeanaauau, nau hanaāevenaude thauguthāhehau hadjenanauwunethe hathājedaunenee henanedanede. 17 Nau haevethēhedaune, nau haevahegaudaudene; nau haeauānenau jeyauwaunau hathāenathaudāe nesenee hanaadauchāe hanechauchaunāe nenethaudanee. 18 Nau hethauwu, haenesenane, dauvevethahede, Hethauguhādaunau haenethaunaa: nau hanaāenaudeadaunaude, Hanaa nenehede henaneda

daunanenau? hathauhuk; <sup>19</sup> Hanaāauchuhananadethauthee, Dusaayā Jaun; hauhauthauauau nethee Elias; nau jasae nethee hanesāde dajechauau haeyāhehauau jaegauhāde. <sup>20</sup> Hanaāenehethaude, hau hanaa nenehede nananena daunanenau? Peda hanaāauchuhanāedauwunaude, Chris Hejavaneauthau. <sup>21</sup> Nau haeneenadauduvā, nau haenesedauwaunā hadjāedauwunaunethe henanedanau henee; <sup>22</sup> Heau henane hadnasenede wauthanee hee hayewhu, nau hadnausāguthāde vachaugānanenau nau naja vevethahevahehauau nau wauthaunauhāhehauau, nau hadnaade, nau hadjaegauhāsanade nasese, hanathauhuk. <sup>23</sup> Nau hanaāevahāedauwunaude, Hith henaneda jethauguhānaugu nanehanaunauchauthehadede, nau jeedane henaugauchu hayauwusenenee, nau najeethauguhaa. <sup>24</sup> Daun haunaugaunayaude hedenaedede hadnanadede: hau daun hanadede hedenaedede hee nadanayau, nananede hadnenayauhadede. <sup>25</sup> Hauddusedau henane, vahesedanauaugu hathāauauvadenee, nau hanahadagu, nauwauāthe hausāguthadagu? <sup>26</sup> Daun naudauthedaunāde nau nadanadedanau, nananenith Heau Henane haudnaudauthedaunaunith, hāenauusathe nehayau hadauvasāthanith, nau Henesaunaune hadauvasāthanith, nau vadane hauthaunauau hadauvasāthanethe. <sup>27</sup> Hau hadethauwauthedaunathava hauthauauau theauguthee hede, haudnehauwuvajadawu gaujauaudahede, haunaude haudnauhauduu henajanedanene Hejavaneauthu. <sup>28</sup> Nau hethauwuu wauau hanasauchause hāesenehede, Hanaāedanaude Peda nau Jauneau nau Jameseau, nau hanaāenauaushathee hauanee hadnevevethahethee. <sup>29</sup> Nau hajesevevethahede haenausāaune hedauchaveau haenathadene, nau hedāchaunau haenaujaunenau nau haenaunauaugausauaunenau. <sup>30</sup> Nau naune haenadethaa hanesenethe henanenau, haenanenenau Mosaseau nau Eliaseau; <sup>31</sup> Daunauhauthethāde hedanayau haenausāaune, nau haeauthedaude haudgaujauaudāde hadvathechauchaunaude hehethēe Dādaunedan. <sup>32</sup> Hau Peda nau hethāenethaunādaunau haenauwaunanenau: nau hāauwaudauaunethe, haenauhauwunenau henauasāaude, nau hanesenethe henanenau haenethauguvaa. <sup>33</sup> Nau hethauwuu, hāenauthāde, Peda hanaāanadethaude Hejavaneauthusaun, Hechauhauthethāhe, hethadee hasanedaunee hede: nau hadenesedauna hanasāe nenaunau; hanesadee Nananene, nau hanesadenee Mosee, nau hanesadenee Elias; haejaene daunhasenehede. <sup>34</sup> Hajesanedede, haejenauusanau henaunauade, nau haeduguaunā: nau haenāthajaunaunauau daujedāthee henaunauadee. <sup>35</sup> Nau haejeanededaune hehethēe henaunauadee, Naa nananede Navechauthau Nāa: nedaunaa, hāheagu. <sup>36</sup> Nau hāesanededaunee, Hejavaneauthusau haenesenane. Nau haeyaudenauau, nau haejāedauwunanauau henanedane hena hese neanāthauhauduu. <sup>37</sup> Nau hethauwuu, dauauthesenenee, hāejejanauhusathee hehethēe jauaudanee, haegauāhenenau henanedanau hejajedauaunādaunenau. <sup>38</sup> Nau, naune, henane hehethēe henanedaa haevasanade, Hechauhauthethāhe, nenedauwunathane Nananene, daugauhauwune nāa: vavadenaanesāde nadāeyauneve, hathauhuk. <sup>39</sup> Nau, naune, haujaun hedanāde, nau chauchaunu haedauyānade; nau haethauwuguthaa haevevechauchaunaude jeda, nau haesenehaa haejechuwauthenauthaa. <sup>40</sup> Nau nananenau neauthewu hāthauguhādaunauau hadnausāguthauthee; nau nejenedauthee. <sup>41</sup> Nau Hejavaneauthusau hanaāauchuhananadethaude, Hau hāhauwuthauwuthajau nau daujechuwauthenaedene, haudedauhujesenedauguvathe, nau haddauhujesenethauguvathe? Jāsene nananene hāa hede. <sup>42</sup> Nau hajesejaude, haujaun haeauwuguthaa, nau haethauwuguthaa.

Nau Hejavaneauthusau haeneneuva wauchāhenith haujaun, nau haenayauha dāeyaunauau, nau haejaevena henesaunaunene. <sup>43</sup> Nau haevagaugauanadauwu hasevasenaudāhenith Hejavaneauthu, Hau hajesegauguanaduu haunauude vahee hayauhuhau Hejavaneauthusaun hanasedaunith, Haeāedauwuna hethauguhādaunau, <sup>44</sup> Chuwauthee nuu hanadedauunau jedānauha haunaudaununenau; hanau heau henane hadvenavathe hejadenene henanenau. <sup>45</sup> Hau haejaenauwu nuu hasenehenith, nau haeyaudaunaunauau, haejaenauwu: nau haeedaunaudedaunanaunauau hasenehenith. <sup>46</sup> Hanaāegaugauudedaaunee, hanaadee haudvasāthaa. <sup>47</sup> Nau Hejavaneauthusaun, haeenauwu hanasethaujauthee hedahenauau, haedana dāeyaunauau, nau haeauyejanau-guna, <sup>48</sup> Nau hanaāēdauwunaude daun hanesedanaude nuu dāeyaunauau naneseedaunaa hadnesedanānau: nau daun nāsedanāde haudnesedanaude nājejenanādaune; daun javaānadavenuhunede haunauude nananena vahee nananede hadnaasevasāthaa. <sup>49</sup> Nau Jaun hanaāauchuhanāedauwunaude, Hechauhauthethāhe, neenauhauwaunauau hanesāde nenuguthaude haujaunau hee haneseede; nau needauduwaunauau, hanau dauhujenethaunānauau. <sup>50</sup> Nau Hejavaneauthusaun hanaāēdauwunāde, Jevadauduvaa hāhauwasānavāne nanesevānauau. <sup>51</sup> Nau hethauwuu, hāenauauchaunee hadneejejanauhudanāde, haechuwuyethāne hadnehaude Dādaunedan, <sup>52</sup> Nau haeautheava sayānee: nau hanaāejathāunethe, nau hāejedāthee hajasee hauauwudan Samaritans, hadnesaanudaunāde. <sup>53</sup> Nau haejesedanaa, hanau dauyethaāsade Dādaunedan. <sup>54</sup> Nau hāene hethauguhādaunau James nau Jaun daunauhaudauwunethe nuu, hanaāenehenethe, Vahadāhene, gaujevadaunedauwaune heseda hadjejanauhusanauau hehethee hejavaa, nau hadnevadauchauthee, neesedaude Elias? <sup>55</sup> Hau hanaāeyethādausade, nau haeneneuva, Nananena hāhauwaenava daun vadathau nananena hadahena, hathauhuk. <sup>56</sup> Hanau Heau henane hehauwuujau hadnenauaudede henanedanau hedenaededaunenenu, hau hadnenayauhaude. Nau hanaāeyehauthee jasaa hajasee hauauwudan. <sup>57</sup> Nau hethauwuu, hajesethaugudethee vau, jachau henanene hathāhuk, Vahadāhene, nananenu hadnethauguhathane nananene daun nananene hanasesanaune. <sup>58</sup> Nau Hejavaneauthusau hathauhuk, Gauauwuauau neyāethee, nau neaheauau hejavaa nenauhuchaunethee; hau Heau henane heyauhuunee nedausevaānede. <sup>59</sup> Nau hanaāenehethaude jachau, Jethauguhu, hau hathāhuk, Vahadāhene, nedauau nawaunejenanau nāsaunau. <sup>60</sup> Hejavaneauthusaun hanaāēdauwunāde, Nanehajanauthee gaujauaudahehehauau negaujauaudāhenethee: hau jathāu nananene nau haddauthedaude henajanede Hejavaneauthu. <sup>61</sup> Nau jachau jee, hathāhuk, Vahadāhene, hadnethauguhathane nananene; hau jechuwauthehe nedauau nawaunenaunenechauthaunauau, hanedauthee nayāenau naudauauwuu. <sup>62</sup> Nau Hejavaneauthusaun hanaāēdauwunāde, Hegau henane, dunauaugu thauauauwujethau, nau jaaāyangu, hehauwunaathā henajanedaunene Hejavaneauthu.

## 10

<sup>1</sup> Nu hee Vahadāde haeautheava hauthauau nesaudausauau jee, nau haeyeyethautheava hanenesenethe sayānee haunauude hedan nau vedauauwuu, haudnanādaunauusade. <sup>2</sup> Henaheee hanaāenehethaude, Jenayaunau hethauwuwauthāe haneseuu, hau nesethāhehauau hajewauthathee: vevethahee nananena hee Vahadāde deseujenayaunau, hadejejenanaude nesethāhehau hejenayaunaa. <sup>3</sup> Jathāuau nananena

hathaāsana; naune nananenau janenanathana neānee waude haudāsaunauau hejee hauchāhee. <sup>4</sup> Jevanewuunauwuu nesevāejethāwaunau, newaugusajaānauthau, nau wauaunau: nau jevanaunenāthedaunaa henane hauvaunenau. <sup>5</sup> Nau daun hauauwuu nananena hadaujedānā, Dādauyauha nuu hauauwuu, nedauau hadeva. <sup>6</sup> Nau hith heau dādaunee hanedaulyaugaune, nananena hadādaunahedaunenau hadnaadaudauyānusaa: hau jene hadjaegauusedaunāna. <sup>7</sup> Nau vavade hauauwuu hadanedauva, hadevetheva nau hadevanava daun hayauhuhau hauchauvadenenau: hanau nesethāhe naunaudaunade. Jevaenejedāe hauauwuu. <sup>8</sup> Nau daun hedan nananena hadaujedānā, nau hesedanānagu, hadevetheva daun hayauhuhau hajenanauwunādaunenau: <sup>9</sup> Nau hadenayauhauva hasauwauvahehe daun hanedaude, nau hesau jeenanethāedauwunauna, Henajanede Hejavaneauthau hayāedasāna. <sup>10</sup> Nau daun hedan nananena hadaujedānā, nau jesedanānagu hadjajathāauva hasesana hehethee hadaugauchaudāe hauauwudan, nau hesau jeenesenehethauna, <sup>11</sup> Daudause nauthejahathaugu nananena hadedanaunenau, heejahadāheagu, neyeseгаunuhudee nananena: hau nananena hadethauwaenava nuu, henajanede Hejavaneauthau hayāedasāna. <sup>12</sup> Hau hadāedauwunathava, hadjavaānanethauauyauau hena hesee heee Sodom, javaānee heee hena hedan. <sup>13</sup> Naunauthauau hadnauauchaudauna, Chorazin; naunauthauau hadnauauchaudauna, Bethsaida; hanau havathenayauthau heheenesedauneneagu jedauwuu Tyre nau Sidon, nuu hasehana nananena, dajechauau neaunaunevethajauduuhewauchudaunenau, needanaugudaunee neauchuwaudenee naujuwau nau jaetha. <sup>14</sup> Hau hadjavaānanethauauyauau heee Tyre nau Sidon hāenaudedauwadedaunee, javaānee nananena. <sup>15</sup> Nau nananena, Capernaum, hanejanana yesee hejavaa, hadjaejanauhane yesee hadauveeyauau. <sup>16</sup> Daun hajaathehādaunenau nananena hadjaathehānau; nau daun hauwauchānavādaunenau nananena haudwauchānavānau; nau daun nauwauchanavāde hadwauchanauwaude najejenanādaune. <sup>17</sup> Nau nesaudausauau haejaenuusanauau nauguu neethajaude, hanaāēdauwunauthē, Vahadāhene, daudause haujaunauau hanechauwauaunaunauau heee nananene haneseede. <sup>18</sup> Nau hanaāēdauwunāthee, Nenauhauwauau Haujau waude jahagude hasejanesaa hehethee hejavaa. <sup>19</sup> Naune, Nananenau vanenathana nananena naudahede hadnauguhudaunauna seseyānauau nau hauwauhaudathee, nau nanadee vahee henaudahede haujau: nau hegau hadneaseneva. <sup>20</sup> Hau vahee nuu jevaneethajaudauwuu, haujaunauau dauchauwauaunauna; hau henauthauneneethajauau hanau nananena haneseedaunenau dauwauthaunauhuu hejavaa. <sup>21</sup> Hena hāauchaui Hejavaneauthausau haeneethajaune hevadathuwu, nau hanaāenehede, Nananenau vaveenethedaunathane Nananene, Hau Nāchau, Vahadāhene hejavaa nau vedauauwuu, hanau Nananene dauyadaunaude nuu hayauhuhau hehethee nadaunahehehauau nau hathauwunanenauau, nau hadnauhauthehauva dāeyaunauauau: hethauwuu, Nāsaunau; waude hethadee nananena hasesānenau. <sup>22</sup> Vahee hayauhuhau vanenānau Nāsaunau: nau hegau henane haenauna hanaadāne Heāhene, vavade Vāsaunau; nau hanaadāne Vāsaunau, vavade Vāa, nau nananede hanaadāne Heāwaune hadnenauhauthehāde. <sup>23</sup> Nau hanaājeaegaugauhauwaude hethauguhādaunau, nau hanaāanadethaude hevenanee, Haunauwuthajauauha hasesānenau dauhunauhauwuna hayauhuhau hānauhauthaunenau: <sup>24</sup> Hanau nananenau hāedauwunathana, waunauthathee haeyāhehauau nau nenauchuwuthee nevadaunauhauuu



hena hayauhuhau hānauhauthaunenau, hau hehauwuthauunauhaudauwu; nau devadaunedauwaudu hena hayauhuhau hānedauwauthaunenau, hau hehauwunedauwaudu. <sup>25</sup> Nau, naune, jasaa nanavaavehe haetheaugu, nau haenaundayādauna, Hechauhauthethāhe, nauddusedane jethauujenee henaedede? hathauhuk, <sup>26</sup> Hanaāēdauwunāde, Hayew wauthaunesaa nanavaavedaunaa? Hādusasauhaude nananene? <sup>27</sup> Nau hanaāēdauwunaude, Nananene hadvechauthau Vahadāde nananene Hejavaneauthau nauuu vahee nananene hadahaa, nau nauuu vahee nananene hadathuvaa, nau nauuu vahee nananene hadāahedaunaa, nau nauuu vahee nananene haugaugauuthajaudenaa; nau nananene hanedaudewau waude nehayau nananene. <sup>28</sup> Nau hanaāēdauwunaude, Nananene hethauvāne: nanehasedaune, nau nananene hadnenaedene. <sup>29</sup> Hau nananede, vanadauchuvanadede, hanaāenehethaude Hejavaneauthusaun, Nau hanaa nanaudewau? hathauhuk, <sup>30</sup> Nau Hejavaneauthusaun hanaāauchuhanāedauwunaude, Jasaa henane haejathāau hehethee Dādaunedan hese Jericho, nau haesedanaa havedehau, haethauwujedaunaa hedāchaunau, nau haenesenehaa, nau haejathāaunenau, haenauthaa dauhayānaja. <sup>31</sup> Nau haejathedasaa jachau vevethahevahew hehethee: nau hāenauhauvāde, haejavechauthaa gauchuhene. <sup>32</sup> Nau vavade Levite, hāedadauau hadaunith, haeda sa\* nau haenāuhauva, nau haejavechautha gauchuhene. <sup>33</sup> Nau jasaa Samaritan, daujādade, haedasa hadaunith: nau hāenauhauwaude haeauwunauna, <sup>34</sup> Nau haeyehau, nau haedugudauna hadaunenesenith, haedaunauwuna javeda nau vasevenenaje, nau haedasana nehayau hedauneau, nau haenauuchauha vethehedaunauwuu, nau haeunauneha. <sup>35</sup> Nau daunauganene hāejathāaude, haedane hanesanene hevāejethāwau, nau haevana hadāhevahew, nau hadaunaunehau, hathauhuk; nau daun hasegaujauauthedanānaune jee, hāejaenauusanaune nananenu hadaunaudaunathane nananene. <sup>36</sup> Hayewnau nuu hanasāe, hadeanathaunau, henedaudevādaune henee neesedanāde havedehau? <sup>37</sup> Nau hanaāēdauwunaude henee heauwunaunādaune. Hanaāenehethaude Hejavaneauthusaun, nau jenaenesedaune nananene. <sup>38</sup> Wauhā hethauwuu, daunausujavesathee, haenauusanauau jasaa hajaseehauauwudan: nau jasaa hesā haseagu Martha haejedana hedauauwunin. <sup>39</sup> Nau haenahavāe Mare haseyugaune, jea haejanaugude Hejavaneauthusaun heauthene, nau haenedauwaude hedanadedanene. <sup>40</sup> Hau Martha haedauwauchune dauwauthanee hasedaude, nau haejedasa, nau hanaāenehethaude, Vahadāhene, gauhajegaudauvanade daujenauthānau nahavaa daunenesethānau? hāedauwunene hadenedahevānau. <sup>41</sup> Nau Hejavaneauthusaun hanaāauchuhanehethaude, Martha, Martha, nananene haunaunāhene nau dejanethajaudauwu waunauthāe hayauhuhau: <sup>42</sup> Hau hanesadee hayewhu chaunaugauau: nau Mare hayāchauhau hene hethadene hadāde, hehauwuneejathechauhau nauthee.

## 11

<sup>1</sup> Nau hethauwuu, henee, daunausuvevethahede haedaunanene, hāejenedaude, hanesāhenith hethauguhādaune hathāhuk, Vahadāhene, jeechauhauthehāa hadnesevevethahee, waude Jaun jea neesechauhauthaude hethauguhādaunau. <sup>2</sup> Nau hanaāēdauwunaude, hāene nananenu van-

\* **10:32** Two words across a page (“haeda” and “sa”) perhaps should have been hyphenated, giving “haedasa” which, together with “haedasaa”, occurs eleven times elsewhere in the text. There are no other occurrences of “sa” standing alone.

evethahenā jeenanesenehena, Hāsaunaunene Nananede hanedaude hejavaa, Vadanauha Nananene haneseede. Nananene hanajanede hanājaunauau. Nananene hathanavāane hadnaasedaunee hasauau hejavaa, nau jee nuu vedauauwuu. <sup>3</sup> Hejevenāa hadauchusenee hayauwusenee vethewau. <sup>4</sup> Nau jejaegudanauwunāa hewauchudaudenedaunau hanau nechau nejaegudanauwunade haunauude hanesāde nethāesayānedanauwunāade. Nau jevaechauhāa nedauvasehadee; hau haugaunayauhāa hehethee hadau wausauau. <sup>5</sup> Nau hanaāāedauwunaude, hanaa nananena hadnenedaehahede, nau hadneyehaude thaudajaa, nau hadethaude, Va, jeehe hanasāe jauaujaunau; <sup>6</sup> Hanau nādae daunauujādaunānau, nau nananenau haeyahuunee nachauwaude? <sup>7</sup> Nau hehethee jedauwuu hadnauchuhanehede nau hadnenehede, Jevajanethajuhu: dajanau wauwu haugauhude, nau nanesaunauau nanejauwu naudauvaa;\* nananenau nāhauwuneethauwauthe nau hajeneevenathane. <sup>8</sup> Nananenau hāedauwunathana, hadnehauwuthauwauthene nau hadvenāde hanau dauhunedaehāwaude, auhanau daunenāhede hadthauwauthenith nau hadvenāde daun hadauchuvathehāthe. <sup>9</sup> Nau nananenau hāedauwunathana, Henedauwauau, nau hadnevenana; henaudethāe, nau hadnevedena; hewaudāhee (dajanau), nau hadnegaunedanauwunana. <sup>10</sup> Hanau haunauude hanesāde nethāenedauwaude neneaudauwaude; nau henee nenaudethāde neveenauau; nau henee newaudāhaude (dajanaune) hadgaunanauwunade. <sup>11</sup> Hith hāahenau nedauwunānagu jauaujaunau jasaa nananena henesaunaune, gauhadvena hauunaugane? wauāthe nedauwunāhuk nauwu, gauhadvena hauchuhanee gauhadnanene nauwunenith seseyāne? <sup>12</sup> Wauāthe nedauwunāhuk naunau, gauhadvena hauwauhaudanethe? <sup>13</sup> Hith nananena, hauhauganenagu, hadaenava hadnesevenauna hethadenee venadedaunau nananena hadāeyaunevenau: duthāee nananena hejavaa Hāsaunaunenau hadvenāva Vadanauwau-thauwu nethāenedauwunauna? <sup>14</sup> Nau neausāguthaude haujaun, nau heehauwanadene. Nau hethauwuu hāejathāaude haujau, hanaāejaanadede; nau henanedanede haegaugauuthajaudene. <sup>15</sup> Hau jasaa hahagu, Nausāguthaude haujaunau heee Beelzehub najane haujaunaa. <sup>16</sup> Nau hauthauau, haenaudayādaunaa, haenehethaa hadnauhauthaudenenee hehethee hejavaa. <sup>17</sup> Hau haeaeene hedenethajaudenene, haeāedauwuna, Hadauchaa najanede nanayāsenauaugu nehayau hadneyauhuu; nau hauauwuu hasānavadenuagu hauauwuu hadjanasaa. <sup>18</sup> Hith, Haujau jea hasānavadagu, hauddusetheaugune henajanede? hanau nananena denehena nananenau deausāguthaugaunee haujaunauau hehethee Beelzebub. <sup>19</sup> Nau hith nananenau hausāguthaugaunee hehethee Beelzebub haujaunauau, hanaa hāahenau hadnausāguthaude? hadedauchuwuwuna. <sup>20</sup> Hau hith nananenau hejadenethedaunaugu Hejavaneauthau hausāguthaugaunee haujaunauau, hethauwuu henajanede Hejavaneauthau hedaasāna. <sup>21</sup> Henane danāahethe hedauchuaunau haunaunedehuk hedauauwuu, hevathayaunau nedādauyaunee: <sup>22</sup> Hau hāejavaādāāhenethe javaānehuk hedaasāhuk, nau veavehāhaugu, hadnedanauwunāde vahee hedauchuaunau heaanadauwaudenau, nau hadjaanenee hesehaudenau. <sup>23</sup> Daun najenethaunāde hasānavānau: nau daun najenethauāyāvāde naneāsauauwaude. <sup>24</sup> Hāenauthauthe wauchāde haujau henanene, nehedesade hadaujenajenenee, denaudedede

\* **11:7** Mid-verse punctuation could be either a colon or semicolon as the lower part of the punctuation is malformed. It was decided to use the semicolon, in line with the KJV, as the punctuation of the two texts often coincides.

dauyānusenade; nau janeveedethe, naneenehede, nananenau hadjaesanau naudauauwuu needaujenauahenau. <sup>25</sup> Nau jaenauusathe, neveedede nesewaudeauhunee nau neyauthaunenee. <sup>26</sup> Naeneejathāde, nau naneedanauwaude hanesaudauchunethe hauthauau haujaunau javaānauhauganenethe javaāhede; nau nanejedāthee, nau nanejanauguthee: nau waunee henee henane naenejavaānauhauganede nedauaunejeethāde. <sup>27</sup> Nau hethauwuu, hajeseanadede nuu hayauhuhau, jasaa hesā hehethee henanedaa haevasanade, nau hathauhuk, Hauwunaunade henesaunehē hājaneseauthāde Nananene, nau hethanau nedaunenane. <sup>28</sup> Hau hahagu, Haa, nausunee, nauwunaunathee nethāejaathededuu hedanadedauene Hejavaneauthu, nau naunaunedethee. <sup>29</sup> Nau henanedanede hāneenanauthenedauhuu, hanaāejasesenehede, Nuu nanaa wausauau henaedede: nevadaunauhauthāthee; nau hegau nauhauthaude hadvenaunauau, hau vavade nauhauthau nananede Jonas haeyāhe. <sup>30</sup> Hanau Jonas neesenauhauthehaude Ninevites, nechau jea Heau henane hadnaathāde nuu henaedede. <sup>31</sup> Nenauchuwusā janauhuu hadjaegauhāde naudedauadenese see nauguu henanenau nuu henaedede, nau hadnauthauwuvāna: hanau dejewaunejaathehaude hehethee hāauauvadenee naunaudāhenith Solomon; nau naune, hejavaāhedaune Solomon hanedaunith. <sup>32</sup> Henanenauau hehethee Nineveh hadjaegauhāthee naudedauadenese see nauguu nuu henaedede, nau hadnauthauwuvāna: hanau dauaugauthethajauduu hedauthedaunene Jonas; nau, naune, hejavaāhedaune Jonas hanedaunith. <sup>33</sup> Hegau henane, hāesedeauchauuu nauauuthayau, hehauwujenane yauthee, daudause hehauwugaudauyauvasenaunaa, hau dasee nauauuthayauneetheaugunee, nethāejedāthee hadnenauhauuu naunauasādane. <sup>34</sup> Hanesene vadanayannaa nanaa nevasesānee: nanaa hāenesadee hasesānenau nananena, nananene hadnaunauudauyauau hadanayau jea hanechauchau-naa hese; hau hāene nananene hasesā wausuu, hadanayau jea hadnechauchaunaudene vaneeyauau. <sup>35</sup> Haunauyauhauwauwau hanau henee hesee hathāsadaude nananene jea veeyauha. <sup>36</sup> Hith nananene haunauudauyaugu hadanayau hanau hadnechauchaunaudene hese, hadnehauwugauuveeyau haunauude hadnechauchanaa hese, waude naunauasādāe nauauuthayau nevenāna hese. <sup>37</sup> Nau hajesanadede, jachau Nesethajauhu haeadethaa hadnethevethehewaude: nau haewaunejedā, nau haejanaugu dauvethede. <sup>38</sup> Nau hāene Nesethajauhu nauhauwau, haegaudauvanava daujahesehunith nedauau hajesejevethenith. <sup>39</sup> Nau Vahadāhenith hathāhuk, Hewaunehaa nananena Nesethajauhuhauau neyauthahenauwuna jathee vāenaunau nau saenaunau; hau nananena hethauvaa hanechauchaunaudena vahedayaude nau hauhauganede. <sup>40</sup> Nananena janethauvahena, gaujenane Hejavaneauthau nenesedede jathee gaujee henesede jedauwuu? <sup>41</sup> Hau hevāe hauwuyau daun hanetheyaunenau; nau, naune, vahee hayauhuhau hadnesewaudeanauwunana? <sup>42</sup> Hau naunauthauau hadnedasāna nananena Nesethajauhuhauau, hanau nananena hadvāna vadadauchu wauhaunauau nau naneujaudevejechau nau vahee hathāejajāesuu vejechau, nau hadjavechaudauwuna vavesauchuwude nau devechauthade Hejavaneauthau; nuu hāvachunaasedauna, nau hānanejenaudauwuna hauthauau nejesehee. <sup>43</sup> Naunauthauau hadnedasāna nananena Nesethajauhuhauau, hanau nananena devechaudauwuna najatheaugudaunau jedauwuu vevethahenauwuu, nau dejachauthana

nedauaudaunauvadee. <sup>44</sup> Naunauthauau hadnedasāna nananena, wauthaunauhāhehauau nau Nesethajauhuhauau, nanadaunahena, hanau nananena waude nedaugaudauyauhudaunee dejenauhauwuu, nau henanenauau nedasejavesathee hehauwaenaunā. <sup>45</sup> Hanaāauchuhananadede hanesāde nanavaavehe, nau hathauhuk, Hechauhauthethāhe, nuu dauhanadene nananene naunaunauthevāana jea. <sup>46</sup> Nau hathāhuk naunauthauau hadnedasāna nananena jea, nananena nanavaavehehauau, hanau nananena henenauchuna henanenauau nauuu henenauchude hehayaudee javechauhunee, nau nananena nehayau jevavasanauwuu henenauchudaunau heee hanesadee nananena hajadenenau. <sup>47</sup> Naunauthauau hadnedasāna nananena, hanau nananena denesedaunauna gaujauaudahenauauwu haeyāhehauau, nau hāsaunaunenau denauauthee. <sup>48</sup> Hethauwuu nananena haeyāna henee nananena wauhaunee nanāsedauthee hāsaunaunenau: hanau denauauthee, nau nananena nenesedena hegaujauaudahenauauwunenau, <sup>49</sup> Naasauau jea hahagu hedaeyaude Hejavaneauthau, Hadjenanu haeyāhehauau nau vadauhanauau, nau hauthauau hadnenaathee nau hadnenaunaunauchauthethee: <sup>50</sup> Henee hevaevenau vahee haeyāhehauau, hanedaunee hehethee davadeesehee vedauauwuu, hadneenaudedauwuhuu nuu henaedede; <sup>51</sup> Hehethee hevaevaa Abel nauuu hevaevaa Zacharias henee nenajaa nahethāe jaanaa nau vadannauauwuu: hethauwuu nananenau nehethathana nananena, hadneenaudedauwuhuu nuu heee henaedede. <sup>52</sup> Naunauthauau hadnedasāna nananena nanavaavehehauau, hanau nananena dauhudanauwuna gaunaudauauha haeyaude: nananena hadnehauwujedāva nehayau, nau henee hathāejedāthee nananena najauaunauna. <sup>53</sup> Nau daunenehedauau nuu hayauhuhau yesee, wauthaunauhāhehau nau Nesethajauhuhauau hanaāejaseseneenanaudedauunāde, nau haeneenadaunanauau hadnauthedaudauwunith hauwuhuu hayauhuhau; <sup>54</sup> Haeaudenauthaa, nau hadnesedanauwunethe hayewhu hehethee hedenene, hadnāedauwauthauthee.

## 12

<sup>1</sup> Gaunauwuu, hāene hena hauāchaudenee hauānee haejedaguu hadaucha henanedanede, dauwauthaa haeunauguhudaunadenauau, hanaāejasesāedauwunaude hethauguhādaunau nedauau vahee, Haunauyauhau dauwauau nananena gauhaujau Nesethajauhuhauau, nenadaunahethee. <sup>2</sup> Hanau hehauwuyauthesa, hathāeyauthesaa, daudause hehauwuyauthesa, nethāejaenaunee. <sup>3</sup> Hanau daun nananena hasanadenā veeyaugu hadnedauwuhuu hesenee; nau henee nananena hasenehenā waunaudaunuu jedauwuu hadnauchunana dasee hauauwuu. <sup>4</sup> Nau nananena hāedauwunathana Nādaehauhauau, Jevaesaa henee nenadethee henanedayāhau, nau heee hehauwauthesedaunauau. <sup>5</sup> Hau nananena hāedauwunathana daun nananena hāchaunenau: Hesaa Naa, heee hesenaānagu naunaudāde hadgauusevāna hadaugauhauchanee; haa, Nananenau hāedauwunathana nananena, Hesaa. <sup>6</sup> Hayauthaunethee hajaseaheauau gujeaunaunaunee heee hanesāenee nevaāhenee, nau hanesāde hehauwunauneethedaunā Hejavaneauthu? <sup>7</sup> Hau daudausee hadauchaē hāthaanenau haudauguhuanenau vahenayāee. Jevanāthajauau henaheee: nananena javaānauwauhuana hadauchtethee hajaseaheauau. <sup>8</sup> Jea Nananenau hāedauwunathana, Daun naujaudauthehāde hesee henanedaa, nananede Heāhene henanene jea hadnehauwaudauthehaa hesee hautheaunau Hejavaneauthuu. <sup>9</sup> Hau henee nauyauhāde hesee henanedaa hadneyauhade

hathaāhenethe hautheaunau Hejavaneauthuu. <sup>10</sup> Nau daun hayādaunaude Heāhene henanene, hadjaegudanauwunade: hau nananede henee hauhauganedauau Vadanauwauthauwu hadnehauwujaegudanauwunau. <sup>11</sup> Nau hāejedanānā vevethahenauauwu, nau hauchuwunanenauau, nau najanauau, jevagaugauanadauwuu wauāthe daunhayewhu nananena hadnesauchuhanehena, wauāthe daun nananena hadnesenehena: <sup>12</sup> Hanau Vadanauwauthauwu hadnāedauwunāna nauauchaugu daun nananena hadnesenehena. <sup>13</sup> Nau hanesāde hehethee hananeda hathauhuk, Hechauthethāhe, hanadesene nasaa, hadegaugauanauwaunauau vattheyaunau. <sup>14</sup> Nau hathāhuk, Henane, hanaa nanesehāde hadnauchuwuhathane nau hadjaanauwunathane nananene? <sup>15</sup> Nau hasenehethauhuk, Haunauyauhaudauwauau, nau naseduhuu jevavathehāe: hanau henane hedenaedede hehauwunedahevaa wauthayāgaune hevathayaunau henetheyaunau. <sup>16</sup> Nau haenadetha haejegausudenanadetha, Vedauauwu jasaa nethauyāsenane haenauthauthā: <sup>17</sup> Nau hasethajauhuk nehayau, hewauau hauadnesedaunaune, hanau hajenethenauwau jedauwu hadnedauthānauwau navethenau, hahagu? <sup>18</sup> Nau hanaāenehede, nuu hadnaasedaunau: hadthauwunauwau nathāyānauauwu, nau hadnesedenau hadjavaāvasauau; nau hadnaadauthānauwau vahee navethenau nau navathayaunau. <sup>19</sup> Nau hadnaāenehethauau navadathuwu, Vadathau, nananene nanethenauwu waunauthāe hanetheyaunau janenane hadwauthāe jajene; hedanau nanethauaunenaedede, hevethethe, hevaveyā, nau haunauwunaede. <sup>20</sup> Hau Hejavaneauthu hathāhuk, Nananene Hauhauga, nuu dauveeyauau nananene havadathuwu hadnedauwunane: hee hanaa hadnethenauau hajenayaunau? <sup>21</sup> Nananede haenathaunau heveaunauaudenau, nau hehauwuveaunauau hesee Hejavaneauthu. <sup>22</sup> Nau hathauhuk hethauguhādaunau, Naa nehethathana, Jevaegaugauanadauwuu hadenaededaunenau, daun hadnevethedaunenau; daudause hee hadanayaunenau, daun hadnāsaunenau. <sup>23</sup> Henaedede javaāsaa vethevaa, nau vadanayau javaāsaa hāchaunaa. <sup>24</sup> Gaugauanavaa huunauau: hanau dejenayāthee nau dejegauausauhāthee; hehauwunethenauwu thāyānauauwu nau vethewau nedauthāsanenee; nau Hejavaneauthau nauchauwaude: gauhjavaāneenaedeva neahenaa? <sup>25</sup> Nau hanaa nananena vanadauanāde hee neejahehee? <sup>26</sup> Hith nananena wauhā jeneenesedaunagu henee haugajuhuu, naudū hajanethajaudauwuna hauthauau? <sup>27</sup> Gaugauanadauwuu nenaugaānuu nejajaesaānuu nesevesee: hehauwunesethānaunau, hehauwunethaudayānaunau; nau nausenee nāedauwunathana, henee Solomon vahee hevasāthade hehauwunaasenu hasaunee nuu. <sup>28</sup> Hith wauhā Hejavaneauthau heneenudehuk wauchuunau, nuu desenee nauau, nau naugaagu hadneewaudeadaunaunee; hāduthāejavaāvenāva hāchaunau, Hau nananena vanehaa hethauwuthajauna? <sup>29</sup> Nau jevanaudedee nananena daun nananena hadnevethedaunenau, wauāthe daun hadnevaveyādaunenau, jevaaugaugauauthajauau. <sup>30</sup> Hanau vahee nuu neauthudan hathāauavua nenaudethāthee: nau nananena Hāsaunaunenau haenauau henee nananena hāvathehādaunenau nuu hayauhuhau. <sup>31</sup> Hau henaudedee nananena henajanede Hejavaneauthau; nau vahee nuu hayauhuhau hadnethedaunanauwunana nananena. <sup>32</sup> Jevanāthajauau, hāhauwuauthaheva; hanau nananena Hāsaunaunenau hayethanadauwunādaunenau hadvenāna henajanede. <sup>33</sup> Heaudaunaa henee hanetheyaunenau, nau hauwunaunaa hadavenuhuhauau; jasedauau nesevāejethāwaunau henee nejethauuthauauchusāe, haenathaude haneduu hejavaa henee nejethauuyauhuu, nedaujavedadenee, hehauwujuudenauau

nuvanauauau. <sup>34</sup> Hanau haduu hadaenathaunenau, hena hadahenau jea hadnaaduu. <sup>35</sup> Duujehee, nau haunauauuthayaunenau gauhauchanauha; <sup>36</sup> Nau nanehathahena henanenauau henee nedauyauhauwauthee hanau Hadahethedaunādaunenau, hāejejaesathe hehethee gauwuhaude; henee hāejenauusathe nau hadwardāhaude, hadgaunanauwunade nauhauhaunee. <sup>37</sup> Hauwunaunaa henee nesethāhehauau nananenethe, Vahadāde hāejenauusathe hadveenaude hadnaunauyauhauthānethē: hethauwāedauwunathana, haddujede nehayau, nau hadjanauguhaude hadvethenethe, nau hadjeedauchaude nau hadnaunauchauwaude. <sup>38</sup> Nau hith jenauusahek naneseauwaude haunauyauhauthāhe, wauāthe jenauusahek naneseauwaude haunauyauhauthāhe, nau hadveenaude hadnesaanunethe, hauwunaunaa henee nesethāhehauau. <sup>39</sup> Nau nuu hāenauwuu, henee hith henane hedauauwuu haenauaugu daun hāauchaunee havedehew neeenauusanith, haunaunauyauhauwaude, nau hanājechuwauthedaunenauhunee hedauauwuu. <sup>40</sup> Nananena hadnaaesaaunaa jea, hanau Heau henane hadnauusade daun hāauchaunee hāejenauanauwaunā. <sup>41</sup> Peda hanaānadethaude, Vahadāhene, gauhanadethāa Nananene nuu hee jegausudede wauāthe vahee? <sup>42</sup> Nau Vahadāde hahagu, Hanaa henee chuvahagu nau hesenaedehuk hadāhevāhe, nananede hadāhewaunādaune, hadnevenaude gauuu vethewau nauauchaunee? <sup>43</sup> Hauwunaunaa henee nesethāhe, nananenith hadāhewaunādaune hāedasāthe hadveehāde hadnaasehāde. <sup>44</sup> Hethauvaa hathāedauwunathana, henee hadnesehāde hadāhewaude vahee hethāenethayaunau. <sup>45</sup> Hau nau hith henee nesethāhe hesethajauhuk, Nadāhewaunāde jeguthenauusahek; nau henenesegauhahek henanenau nesethāhehau nau hesānau, nau hevethehagaunee nau hevaveyāhaugaunee, nau henaunauneseavagaunee; <sup>46</sup> Hadāhevāhe henee nesethāhe hadnauusanith hajesesenenee hāejejauwuwuhauthe, nau, neejaenauau, nau hadgudanāde nau hadjenanaude jethauwardahehau. <sup>47</sup> Nau henee nesethāhe haenauaugu hadāhewaunādaune hathanavāde, nau jesaanuhuk, daudaus dejesedaude hathanavāthe hadnenenesegauhude dejauaunee. <sup>48</sup> Hau henee jaenauaugu, nau hesedauhauk nesenenesegehedaunenee hanājauwaunenesegehuhude, hanau daun hauwauhuvenāde nananede hadnauwaunedauwunade; nau nananede henane hauwauhauhauthade, nananede hadnauwaunedauwunade. <sup>49</sup> Hadjejenanauwau heseda dasee vedauauwuu; nau hayew navathehāde wauwu gauhauchagu? <sup>50</sup> Hau nanethenauwau dusaahede hadneedusaahedaunee; nau hanahauwardauaunānau haunau hēsedaudeyāgu. <sup>51</sup> Haneējaude hadjenanauau dādaunee vedauauwuu haāthanaveva? hadāedauwunathava, Hegau; hau wauāthe hanāgauanauwau: <sup>52</sup> Hanau hehethee hee yauthaunenanaunaunee hanesadee hauauwuu hadgauanee, hadnasaunauthee hanesenethe, nau hadnesaunauthee hanānenethe. <sup>53</sup> Henesaunaun hadgauanathee hadnasānauwaude heau, nau heau hadnasānavāde; hesā hadnasānauwaude hedaunau, nau hedaunau hadnasānavāde, hesā hesave hadnasānauwaude, nau hesave hadnasānavāde. <sup>54</sup> Nau hanaānadedauau jea henanedanede, hāenauhaudauwunā henaunauade jevehauuachagu hehethee nesenaesade, chauchaunu nananena, Hadnauchuhajauwasauau; nau naenesauau. <sup>55</sup> Nau hāenauhaudauwunā jenauhuu hanehedasāe, nananena, hadnasedaa; nau naenesauau. <sup>56</sup> Nananena nanadaunahena, nananena naenauwuna hedauchaveau haunauau nau vedauauwuu; hau dusaudee haejaenauwuna nuu hewaunehaa? <sup>57</sup> Haa, nau nau du daudause nananena haejaenauwuna hasethadee? <sup>58</sup> Hāeyehauthānā hasānavādaunenau hauchuwunanenau,

nausujavesanagu, nayātheneneevaa hadeenayauhāna; havaehauthāva najanauchuwunanee, nau najanauchuwunane havavena duguthāhew, nau duguthāhe havathānāva duguthānauauwuu. <sup>59</sup> Hāedauwunathana havajeneenauthauva, haunaude vathaunaudauhunagu havāejethāvenau.

### 13

<sup>1</sup> Hena hethaa hee jachau haeauthedaunaa Gananeans, hevaewu Pinade haewauhaunauwuaunenau nedauausāyāthee. <sup>2</sup> Nau Hejavaneauthusaun haeauchuhananadethā, Nauchāe nananena henee nuu Gananeans heauhaugayaugaunee javaānee vahee Gananeans, hanau daujeneethajauduu hayauhuhau? <sup>3</sup> Nananenau nāedauwunathana, Hegau: hau, vavade nananena jaugauthethajaunagu, nananena hadnavahethahena gaujauaudahede. <sup>4</sup> Wauāthe hena nasaudauchunee, dasee hayauauwuu jedauwuu Siloam dethauwunauauau, nau haenanaā, gaugauanadauwuu henee gauhujavaānauhauganenauau vahee henanedanede henee theaugude jedawuu Dādaunedan? <sup>5</sup> Nananenau nāedauwunathana, Hegau, hau vavade nananena jeneethajauhadede, nananena hadnavahethahena gaujauaudahede. <sup>6</sup> Haeheanade jea nuu dajenehede; Jasaa henane haenethena hauuyauchunauhaudene haejenana jedauwuu dadajevenevese nethauchayaunaa; nau haejenauusa nau haenaunaudede vevenaundenau hanāvenee, hau haejeveede. <sup>7</sup> Hanaāenehethaude nesethāhew hedadajevenevese nethauchayaunaa, Naune, nuu hanasāa jajene nananenau hanejaunau daujenaudedenu vevenaundenau nuu hauuyauchunauhaudee, hau hajeveedenau: dauwauhune; hadevachunauthauyauau vedauauwuu? <sup>8</sup> Nau hanaāauchuhanadethāde, Vahadāhene, hauwaa nanehasene nuu hee jaje jea, nadeesenenesede, nau vehethe hadjenanauwau. <sup>9</sup> Nau hith hāvāgaune vevenaundenau nee: nauhith jene, hadnaāedauwuhade. <sup>10</sup> Nau haechauhauthethā jasaa vevethahenauauwuu vadanese. <sup>11</sup> Nau, naune hena hesā haujaunehaeheaugauwu nasaudauchunee jajene, nau haevajanā hauānee, nau haejenechuwuwauthe nehayau. <sup>12</sup> Nau hāene Hajavaneauthusaun nauhauwaude, Haeadetha, nau hanaāāedauwunaude, Hesā, nananene haunaugunane hehethēe hadaugauwudaunaa. <sup>13</sup> Nau hanaāevasanaude: nau chauchaunu hanaāechuvāde, nau haevaveenethedauna Hejavaneauthu. <sup>14</sup> Nau hauchuwunane vevethahenauauwuu haeauchuhananade nauguu hasenaunaude, hanau henee Hejavaneauthusaun denayauthānith vadanese, nau haeautheda henanedaa, Hena nanedauchaehē hese henane heenesethādaunau hanānaneējauna nau hanānaneenayauhana, hau hegau vadanese. <sup>15</sup> Vahadāde hanaāauchuhananadethaude, nau hathauhuk, Nananene nanadaunāhene, gauhājene dajee hanesahena vadanese haugunauva hauwaugajevenau wauāthe naugauchaudaheauau hehethēe hewauchuhauchauwauauwuu, nau gāyethāājethauva devanauhauna? <sup>16</sup> Nau gaujenaasaunee naa hesā, hedaunau Ābraham,\* henee Haujau heduguthaune, naune, nuu nasaudauchunee jajene, hāaugunade hehethēe nuu deduguhude vadanese? <sup>17</sup> Nau hāenehedauau nuu hayauhuhau, vahee hejauthauwau haeaudaudāhenenau: nau vahee henanedanede haeneethaujaudene hee vahee havathee hayauhuhau henee hesethaunau. <sup>18</sup> Hanaāenehede, dusaune henajanede Hejavaneauthau? nau hayew naudnenehethau? <sup>19</sup> Waude nejenanene mausdaude, henane

\* **13:16** “Ābraham” is spelt thus once in this verse and spelt “Abraham” thirteen times elsewhere in the text. It is not known whether the spelling differences have any grammatical significance.

nedanauau, nau neneāgudede hejenayaunaa; nau neveseaude, nau hāhe haeavadauhaudene; nau neahehauau hejavaa negauser hedānaa. <sup>20</sup> Nau jea hanaāenehede, Hayew naudneedajenehethau henajanede Hejavaneauthau? <sup>21</sup> Waude nesaunauchaa henee hesā nedanauau nau nejenanauau nasau dejenauhene thauauhanau haunaude devahene-saunadāe. <sup>22</sup> Nau haeehedesa hauwauhauauwudane nau hajasedan, dechauhauthethāde, nau haejāda hese Dādaunedan. <sup>23</sup> Hanaāanadethāde hanesāhenith, Vahadāhene, gaujewauthanauau henee henayauthahee? Nau hanaāāedauwunaude, <sup>24</sup> Neaunedauwauau hadejedāna hadaugaugunesāde dajanau: newauthana, Nananenau dāedauwunathana, hadnenaudedena hadnedaujedāna, hau hadnehauwuneeauva. <sup>25</sup> Hāene hechauhauthethāhe hauauwuu thauwauthehuk, nau haugauhahagu dajanaune, nau nananena hanānaāetheauguna jathee, nau hanānaāewardāhauna dajanau, hanānaāenehethauna, Vahadāhene, Vahadāhene, jegaunanauwunāa, nau hanānaāauchuhanehethāna nau hanānaasenehethāna, Hāhauwaenaunathe daun hadesane: <sup>26</sup> Hanānaāenehethauna, Nevethenauau nau nevaveyānauau hathaāhene, hau nananene dauthedaunānehadaugauchadee. <sup>27</sup> Hau hadnaasenehede, Hāedauwunathane, Hāhauwaenaunathe daun hadesane; nayāsesave vahee nananena nesethāhehauau wauwauchudaude. <sup>28</sup> Hena hadnevewauhudaunee nau hadnegaugauchaugudasenana, hāenauhauwaunā Abraham, nau Isaac, nau Jacob, nau vahee haeyāhehauau, Jedauwuu henajanede Hejavaneauthau, hau nananena nehayau nenuguthadena. <sup>29</sup> Nau hadjenauuchaudene hehethē nejeethevesesanith, nau hehethē nesenaesanith, nau hehethē nanavee, nau hehethē janauhuu, nau hadjanauguduu henajanedanene Hejavaneauthu. <sup>30</sup> Nau, naune, hena hedauaude hadnedauvade, nau hena nanedauvade hadnedauchude. <sup>31</sup> Hajesesenee hena haejenauusa jasaa Nesethajauhuhauau, hasenehethāhuk, Nauahe, nau jathāau, hanau Herod hadnaāne. <sup>32</sup> Nau hanaāāedauwunāthee, Najesaa, nau hadāedauwunauva hena vachuhuu, Naune, nenuguthu haujaunauau, nau nenayauthānau nuu desenee nau naugaagu, nau nanaseauwauau hese hadnaāesedaunau. <sup>33</sup> Hau hadnenesanau nuu desenee, nau naugaagu, nau jea hathavenaugaagu: hanau hehauwunaasau henee haeyāhe denaade Dādaunedan. <sup>34</sup> Hau Dādaunedan, Dādaunedan, nanathee nenauathee haeyāhehau, nau nenauchauwathathee hauunaugāe henee hejejenanauwunaudenenau; dauhudauchu naudnauāchauhaunauau nananena hadāeyaunewauau hauānee waude neauthuneahēe dauānaude henesaunau hethauvaa hethaenaa, hau hāhauwuvatēhāva. <sup>35</sup> Naune haudauauwunenau, naunaudauwunana hadnadauyewu: nau hethauwuu nāedauwunathana, Nananena hadnehauwunauhauwuva haunaude nauauchaugu hadneenehena, Hauwunaunaa henee jaunaude hee henseedaunene Vahadāhenith.

## 14

<sup>1</sup> Nau hethauwuu, daujedāde hedauauwunene hanesāhenith najane Nesethajauhuhau hadvethee jauaujau vadanese, henee haeanauyauhauvaa. <sup>2</sup> Nau, naune, hena jasaa henane hathaāhede haenenesaunenauau. <sup>3</sup> Nau Hejavaneauthausau haeauchuhananadetha nanavaavehehau nau Nesethajauhuhau, gaujenanavanau henayauthaude vadanese? hāthauhuk. <sup>4</sup> Nau haedādaunaugunauau. Nau hanaāedanaunith nau haenayauha, nau haejenana; <sup>5</sup> Nau haeauchuhananadetha, Hanaa hedauneau



naugauchaudahehau wauāth waugaje janesenayaugaune hadaudau-  
 naudene, nau gauchaunu gauhadnauuguthauva vadanese?  
 hathauhuk. <sup>6</sup> Nau haeyauhuune nesenehathauthee jea nuu hayauhuhau.  
<sup>7</sup> Nau haedadajenehetha henee hathāadethavathee, hāenauhauwaude  
 hasayāchauhauwunethe najatheaugudaunau; hanaāēdauwunaude, <sup>8</sup> Hāene  
 nananena hadethaunā henanenauau gauwuhaudeneagu, jevajanauguu  
 najatheaugudaunaa; havajavaānethā henane havajavaāheva henee  
 hadethade; <sup>9</sup> Nau henee hadethāde nau nananede hadjaude nau  
 hadnethāne, Venene naa henane hadehedaugu; nau nananene haddayāhene  
 janaugunenagu hesaudavaa. <sup>10</sup> Hau hāene nananene hadethanenagu,  
 haddeyehau nau hadjanaugu hesaudavaa henee hāene hadethāde hadjaude,  
 hadethāne, Va javesa; hadnaāene nananene vechauthānaune henee  
 hanethevethehevādaunauau. <sup>11</sup> Hanau daun nanajathajaude nehayau  
 hadnausādaude; nau henee nausādaunauadede nehayau hadnajanede.  
<sup>12</sup> Hanaāenehethaude jea henee hadethādaune, Hāene nananene gauuseva-  
 nenagu wauāthe hethunevethehevanenagu, jevaadesene hādaehauhauau,  
 wauāthe hāthesaunauau, daudause hādauānauau, wauāthe nethauyādahagu  
 hanedaudewau; havaadethaa jea, nau havaaunaudaunā. <sup>13</sup> Hau hāene  
 nananene vethehevanenagu, hadadethaunauau hadavenuhuhauau,  
 henesenehehauau, jeneejavesahehauau, nanenauguhuhauau; <sup>14</sup> Nau  
 nananene hadnauwunaunane; hanau daujeneaunaudaunānaune: hanau  
 nananene hadnaunaudaunane jaegauhadeneneagu hathāethadee. <sup>15</sup> Hāene  
 hanesāde henee henethevethehevādaune daunedauwaudauwunith nuu  
 hayauhuhau, Hauwunaunade henee hadvethee jauaujau henajanaunene  
 Hejavaneauthu, hathāhuk. <sup>16</sup> Hanaāēdauwunaude, jasaa henane  
 haeavathethunevetheheva, nau haeauwuhadethānanena; <sup>17</sup> Nau haejenana  
 hewauwaune dauethunevethehedane hadnāedauwunaunith henee  
 hadethavathee, Jenajesaa; vahee hayauhuhau wauwu hanesejenanee.  
<sup>18</sup> Nau vahee haenesadene hathauchuwhadethee hadnudanathee.  
 Nandedauwauaude hasenehethauhuk, Neaudaunaudauwau vedauauwuu,  
 nau hadneyehaunau nau hadnauhaudauwau: Nehethathane  
 hadnudanene. <sup>19</sup> Nau jasaa ahagu, Neaudaunauthu yauthauyauna  
 hedauhuwaugaje, nau hadneyehaunau hadnayāduuhuu: nenehethathane  
 hadnudanene. <sup>20</sup> Nau jasaa hahagu, hedauwunenenu, nau naajenee-  
 jaunau. <sup>21</sup> Hanaāējenauusade henee wauwau, nau hanaāēnauhauthe-  
 hadāhewaunādaune nuu hayauhuhau. Wauhā hechauhauthethāhe  
 hauauwuu hanaāasenaunade hanaāēdauwunaude hewauwaune, Yegauhu  
 nauhauhaunee hadaugauchaudāe nau hadaugauchane hedane,  
 nau hadjāthaunauau hede hathāadavenuhunethee, nau henesenehehauau,  
 nau jeneejavesahehauau, nau nanenauguhuhauau. <sup>22</sup> Nau wauwau  
 hasenehethauhuk, Vahadāhene, naasedaunau hasenehesene nau nausu-  
 nauthauyauau, hathāhuk. <sup>23</sup> Nau Vahadāhede haeāedauwuna wauwaune,  
 Yehau hathenavaunaa nau nethauchayaunaa nau hadjādasauaunaunauau  
 hadejejedāthee, henee naudauauwuu hadeechaunaana. <sup>24</sup> Hanau  
 nāedauwunathane, henee hegau hena henanenauau neadethathee hadne-  
 hauwuvajadauwu nadethunevethehewau. <sup>25</sup> Nau hena haenethaunau  
 havathenedanede: nau hanaāējaaagude, nau hanaāēdauwunaude, <sup>26</sup> Hith  
 daun henane hedaānau, hau jasānauwauhuk henesaunaune, nau henaune,  
 nau henene, nau dāeyaunauau, nau henethesaunau, nau hedaāwau, haa nau  
 nehayau hedenadede jea, nāhauwuneethauguhaa. <sup>27</sup> Nau daun janenevaa  
 henaugauchu, nau thauguhānau, nāhauwuneethauguhaa. <sup>28</sup> Hanaa  
 nananena vanadaunasedede hayauauwun gauhadjejanaugu nedauau

hadnayādede hadaachuunee, wauau hanaadauchanenee hesehenee? <sup>29</sup> Havaene hesejenanauhuk hauunauganau, nau hanājeneesedede, vahee henee hathāenauhau dauau hadneevavavayaundenenee. <sup>30</sup> Naa henane nenesedede, hau hajeneesedede, hanāthāde. <sup>31</sup> Wauāthe daun naja, vadauvauthauhuk jachau najane, hanājanaugude nedauau, nau hanāgaugauanadauau wauau haneene nauguu vadadauchu vasevadadausauau hadnenuchaunaude henee hejevenahedaunau nauguu nesauau vasevadadausauau? <sup>32</sup> Wauāthe, hajesenausujechaugunethe, hanāyethautheavede, nau hanānayāthenedauāwaunaude. <sup>33</sup> Nau naasauau, daun nananena henee janenaunaudauau vahee henetheyaunau, nāhauwuneethauguhāa. <sup>34</sup> Nejauauwuu hethadee: hau hith nejauauwuu jevanujaudāgu, hayew hadneenejauauwujauau? <sup>35</sup> Daudause hehauwuuthade vedauauwuu, wauāthe hee vehethe; hau henanenauau hanāneāgudede. Daun henaudaununedede heenedauvahek jaathede.

## 15

<sup>1</sup> Hanaāeuchaunāde vahee hauāyāhehau nau wauwauchudauhuhau hee hadjaathehāde. <sup>2</sup> Nau Nesethajauhuhau nau Wauthaunauhāhehau haeneneedenenau, Naa henane hanesedanaude wauwauchudauhuhau, nau nanethevethewauau, hathāhuk. <sup>3</sup> Nau haeauthaunanadetha, hasenehethauhuk, <sup>4</sup> Hanaa henane nananena hedaunede vadadausauau jauaunawaudā, hith hanauhauhuk hanesahenith, gauhadnautha theaudausauau nau theaudaachunee nauaunee, nau gauhadnaudeha henee naunethauaunith gauhaunaude hadveeha? <sup>5</sup> Nau hāeveehauthe hadthāegauhaude hejaanaunaa, hadneneethajauau. <sup>6</sup> Nau hāenauajegauhuthe, hadnadethauau hauānee henedaehauhau nau henedaudevādaunau, netheneethajaudauwunee hanau daujaveehauau naudauāve ne-naunethauaude, hathauhuk. <sup>7</sup> Nananenau hāedauwunathana, nuu hadnaasauau neethajauau hayāene hāene hanesāde wauwauchuduhu haunaunevethajauhuk javaānee theaudausauau nau theaudaachunee hathauwunane janenethenauau haunevethajauau. <sup>8</sup> Daudause daun hesā nethenauaugu vadadauchu gauneevāejethā, hith hanadehuk hanesadenee gaunee, gauhadjedeauchauau nauauuthayau, nau gauhadwaudeau hauauwuu, nau gauhadvavesenaude haunaude gauhadveede. <sup>9</sup> Nau daun hāeveenuu hanadethauau henedaehauhau, nau henedaudevādaunau hauānee netheneethajauauwuu, hanau daujaeveenauwau hanesadee nāanathau, hanāthau. <sup>10</sup> Naasauau, Nananenau nāedauwunathana, haneduu neethajauau hathāhethe hautheaunauau Hejavaneauthu hanesāde wauwauchuduhu haunaunevethajauhuk. <sup>11</sup> Nau hasenehehuk, jāsaa henane neseyaugaune heuhau: <sup>12</sup> Nau hajauchaugade haenehetha henesaunaune, Nāchau jevene gauuu vatheyauau henee nāudnedadahedaunau. Nau hanaāgauvenaude hethāenetheyaunau. <sup>13</sup> Nau haunauauhaejewauthanenau hese hajauchaugade hāesauānauau vahee hauānee, nauhanaāejathāude hese vavāaune vedauauwuu, nau hena hanaāevadauthedede hethāenetheyaunau hee hauhaugānenaedede. <sup>14</sup> Nau hāevathedede vahee, hena haanaāenauauchauau naunauthauau hasenaude hena vedauauwuu; nau hanaāadavenuhunedede. <sup>15</sup> Nau hanaāeyehauau nau hanaāewauhaunesade nehayau hauwauhauauwunanenau henee vedauauwuu; nau haejenanaa hethauauwuu hadnauchauwaude neauthuwauchu. <sup>16</sup> Nau hanāneanadauau hanāchauchaunaude henaude hee jeyauwaunau henee neauthuwauchu hevethedaunenenu: hau hegau henanene hevenaa. <sup>17</sup> Nau hāenaude hanaāenehede, Waunauthanethe

hedautheaunau nāsaunau nenethenauau jauaujaunau naenedauchanenee nau nejeesesanenee, hau hadnenadaugauyānau? <sup>18</sup> Hadgauhānau nau hadeyehaunau nāsaunau, nau hadnaasenehethauau, Nāchau, nananenau nanethenauwau wauchudaude hese hayāene, nau yese nananene, <sup>19</sup> Nau nananenau hegau hee hāhauwautheāve: jeneshe waude haudautheaunauau. <sup>20</sup> Nau hanaāegauhāde, nau hanaāedauchaude henesaunaune. Hau hajesejedauchaude, henesaunaune haenauhauvaa, nau haeauwunaana, nau haeyeseneegau, nau haenaethesaunaunagutha, nau haenedana. <sup>21</sup> Nau heau hathāhuk, Nāchau, nananenau nanethenauwau wauchudaude yese hayāene, nau nananene, nau nananenau hegau hāhauwautheneeāve. <sup>22</sup> Hau henesaunaune hathauyau-gaune hedautheaunene, Jādee chaunauguuthadee hu, nau hauyauunaa; nau thānauwunaa nechaunathathau hejadena, nau jedauaunena: <sup>23</sup> Nau hadjāthauva hede daun gauchujāde wauuu, nau hadnauauva; nau hadvethenauau, nau hadeaunauwuthajaunauau: <sup>24</sup> Hanau naa nāa nenajaa, nau jaenaedede; nenaunethauaude, nau jaeveenade; nau hanaāejasesaunauwuthajauthee: <sup>25</sup> Wauhā vanachauganith heau haenedaune nauau: nau daunausujaude nau hāyānauusade hedauauwunenau, haenedauwaude haenevaudenene nau haevadaudenene. <sup>26</sup> Nau haeadetha hanesānith haunauaheau, nau haenaudedana dusedaudene hathauhuk. <sup>27</sup> Nau haeāedauwunaa, Nananene hahavaa nauusade; nau nananene hāsaunau naunauaude gauchujānith wauuu, hanau daujaesedanaude nanethauaunee. <sup>28</sup> Nau haeasenauna, nau haejejedā: hanaāejenuahenith henesaunaune, nau haedadadasevaa. <sup>29</sup> Nau haeauchuhananadetha henesaunaune, Naune, nuu hawauthāe jajenee hānesedaunathadenau, daudause hāhauwujethauwaudaunathe hanāene hanathauchuwuhunaune: hau haunauau nananene hāhauwuthauuvene haudāsau, henee hanānesedenau haunauwuthajaude nauguu nādaehauhauau: <sup>30</sup> Hau chauchaunu hasenauusade naa hāa, hāgaujauauthedaunādaunau hāheenaededanaunau hee henesahehau hesānau, nananene hanadaunaude gauchujānith wauuu. <sup>31</sup> Nau hanaāēdauwunaude, nā, nananene nanethenaedevene, nau vahee henee nāthāenethyaunau nanehanāhene. <sup>32</sup> Dauudasadee henee haneenesehē haunauwuthajaude, nau hadneethajaunee: hee naa hahavaa denajaa, nau jaenaedede; nau denaunethauaude, nau jaeveenade.

## 16

<sup>1</sup> Nau hanaāēdauwunaude jea hethauguhādaunau, hena jasaa haenethauyādā henane, haenethena hadāhevahew; nau haenanene haeauthauwuvaa henee daunethauyādauchudede hevatheyaunau. <sup>2</sup> Nau haeadetha, nau hanaāenaudedanaude, Duthanee henee daunedaunathane nananene? nayāde hādāhevadenau hanau nananene hadnehauwuguthadāheva. <sup>3</sup> Hadāhevāhe, Hewauau hauaudnesedaunaune? hasethaujauhuk, hanau navahadāhewaunāde haedanauwunānau nadadāhewau: hajeneenauchauhānau; thaununedauwuhunenau. <sup>4</sup> Haenauwau hadnesedaunau, henee hāenudanānaune hadāhewaude hadjedanethee hedauauwunenau. <sup>5</sup> Hanaāadethaude haunauude hadāhewaunādaune hethāesayānedanaunādaunene, nau hanaāēdauwunaude nanaudauwunānith, Dauhudauchanau hasayānedanaunādaunau nananene nadāhewaunāde? <sup>6</sup> Nau hāheyaugaune vadadausauau dejenauhuu javeda. Nau hanaāēdauwunaude Hedana hawauthaunauha, nau janaugu nauhauhaunee, nau hadwauthaunau yauthauyauau. <sup>7</sup> Hanaāēdauwunaude jachau, nau dauhudauchanau hasayānedayaunau

nananene? Nau hanaāēdauwunāde, Vadadausauau dejenauhunee thauauhanewauchuunau. Nau hanaāēdauwunaude, Hedana u hauhauthaunauha, nau hadwauthaunau nasaudausauau. <sup>8</sup> Nau vahadāde haevaveenethedauna janechuvāhenith hadāhevahew, hanau dauhaenauau hasedaude: hanau dāeyaunauauau nuu hathāauauvaa hedenaededaunenau hāenuu javaānee hesenedāeyaunauauau. <sup>9</sup> Nau nananenau hāedauwunathana nesedee nehayau henedaehāvadede heee nethauyādahede hehauwuthade; henee hāejenenaedenā hadeesedanāna nedaujethauujenenaededaunenee. <sup>10</sup> Henane henee chaunuvāde heee haugajuhuyāgu haneechuvāde jea vasee: nau henane henee janechuvāde vanehaa hehauwuuchuvā jea vanasaunee. <sup>11</sup> Hith naaheene nananena jechuvahena hāhauwuuthaheva nethauyādahede hanaa hadvenāde nananene hadanethaude hethauwuu veaunauaude? <sup>12</sup> Nau hith nananena hejchuvahenagu heee henehanahede jasaa henane hanaa hadvenāde nananena henee hanehanahede. <sup>13</sup> Hegau nesethāhe hehauwunee nesedauna hanesenethe hechauhauthethāhehau: jachau hanāasānauwaude hanesāhenith, nau hanāvechauthaude jachau; wauāthe hanādudevede hanesānith, nau hanāthauchaunauhauwaude jachau. Nananena hāhauwunee nesedaunauva Hejavaneauthau nau nethauyādahehehauau. <sup>14</sup> Nau Nesethajauhuhauau jea, haevenauwu vāejethā, haenedauwaudaudu vahee nuu hayauhuhau: nau haechaudanavanauau. <sup>15</sup> Nau hanaāēdauwunaude nananena nethadee hasehadenā hathaāhethee henanenauau; hau Hejavaneauthau naenauau hadahenau: hanau henee nechauguanavadethee henanedaa newauchanavathee hathaāhenethe Hejavaneauthu. <sup>16</sup> Nanavaavedaunau nau haeyāhehauau haunaude nauuu Jaun: heee hena henajanede Hejavaneauthau deheauthedaunee, nau haunauude henanenauau neheeneethenadethee. <sup>17</sup> Nau hehauwunauthau hejavaa nau vedauauwuu heyauhuāgaune javaānee hanesadee haugajuhuu nanavaavede hadneeyauhuu. <sup>18</sup> Daun hausānaude henene, nau heneyaugu gauchuhunee, wauchudaudehaugauthenenede: nau daun hausāyaune nanewaude wauchudaude. <sup>19</sup> Hena jasaa nethauyāsenane, haeneenu haevējayaunenau nau haegaugunesaunenau, nau haeneechauna hadauchenenee: <sup>20</sup> Nau hena jasaa nedauwuhu Lazarus haseagu, haesaese hedajanaunaa haevahaseva, <sup>21</sup> Haevadauugaudaude heee jeyauwaunau nejanesanenee hehethee nethauyāsenanene hevethededaunene: jea hathave haedasaa nau haenenesaudauwu hedgesaunau. <sup>22</sup> Nau hethauwuu, henee nedauwuhu haenaja, nau haenauaunechauhaa hauthaunau yesee Abraham haenedauguva: nethauyāsenane jea haenaje, nau haejenanau; <sup>23</sup> Nau hadauveeyaunee haeejenāauguau, haedaudu wuthajau, nau haenauhauva Abraham vavāaune, nau Lazarus haenedauguvane. <sup>24</sup> Nau haeneduva nau hathauhuk, Nāchau Abraham, jeauwunaune, nau jeautheavene Lazarus, henee hadejegunauhade naunauchuu hejadenaa najee, nau hadedauyauvanauau nāthaune; hanau nananenau hanavachuunau nuu hesedaa. <sup>25</sup> Hau Abraham hahagu, Nā, hāenau henee nananene deenaedene neesedanauwu neethadee hayauhuhau, nau neesaunee Lazarus neewausaunee hayauhuhau, hau hewaunehaa hauhauthenaedede, hau nananene naunauchauthenaedene. <sup>26</sup> Nau jea vahee nuu, nahethāe nananee nau nananene haneduu vanasauau vanethaunauau janenenee: hadnejenehedechaunenee hehethee hede hese nananene hehauwunee; daudause hehauwunee jeauchenauau hadaunee, henee nevadaujauthee hehethee hethaa. <sup>27</sup> Hanaāenehethaude, Vanevethedaunathane hena heee, Nāchau, henee nananene hadejejenanaude nāsaunau hedauauwuu: <sup>28</sup> Hanau yaunauthaunethee nauhauwauauau henee hadeēdauwunaude,

jea havajaunenau nuu haduu naunauchauthauau. <sup>29</sup> Abraham hanaāēdauwunaude nanethenauthee Mosaseau nau haeyāhehau; jaathehaunauha. <sup>30</sup> Nau, hegau, nāchau Abraham: hau hith hanesāde jaeyehauhuk hehethee degaujauaudāde, haunaunaunevethajauthee, hathāhuk. <sup>31</sup> Nau hanaāēdauwunāde, Hith jenedaunauhaugaanee Mosaseau nau haeyāhehau, daudause hāhauwuneenadauwaunauau, daudause hanesāhenethe jaegauhāyaugaune hehethee degaujauaudāhenith.

## 17

<sup>1</sup> Hanaāēdauwunaude hethauguhādaunau, Hāhauwuneene hau henee dauusenadenau hadnauaichuu: hau naunauthauau hadnauauchaude daunjaunaude. <sup>2</sup> Hanāneene henee thauayānuunaugane henauānauyaugu, nau seāguthadagu hadaje, hauhanāheejegaudauvāhenethe henee haneedauusenanelthe jachau nuu hajasedāeyaunauau. <sup>3</sup> Haunauyauhaudauwauau nehayau nananena: Hith hahavaenau havawauchuhāva, hadanadethauva; nau hith haunaunevethajauhuk, hadjaegudanauwunauva. <sup>4</sup> Nau hith wauwauchuhānagu nesaudauchu hajeseseneene, nau nesaudauchu hajeseseneene naujaeyethaagudaunānagu, haunaunaunevethajaunau, hethānagu: nananena hadjaegudanauwunauva. <sup>5</sup> Nau vadauhanauau, Vahadāhene, hethedaunanauwunāa hethauwaudaudenede, hathauhaugaanee. <sup>6</sup> Nau Vahadāhenith hathāhaugaanee, Hith nananena hethauwaudauwunagu hethāee hethāuu mausdaude jenayaunau, nananena hanāna nuu segaumau hunauhaudene, Hanāgauchauhana hethājee, nau hanājenanauna hadajee; nau hanāthauwaudaunāna. <sup>7</sup> Hau hanaa nananena, hanāwauwaunavede hanāthauauauwujethānith wauāthe hananajauānith, hanāthauna waunee hāenauusathe hehethee nauau, Najese nau hadjanaugu nau hadvethe? <sup>8</sup> Hau hanājenaasenehethauna, Hesetheva nayaudenee hadnevethenau, nau duujehe nehayau, nau hadjeenechaudaune haunaude hesevethenauagu nau hesaveyānaugu; nau heauhauwune jenaevethene nau hadevaveyā? <sup>9</sup> Gauhadvaveene henee wauwau hanau dauhunaasedaude henee hanasenehethāthe? Haunauchāe hegau. <sup>10</sup> Naathahena, hāene nananena vahesedaunagu hena hayauhuhau hathauchuwuhana, Hāhauwuneejavaājasethānau wauwaunauau; vavade nanesedaunauau hadnesedaunuu, hadeva. <sup>11</sup> Nau hethauwuu, daunsausuyehaude Dādaunedan, haehedesa nahethāe Samaria nau Gananee. <sup>12</sup> Nau hāewaudasade jasaa hauauwudan, haenuchaunaa vadadauchu henanenau haenaujaune hedaugauwudaunenau, haetheaugunenau vavāaune: <sup>13</sup> Nau haeneduvanauau, nau hanaāenehethauthee, Hejavaneauthusau, Hecauhauthethāhe,\* jeauwunauāa. <sup>14</sup> Nau hāenauhauwaude hanaāēdauwunaude, Waunenauhauthehaa hadanayaunenau vevethahevahehauau. Nau hethauwuu, henee daunsausuyehauthee, haejegaudauvāhenauau. <sup>15</sup> Nau hanesāde, hāenauhauwunau henee dauunayauhade, haejaaagu, nau haevaseenehe dauvaveenethedaunaude Hejavaneauthu, <sup>16</sup> Nau haeuāneseve heauthene, haevaveenethedauna: nau haenaadāde Samaritan. <sup>17</sup> Nau Hejavaneauthusaun haeauchuhananadethā, gaujenayauhaunauau vadadauchu? hau daude theaudauchu? <sup>18</sup> Hajenauhauvathee hajejaeyehauthee hadvaveenethedaunauthee Hejavaneauthu, vavade naa henewauuhu. <sup>19</sup> Nau haeēdauwuna, Gauhā, najesa: nananene hadethauwaudaude henayauhāne. <sup>20</sup> Nau hāenaudedaunāde Nesethajauhuhau, daun henajanedauunene Hejavaneauthu

\* **17:13** Missing “h” in “Hec(h)auhauthethāhe” (“Master”).

hadneenauauchaunee, Haeāedauwuna, Henajanede Hejavaneauthau hadnehauwunauauchaune nausujauwuwuhadagu: <sup>21</sup> Dause hehedauneagu, Nauhaudauwuu hede, wauāthe, nauhaudauwuu hena, hanau, naune, henajanede Hejavaneauthau thanāsadena, <sup>22</sup> Nau hanaāedauwunaude hethauguhādaunau, Hese hadnauaichuu, hāene nananena vadaunauhaudauwunā jasae hese Heau henane, nau hadnehauwunauhaudava. <sup>23</sup> Nau hadnanethāna, Nauhaudau hede; wauāthe nauhaudau hena; jevayehauau, wauāthe jevathaughaa, <sup>24</sup> Waude hasauau jahagude, henee naunauasānauu hehethee naugauthanee naugauauwuu hejavaa neenauasādaa jasaa naugauthanee naugauauwuu hejavaa; hadnaasauau jea Heau henane hadnaasaunee hedeseve. <sup>25</sup> Hau nedauau hadnanasenedauau wauthanee, nau hadnausāguthade nuu henaedede. <sup>26</sup> Nau waudeneesaunee deenaedede Noe, hadnaasaunee jea hedeseve Heau henane. <sup>27</sup> Neauwauthethehedaune, neauwauthevaveyandenee, neauwauthenedaunee, neenenehathee, haunaude nauuu henee Noe dejedāde havathee thewaunaa, nau haenaāenadauwauau, nau haenauauhā vahee. <sup>28</sup> Waudenaasauau jea deenaedede Lot; neauwauthethehedaunee, neauwauthevaveyandenee, neauwauthaundaunandenee, neheaudaunaudenee hayauhuhau, neauwauthenayandenee, neauauvadenee; <sup>29</sup> Hau hajesesenee henee Lot haenaude Sodom haeesedanausauau nau haegauhauchanauauhaunauganaunee hehethee hejavaa, nau haenauauhā vahee. <sup>30</sup> Hadnaasauau hese hāene Heau henane hāenauhauthethāthe. <sup>31</sup> Henee hese, hāanedauthe dasee hauauwuu, nau hevathayaunau jedauwuu hauauwuu, nanehajejeauwusade hadejedanaunee: nau henee hanedaude nauau, nanehajejeaunee. <sup>32</sup> Dauyuuwuu Lot henene. <sup>33</sup> Daun vanadaunayandede hedenaedede hadnanadede; nau daun hadnanadede hedenaedede hadnenayandede. <sup>34</sup> Nananenau nāedauwunathana, henee veeyaugu hadnesethee henanenauau hanesandenee hauau; hanesāde hadnedanade, nau jasaa hadnathauaude, <sup>35</sup> Hanesethee hesānaunee hadthauayāthee wauhaunee; hanesāde hadnedanade, nau jasaa hadnathauaude. <sup>36</sup> Hanesethee henanenauau hadnanedauthee nauau; hanesāde hadnedanade nau jasaa hadnathauaude. <sup>37</sup> Nau haeauthananadethanaunee, Daude, Vahadāhene? Nau haeāedauwunā haduu vadanayau, hanaadauhauāneauhuthee neahehauau hauānee.

## 18

<sup>1</sup> Nau haeandetha hauthaunauhānee nuu hee, hena henane hāvachudajauaunevevetha, nau hājethauujesevenauau; <sup>2</sup> Hahagu haeandau hadan hauchuwunane, haejesa Hejavaneauthu, dause hathauwunanenau: <sup>3</sup> Nau haeandau henevesā hena hadan; nau haejedasa, Jeaugaunayewhu naujauthavaa, hathauhuk. <sup>4</sup> Nau haejevadaunaasedau: hau waunee hasethajauhuk, hewauāthe nejechauau Hejavaneauthu, nau hathauwunanenau; <sup>5</sup> Hau nausunee hanau naa henevesā hajanauchuhānaunee, hadenayauhauau havaedajauaunejau navanadauchuhaa. <sup>6</sup> Nau Vahadāde hasenehuk, Jaathehaa hasenehede janechuvāhede hauchuwunane. <sup>7</sup> Nau gauhujavaneauthu gauhadnenayauha nehayau hanayāsanaunee, hauwauaundaunādaunee hese nau dajāee, hau negudauchuhaude? <sup>8</sup> Nananenau nananena nāedauwunathana henee hadnauchuhanenayauhaude, Hau hāejauthe Heau henane, gauhadveede hethauwauaude nuu hathāauauvaa. <sup>9</sup> Nau haeauthananadetha jachau nethauwauaunadenethe nehayau henee dauchuvahethee, nau newauchānauwuthee hauthauau: <sup>10</sup> Hanesethee

henanenauau haeyehaunauau vevethahenauauwuu hadvevethahethee; hanesāde Nesethajuhu, nau jasaa hauāyāhe. <sup>11</sup> Nesethajuhu haetheaugu nau haevevetha waude hee nehayau, Hejavaneauthau, nananenau vaveenethedaunathane, henee nāhauwunaathā hauthauau henanenauau hathahethee, hedanauwuyāhehauau, janechuvahethee, jatheaudauwuyāhehauau, daudause naa hathāde hauāyāhe. <sup>12</sup> Nananenau nenaugauyānau nese hanesadee hauchauvadede, Nevānau vadadauchu vahee henee nāthāenetheyaunau. <sup>13</sup> Nau hauāyāhe haetheaugu vavāaune, daudause haejejenāauguau hejavaa, hau haeanadesejāhede, Hejavaneauthau jeauwunaune wauchudaunau, hathauhuk. <sup>14</sup> Nananenau nāedauwunathana, naa henane haejaeyehau hedauauwuu haeauwunaunau haejavaāhe jachau: hanau dathājee hanesāde henee nevadaujavaānajanethee nehayau hadnauwujenanade; nau henee nenehanethaunadede hadnejanade. <sup>15</sup> Nau haejādaunanauau jea hajasedāeyaunauau, hadnevasanaude; hau hānauhaudauwunethe hethauguhādaunau, haeneneuvanauau. <sup>16</sup> Hau Hejavaneauthusau haeadetha, nau hahagu, Nanehajauthee hajasedāeyaunauauau, nau jevadauduvaa: naathāhenethe henehanahedaunau henajanede Hejavaneauthau. <sup>17</sup> Hethauwuu nāedauwunathana, Daun hadjesedanauau henajandedaunene Hejavaneauthu hasenaedenethe hajasedāeyaunauau hadnehauwuneejedā. <sup>18</sup> Nau jachau hauchuwunanene haenaudedanaa, Hethāhene Hechauhauthethāhe, nauddusedau hadnedanauwau jethauujenenaedede? hathauhuk. <sup>19</sup> Nau Hejavaneauthsaun\* haeāedauwunaa, Naudu hethāde haesene? henaneda hehauwuthā, vavade hanesāde, nananede, Hejavaneauthau. <sup>20</sup> Nananene haenauwu nanavaavedaunau, Jevawauchudauau hee haugauthenenede, Jevanaa, Jevaaveda, Jevajayaudauwāedauwauthadee, Vechauchune nananene hāsaunau nau hānau. <sup>21</sup> Nau hanaānehede, Vahee nuu haunaunedenau hee daujeeseaunau. <sup>22</sup> Wauhā Hejavaneauthusau hānedauwaudauau nuu, Hanaāedauwunaude, Hanesadee hāhauwusenethene: Vaheaudauna henee hāthāenetheyaunau, nau hadjaanauwunaunauau hadavenuhuhauau, nau nananene hadnethenauwu haenathau hejavaa, nau hadejau hadjethaugu. <sup>23</sup> Nau hānedauwaudauau nuu, haeaudauwuthajau: hanau deethauwunethauyā dāde. <sup>24</sup> Nau Hejavaneauthausaun hānauhaudauwunith henee dauaudauwuthajau, Duthāenanauthaune henee nanethenuu veaunauaude hadnesejedāthee henajandedaunene Hejavaneauthu, hathauhuk. <sup>25</sup> Hanau hehauwujajathaune hee camel hehedesahagaunee hajasevāhau nedaudaunaudenee, javaāneenauthaunee nethauyāsenane hadnesejedāde henajandedaunene Hejavaneauthu. <sup>26</sup> Nau hathāenedauwauduu, Hanaa hadnenanedanede? hahagaunee. <sup>27</sup> Nau hanaānehenith, hayauhuhau hejethauuneethaunenau henanenauau neneededede Hejavaneauthau. <sup>28</sup> Hanaānehede Peda, Naune, naunaudauwunauau vahee, nau thaunauguhane. <sup>29</sup> Nau haeāedauwuna, Hethauwuu nāedauwunathana, hena haunauude henane henee hehauwunaude hedauauwuu, wauāthe henehā, wauāthe henauhauwauau, wauāthe henene wauāthe henesaunau, hee henajandedaunene Hejavaneauthu henedaenedaunene, <sup>30</sup> Nananede hadjavaānesedanauau nuu hewaunehaa, nau hathāauuvaa hadnauusanauau henaedede hadnejethauuvadauauau. <sup>31</sup> Hanaāedanaude nesenee, nau hanaāedauwunaude, Naune, hadneyehaunauau Dādaunedan, nau vahee hayauhuhau hathāewauthaunauhuu haeyāhehauau hee Heau

\* **18:19** Missing letter “u” in “Hejavaneauth(u)saun”, which often appears (as does “Hejavaneauthusau”) where we would find the name “Jesus” in the KJV.

henane hethauwunauauchauau. <sup>32</sup> Hanau hadvenavathe Neauthu, nau hadvavavanauchuhāde, nau hadnaunaunauchaudauchuhāde, nau hadneguthahayauthāde. <sup>33</sup> Nau hadnenesegauhude, nau hadnaāde: nau nasese hadnaājeagauhāde. <sup>34</sup> Nau haejaenauwu nuu: nau nuu hauthedau haeyaudaunaunauau, daudause haejaenauwu hathauthedaunāthee. <sup>35</sup> Nau hethauwuu, hāyāedadauau Jericho, jasaa haenanenaugu henane haetheaugu nedechaudenenee dauhunedauwaude: <sup>36</sup> Nau haenedauwaude henanedanede dadavechaudenenee, haenaudedauva haesedaudenenee. <sup>37</sup> Nau haeāedauwunau, henee Jesus Nazareth hanehedeade. <sup>38</sup> Nau hanaāevasanade, Hejavaneauthusau, nananene Heau David, jeauwunaune, hathauhuk. <sup>39</sup> Nau henee nanedauvathee haeneneuvanauau haddādaunaugunith: hau haevasanade haugauthe, Nananene Heau David, jeauwunaune. <sup>40</sup> Nau Hejavaneauthusau haedauusa, nau haeautheave hadjādaunade: nau hāyājenauusanith, haenaudedauva, <sup>41</sup> Hauddusehathe henee hadenaasehathane? hathauhuk. Nau hanaāēdauwunaude, Vahadāhene, nanaa hadeesedanauwau nauhaudauwaude. <sup>42</sup> Nau Hejavaneauthusau haenehetha, hanesedanauwu nananene nauhaudauwaude: hadethauwaudaude henayauhāne. <sup>43</sup> Nau chauchaunu haeesedane henauhaudauwaude, nau haethauguha, haevaveenethedauna Hejavaneauthu: nau vahee henanedanede, hāenauhauduu, haevaveenethedaunanauau Hejavaneauthu.

## 19

<sup>1</sup> Nau Hejavaneauthusau haewaudasa nau haechaugusa Jericho. <sup>2</sup> Nau, naune, haenedau henane Zacchaeus haseagu, haenajawauna hauyāhehau, nau haeveaunauau. <sup>3</sup> Nau haeneenavadaunauhauva Hejavaneauthusaun haedāhenethe; nau haejeneene daunauthethenadedaunenee, hee daujaahede. <sup>4</sup> Nau haesayāgau, nau haenauahu sycamore hunauhaudee hadnauhauwaude: hanau hadnehedesanith. <sup>5</sup> Nau Hejavaneauthusau hājeedadauau, haejaāne, nau haenauhauva, nau hathauhuk, Zacchaeus, nauhauhuhu, nau jeauwusa, hanau nuu desenee hadnandedaunau haudauauwuu. <sup>6</sup> Nau haenauhuhu, nau haejeauwusa, nau haedasa nauuu neethajaude. <sup>7</sup> Nau hāenauhauvāhede, vahee haeneānaune, Henee hadneejādavenethe henanene henee wauwauchudauhu, hathāhuk. <sup>8</sup> Nau Zacchaeus haetheaugu, nau haeāedauwuna Vahadāhenith; Naune, Vahadāhene, vayaugauuu naudaununaunau vanenu hadavenuhanau; nau hith hedanavanaugu hayewhu hehethee daun henane hanājayaudauvāedauwauthauau, hanājavaāvenauau yāyaunee. <sup>9</sup> Nau Hejavaneauthusaun haeāedauwunaa, Nuu desenee henayauthāhe hedadauau nuu hauauwuu, hanau nechau haneāvāde Abrahamvene. <sup>10</sup> Hanau Heau henane nauusade hadnaudethāde nau hadnenayauhaude daun naunethauaunith. <sup>11</sup> Nau hajesenedauwauduu nuu hayauhuhau, haethedaunane nau haeauthaunauhānanadetha, hanau dauhuauchauau wauwu Dādaunedan, nau hanau daunauanaduu henee henajandedaunene Hejavaneauthu chauchaunu wauauhaadenauhauwu. <sup>12</sup> Hanaāenehede henaheee, Jasaa naja haehau vavāaune vedauauwuu hadnesedanauau hee nehayau najanede, nau hadjaejaude. <sup>13</sup> Nau haeadetha vadadauchu hewauwaunauwau, nau haejaanauwuna vadadausauna vāejethā, nau haeāedauwuna, Hadeaudaunava haunaude jaenauusanaugu. <sup>14</sup> Hau hauauwunanenau haesānavaa, nau haeyethautheavedaunene thauguu, Nāhauwuvadaunethenauva naa henane nāhauwuvadaunajawaunāva, hathāhuk. <sup>15</sup> Nau hethauwuu, henee hājeaenauusade, haeesedane najanede,



hanaāaichuwuhaude nuu wauwaunau hadnadethaude, hevenaunau vāejethā, henee hadnaenauau haedauchu dathājee henane haedauchu-javaājasedethe heee hedaunaunau. <sup>16</sup> Hanaāejenauusade nanedauvade, Vahadāhene, havāejethāwau javaājasedede vadadausauna vāejethā, hathāhuk. <sup>17</sup> Nau hanaāēdauwunaude, Hethadee, nananene hethāhene wauwau; hanau nananene nethauwaudauwu heee naugajuhuhuu hadnajawaudauwu vadadausauna hedan. <sup>18</sup> Nau naneseauwaude haejenauusa, Vahadāhene, havāejethāwau javaājasedethee yauthauyauna vāejethā, hathāhuk. <sup>19</sup> Nau vavade hanaasenehethaude, Hadnehanāhene yauthauyauna hedan jea. <sup>20</sup> Nau jasaa haejenauusa, Vahadāhene, Naune, heyewnau havāejethāwau, neaunaunedenau nejenanauwau hāheāhaunaa, hathāhuk: <sup>21</sup> Heee dauhusathane, hanau nananene daugaugaunauauwunanenene: nananene hedanau henee hājejenayaunau, nau hadegauuchu henee hājejenayaunau. <sup>22</sup> Nau haeēdauwuna, hehethee nehayau hadenaa hadaichuwuhathane, nananene hauhauganene wauwau. Haenauwu henee daugaugaunauauwunanenenu, hedanauwau henee nājejenayaunau, nau hadgauuchauwau henee nājejenayaunau: <sup>23</sup> Naudu gauhājevā navāejethāwau nedauhaenaevāejethā, henee hājejenayaunau hedeese danauwau nehayau javaānee? <sup>24</sup> Nau haeēdauwuna henee daunauthetheaugunethe, Hedanauwunaa vāejethā, nau hadevenau henee vadadauchuvāejethāvade. <sup>25</sup> (Nau hathāhuk, Vahadāhene, nanethenauau vadadauchuvāejethā.) <sup>26</sup> Hanau hāedauwunathane, Henee dathājee hanesāde nanethenauau hadnevenade; nau henee janejasedede, daudause henee henetheyaunau hadnedanauwunade. <sup>27</sup> Hau hena naujauthauwauau, henee najevedaunajawaunaunauau, hadjāthauva hede, nau hadnaunauauva hathaājenau. <sup>28</sup> Nau hāesanāsenehede nuu, haenedauva, haenauauhuyehaunauau Dādaunedan. <sup>29</sup> Nau hethauwuu, hāyānauusade Bethphage nau Bethany, hua Olives haseāgu, Haesayānautheava hanesenethe hethauguhādaunau. <sup>30</sup> Najesaa nananena hesee hajasee hauauwudan hathaāsana, hathauhuk; nanaa waudasanagu hadveehauna dātheveehauchavesau hadduguhude, hehauwuthauune henane dachaugu: hadaugunauva, nau hadjāchadauneva hede, hathauhuk. <sup>31</sup> Nau hith daun henane naudedanānagu, Naudu hauaugunauna hethānagu? hesau jenasenehethauna, hanau Vahadāde haddaununaude. <sup>32</sup> Nau henee hautheavathee hanaāejathāthee, nau haeveehanauau neesenehethaude. <sup>33</sup> Nau daunausunaugunauthee dātheveehauchavesaune, hedauneenith, Naudu haaugunauna dātheveehauchavesau? hathāhaugaunee, <sup>34</sup> Nau hanaāēdauwunauthee, Vahadāde haddaununaude. <sup>35</sup> Nau haenau-uchaudaunanauau Hejavaneauthusaun: nau haedadasanauwunanauau hedāchaunenau dasee dātheveehauchavesaun, nau haeaugaugunaunanauau Hejavaneauthusaun dasee. <sup>36</sup> Nau daunausuyehaude, haesasaunauwu hedāchaunenau vaunaa. <sup>37</sup> Nau hāyānauusade, wauwu haeauwusa hauanee Olives, haunauude hadaichude hethauguhādaunau hanaāaunauwuthajauthee nau haevaveenethedaunanauau Hejavaneauthu nauguu haevasānadedane heee vahee hathāenauthaunee henesethaunene henee henauhauthaunenau; <sup>38</sup> Haunauwuthajauau Naja henee jaunau heneneseede Vahadāhenith: danādaunauau hejavaa, nau vaveenethedauwuu javaājauudaa, hāheagu. <sup>39</sup> Nau hauthauau Nesethajauhuhau hehethee henanedaa, Hechauhauthethāhe, neuwune hāthauguhādaunauau, hathāhuk. <sup>40</sup> Nau haeauchuhanāedauwuna nau hasenehethauhuk, Nananenau nāedauwunathana henee, hith nuu dādaunaugagaunee, hauunauganauau chauchaunu hadneduhuthee. <sup>41</sup> Hau

hāayānausade, hāenauhaudauau hedan, nau haevewau, <sup>42</sup> Hanaānehede, hith heaenauwunagu, ha nananene, ha nuu hadeseve, hayauhuhau naathuu hadādaunahedaunaa, hau hewaunehaa yaunaudaunane hasesāe. <sup>43</sup> Hanau hese hadnedasāna henee haujauthauwauau hadnesedethee havathegauuha heee nananene, nau hadnechauchuaunāna nauanee, nau hadnaunaunehāna daudauna hehethee, <sup>44</sup> Nau hadnanaunauvaenāna, nau hadāeyaunewauau hanedauchaunawaunauau; nau hadnehauwunaudanauwunā hanesāhenith hauunaugane hanathaugunethe; hanau nananene daujaenauwu hāenauujādaunathana. <sup>45</sup> Nau hanaāeyehaude vadanedaunauauwuu, nau hanaāenudanaude henee neaudaunanethe jedauwuu, nau henee naudaunanethe; <sup>46</sup> Hanaāēdauwunaude, Wauthau-nauhuu, Naudauauwuu haneauauwunee hadnevevethahedaunee: hau nananena haesedena nedaunaudee heyāenau havedehauhau. <sup>47</sup> Nau haeautheda hayauwusenenee vadanedaunauauwuu. Hau najanauau vevethahevahehauau nau wauthaunauhāhehauau nau najavahehauau henanedanede haeneenanaudehaa hadnaāde, <sup>48</sup> Nau haeyauhuune nesenehāde hanau vahee henanedanede haenādevenenau dauhujaathehāde.

## 20

<sup>1</sup> Nau hethauwuu, henee jasia hena hese, denausunauthedade henanedanede vadanedaunauauwuu, nau haeauthedaude wau-nauyaunee hethadenee, najanauau vevethahevahehauau nau wauthaunauhāhehau haedasaa nauguu vachaugananenau, <sup>2</sup> Nau hanaāanadethauthee, Jeauthedaunāa, hayew hāenaudahede hāenesedaude nuu hayauhuhau? wauāthe hanaa henee havenāde nuu hāenaudahede? <sup>3</sup> Nau hanaāauchuhananāedauwunaude, Nechau hadnaudedauunathana hanesadee hayewhu; nau hadjeāedauwunewa: <sup>4</sup> Heedusaayāde Jaun, gauhuhuthaune hejavaa, wauāthe hehethee henanedaa? hathauhuk. <sup>5</sup> Nau haeeegaugaugauudenauau, hith hesauesenehethaunauaugu, hehethee hejavaa; hahagaunee, Naudu haejethauwaudaunauna? hanāthānauau. <sup>6</sup> Hau hethaunauaugu, hehethee henanedaa; Vahee henanedanede hanāedaudauauvānauau hauunaugāe, hanau hethauwaenaunauthee henee Jauneau dauhaeyānith. <sup>7</sup> Nau haeāedauwunanauau, daujeneauthedaunauthee daunathaunee. <sup>8</sup> Nau Hejavaneauthusau hanaāēdauwunaude, Dause gauhaudnauthedaunathava daun nāenaudahede nāenesedaude nuu hayauhuhau. <sup>9</sup> Hanaāejasesanadedauau henanedanede hee dajenehede; Jasia henane haejenane dadajevenevesenethauchayau, nau haehathauauauwujethāhehau, nau haejathāu hese vavāaune vedauauwuu haegudaunā. <sup>10</sup> Hāenauauchaunee haeyethautheava wauwaune hese thauauauwujethāhehau, henee hadjevenāde vevenaundenau hehethee dadajevenevesenethauchayaunaa: hau haenenesequuu, nau haejathethajenāhee jessaa. <sup>11</sup> Nau jea haeyethautheava jachau wauwaune; nau haenenesequhunauau jea, haedadayānauchuhanauau, nau haejathethajenāhee jessaa. <sup>12</sup> Nau jea haeyethautheave nanaseauwaunee: nau haenasenahanauau jea, nau haenuguthanauau. <sup>13</sup> Hanaānehede hadāhevāhe dadajevenevesaa, Hewauaujeesedaunaune? Hadautheawauau navechauthau nāa: Nauchāe hadeneehauthee hāenauhauwaunauthee. <sup>14</sup> Hau thauauauwujethāhehauau hāenauhauwauthee, haegaugaugauudenauau, Naa nananede hadvanehanāde: nahājauau hadenauaune, henee headevanehanahedaunau hadenehanahenauau. <sup>15</sup> Hanaāenuguthauthee dadajevenevesenethauchayaunaa, nau haenaanauau. Haudneduseha hadāhevāhe dadajevenevesenethauchayaunaa? <sup>16</sup> Hadejaude nau

hadnauauhaude nuu thauauauwujethāhehau, nau hadgauchuhuvāde dadajevenevesenethauchayau, hathauhuk, Nau hāenedauwauduu, hadne-hauwunaasau, hahagaunee. <sup>17</sup> Nau haenāauhauva, nau hanaāēdauwunaude, Dusau nuu henee wauthaunauhuu, Hauunauganau hauauvāhehauau hausāguthaunenau, hanānanenith hāhe hanadāde nedautheaunee? <sup>18</sup> Daun janesee dasee nuu hauunaugane hadthauusee, hau dasejaneseagu hanānauchauwuthauathāaunaude. <sup>19</sup> Nau najanauau vevethahehehauau nau wauthaunauhāhehauau chauchaunu haegaugauanavanauau hadnesedanauthee; nau haeedauwu henanedanede hee dauhāenuu henee dauhuanadede nuu dajenehede hee. <sup>20</sup> Nau haeauauyauhauvanauau, nau haeauthavanauau haunauyauhauthāhehau, hadnanadaunethānethe hadchuvāhevathe henanenau, henee hadnesedanauwunethe hedanadedau-nau, henee hadenauuchaudaunauthee hejadenenau nau naunaudāhenethe hauchuwunanene. <sup>21</sup> Nau haenaunaudedauanauau, Hechauhauthethāhe, haenaunee henee hasenehenaune nau nethauwuchauhauthethāne, daudause hāhauwujāvedaugauhauwaunauau henanedanauau hegau, hau hanechauhauthethāne hese Hejavaneauthu hethauwuu: <sup>22</sup> Gaunaasauau hee nananee hadnevenade hauāyaunau Caesar, gauwauāthe hegau? <sup>23</sup> Hau haeauenauwu henadaunedaunenenu, nau hanaāēdauwunaude, Naudu haevadauvasehena? <sup>24</sup> Jenauhauthehee vāejethāe. Hanaa hewauthaunenauaudene, nau hanaa hewauthaunauhanede? Haeauchuhanāedauwunauanauau, Caesar. <sup>25</sup> Nau hanaāēdauwunaude, Jauaunaudaunaa hee Caesar hayauhuhau henetheyaunau Caesar, nau Hejavaneauthu hayauhuhau henetheyaunau Hejavaneauthu. <sup>26</sup> Nau haejenesedanauwu hedanadedauunene hathaājedaunene henanedanede: nau haegaugauanadauwu hedauchuhanehedauunene, nau hanaāedādaunauguthee. <sup>27</sup> Hanaāejeedauchauthee jasae Sadducees, hayāthajauhuhau henee hadjejaegauhadenene: nau haenaudedauanauau, <sup>28</sup> Hechauhauthethāhe, Moses hathauthaunauwunānauau, Hith daun henane henauhauwauau gaujauaudāheyaugaune, heneneyaugaune, nau gaujauaudāheyaugaune jedāeyauneveyaugaune, henee henauhauwauau hanādanaude henenene, nau hanānesaunede hee henauhauwauau, hathauhaugaunee. <sup>29</sup> Hena hee haenesaudauchunauau henahavaevade-hehauau: nau jasaa nedauau haenenene, nau haenaja haejedāeyauneve. <sup>30</sup> Nau naneseauwaude haeneva, nau haenaja haejedāeyauneve. <sup>31</sup> Nau naneseauwaude haeneva; nau vavade hanaasene nanesaudauchauwaude jea, nau haejenauthanauau dāeyaunauau, nau haegaugauaudāhenauau. <sup>32</sup> Waunee vahee hesā haegaugauaudā jea. <sup>33</sup> Henaheee jaegauhadeneyāgu hanaane hadnevādaune? hee hanesaudauchunethe daunevāde. <sup>34</sup> Nau Hejavaneauthu haeauchuhanāedauwuna, dāeyaunauauau nuu hathāauauvaa nenevadedauunee, nau nenenehaudene: <sup>35</sup> Hau daun naunauguthee hadnenaededuu hena henaedede, nau jaegauhadeneyāgu hehethēe gaujauaudahede, hadnehauwunevadedauunee, hegau hadnenenehadedauunee: <sup>36</sup> Daudause hadnehauwauthenajadene: hadnaathahedaunee hauthau-nauau; nau hadnenesaunevāthee Hejavaneauthu, naathedāeyaunenedaunee jaegauhade. <sup>37</sup> Wauhā henee gaujauaudahehehauau hadjaegauhāthee, Moses denauhauthehade jauauadee, deadethāde Vahadāhenith Hejavaneauthu Abraham, nau Hejavaneauthu Isaac, nau Hejavaneauthu Jacob. <sup>38</sup> Hehauwujavaneauthune heyauhaudade, hau henaedede: hanau vahee haneenaededauunene. <sup>39</sup> Hanaāene jasaa wauthaunauhāhe haeauchuhananadetha, Hechauhauthethāhe. Nananene hethade hasenehene. <sup>40</sup> Nau hee haejauthenaudedauanauau. <sup>41</sup> Nau

hanaāēdauwunaude, Naudu haena hanee Chris Dāvid\* dauhuāwaude? 42 Nau Dāvid nehayau hasenehede wauthaunauhanaa Psalms,† Vahadāde hasenehethaude Navahadāhewaunādaune, Hadjejanaugudaune hejavesanee, 43 Haunaude nadeesehaunauau haujauthauwauau hadnedaugāaugunene. 44 Dāvid henaheee haeheenesea Vahadāhenith, dusee heau? 45 Nau vahee henanedanede haenedaunau hanaāēdauwunaude hethauguhādaunau, 46 Waudauau wauthaunauhāhehauau, neneanadu javesanee sauaunausāchaude, nau vechauduu jachauthadede nedauau-daunauvadedanenee, nau najatheaugudaunau vevethahenauauwuu, nau najanau nedaugunethe vanethehedaunenee; 47 Naudauvāe henevesānau hedauauwunene, nau hanau denauhauthethāthee deguthevevethahethee: hadnathee hanesedanuu vanasaunee gudanadede.

## 21

1 Nau haejaāne, nau haenauhauvā nethauyāsenanene haejenanauwu hevaudenenu haenathaunaa. 2 Nau haenauhauva jea jachau hadavenuhu henevesāne haethāgudene hanesāenee nevaāhenee vāejethāu. 3 Nau hanaānehede, hethauwuu nananenau nāedauwunathana henee naa hadavenuhunedede henevesā javaājenanauau vahee; 4 Hanau vahee nuu nanethauyādahethee dejenanuu dejenanauwunauthee Hejavaneathu: hau hadavenuhunedede hajenanauau vahee heenaededaunau hathāenethenauau. 5 Nau haehegaugaugauudenauau vadannauauwuu, haseneehenee nauguu hethāhenethe hauunauganau nau hausāyaunau, hanaānehede, 6 Nuu hayauhuhau hānauhauthaunenau, hese hadnauauchuu, hadnehauwunathauau hanesāde hauunauga hanathaugude hadvajanesee. 7 Nau hanaāenedaunauthee, Hechauhauthethāhe, hau hadduunaasau nuu? nau hayew hadnauhauwuu hadnesauau hāene nuu hayauhuhau hadneenauauchuu? hathauhaugaunee. 8 Nau hanaānehede, haunauyauhauwauwau henee nananena hadejenanedaunehana: hanau hadnewauthathee hadjauthee Naneseedaunaa, Hanejavaneauthusaunenenu, hadnethee; nau hayānauauchauau: jevathauguhaa. 9 Hau hāenedauwaudauwunā vauthadede nau jajayauthadede, jeva nathajauau, hanau nuu hayauhuhau hadnedauunauauchuu; hau hadneevadauauau hadguthauau. 10 Hanaāēdauwunaude, jajaesenanedanedede hadnevauthadee jajaesenanedaa, nau najanede hadnevaudauau najanede: 11 Nau hadnavathauthauwunauauau vedauauawuu, nau hasenaude, nau havathaugauwude, nau naunaunauchaudauhauthaude nau hadvasauau naunauhauwuu hadnauauchauau hehethree hejavaa. 12 Hau hadnejesejenauauchuu vahee nuu, hadnedanāna, nau hadnaunaunauchauthehāna, nau hadnevaudenee nananena hauāchaude, nau duguhunauauwuu, nau hadne-nauuchauhana hathaājethee nenauchuwuthee nau hauchuwunanenuau hanau Naneseede hee. 13 Nau hadnaasejenanauwunana hee haenathau. 14 Hāenauwuu heehena nananena hadahenauau, jevagaugauuthajauau nedauau daun hadnesenehena: 15 Hanau hadvenathana vade nau haeyaude, vahee hasānavādaunenau hadnehauwuneayādaunāva hegau hayethaagudaunādaunenau. 16 Nau nananena hadnavethevāthee nesauuu hanehānenau, nau hāthesaunenau, nau hādauānenau, nau hādaehahenau; nau jasae nanaena hadneenaana. 17 Nau hadneevahasānavāhena vahee

\* **20:41** “Dāvid” is spelt thus here and in two other places nearby, 20:42 and 20:44. The name is spelt “David” in its other ten appearances in the text. (See note for 13:16.) † **20:42** “Psalms” is capitalized here but not in 24:44, but both are almost certainly deliberate. As per the KJV, “Psalms” in 20:42 is the name of a book in the Bible, but in 24:44 the common noun “psalms” is meant.

henanedaa hanau naneseede hee. <sup>18</sup> Hau hegau hāthaanenau haudau-  
 guhuanenauau haudnehauwugaujauaudāhenaunau. <sup>19</sup> Hanāedevedauenau  
 hadnaunaunehaudde havadathuwunau. <sup>20</sup> Nau hāenauhaudauwunā  
 Dādaunedan hadnechauchuaunāna vanenanenauau, nanehāenauwuna  
 henee nauauhadede wauwu hadneaudaa, <sup>21</sup> Nanehadaugauhuthee  
 hesee hauanee hathāanedauthee Judaea; nau henee hathāanedauthee  
 nahethāe nanehanauhethē; nau jevajejedānauha henee hathāanedauthee  
 gauchuhenee vedauauwuu. <sup>22</sup> Hanau nuu hesee hadneauthedaudenee  
 henee vahee hayauhuhau hathāewauthaunauhuu hadnethauwunaasauau.  
<sup>23</sup> Hau naunauthaunee hadnethauauvāhethee hathāenesaunethee, nau  
 hathāeneauauthuthee hena hesee, hanau hena hadnavathasenaudenee  
 vedauauwuu, nau hasenaunaudaunāhenauau nuu henanedanede.  
<sup>24</sup> Nau hadneaunathāhethee gaugauthau, nau hadnejathechauhāthee  
 hadwauwaunenethee vahee jajaesenanedanede: nau Dādaunedan  
 hadnauguhethee Neauthu, haunaude Neauthu nauauchaudauhaugaanee.  
<sup>25</sup> Nau hadnauhauthaunee hesesee, nau vegusesee, nau hauthuuu; nau  
 nanadee hathāauauvaa hadnaunauādaugauhudaunee jajaesenanedanede,  
 hadnehauwaenauwu; hadaje nau hadnaunaudānaunee; <sup>26</sup> Henanenauau  
 hedahenau hadnadenāthajaunee, nau hanau naunauyauhauduu hena  
 hayauhuhau hadnauauchaunee dasee hathāauauvaa, hanau hathāenauthauau  
 hejavaa hadnauauwunauauau. <sup>27</sup> Nau hadnaāenauhauwauna Heau  
 henane hadnenauusade henaunauade nauguu naunauthaunee nau  
 hadnavathenauasāauau. <sup>28</sup> Nau hāene nuu hayauhuhau hāenauauchuu,  
 nauhadnaāenauānena; nau hadnejenāauguauna hee hadneejae-  
 nauthana hadnaāeaudaa. <sup>29</sup> Nau hanaāedadajenehethaude; Nauhauvaa  
 hauuyauchunauhaude, nau vahee hahaudenauau; <sup>30</sup> Hāeguugauāhenauthe,  
 hadnauhauwauna nau hadnaenauwuna nehayau henee veja dauhuaudaa.  
<sup>31</sup> Hadnaasauau nananena hāenauhaudauwunā nuu hayauhuhau  
 hadnethauwunaasauau, hāenauwuu henee henajanede Hejavaneauthau  
 haneaudanee. <sup>32</sup> Hethauwuu nāedauwunathana, nuu henaedede  
 hadnehauwuvadauau, haunaude vahee hadnethauvāe. <sup>33</sup> Hejavaa nau  
 vedauauwuu hadneyauhuu; hau Nadanadedau nau hadnehauwuthau-  
 uyauhuunau. <sup>34</sup> Nau haunauyauhaudauwauau nehayau, naseduhuu  
 daunāene hadahenau havaehayaundenau hee haudauhauganedaunenau,  
 nau havanadenenau, nau haunaunethaunenau nuu henaedede, nau  
 henee hesee hadgauduaunāna hau hadnehauwaenava. <sup>35</sup> Hanau waude  
 nauyaundenau hadnauauchauau vahee hathāetheaugude dasee hathāauauvaa.  
<sup>36</sup> Haunauyauhaudauwauau henaheee, nau hevevethahee dajauaunee,  
 henee nananena hadeheenauguana hadegauchuhauwuna vahee nuu  
 hayauhuhau henee hadnauauchuu, nau haddetheauguna hathaāhede  
 Heau henane. <sup>37</sup> Nau hesenee haechauhauthethā vadanauauwuu; nau  
 hāeveeyaunee haenauā, nau haeadāne hauanee henee neseeyāgu hauanee  
 Olives. <sup>38</sup> Nau vahee henanedanede haejevanauuchaudene naugusāje  
 daunauganenee hadaude vadannauauwuu, hee dauhujaathehāde.

## 22

<sup>1</sup> Wauhā hadneevasevenee janenesaunauchauanauhuu jauaujaunau  
 haeyānauauchau, Hadavechaude neseāgu. <sup>2</sup> Nau najanau vevethahevahe-  
 hau nau wauthaunauhāhehauau haegaugauanadauwunenau hadnesenaāde;  
 hau haedauwu henanedanede. <sup>3</sup> Hanaāejedāde Haujau Judas hejaveede  
 Iscariot, haenethanedau vadadauchunesenee. <sup>4</sup> Nau hanaāejathāaude, nau  
 haeanadetha najanau vevethahevahehau nau haunauyauhauthāhehau,

hadneseavedaundaunauwaude. <sup>5</sup> Nau haeneethajaunauau, nau dechachuwhadethee hadvenāde vāejethā. <sup>6</sup> Nau haesayānehetha, nau haeauauyauhaudauwu hadneeneavedaundaunauwaude henanedanede. <sup>7</sup> Hanaāenauauchauau heseē janenesaunauchauanauhuu jauaujaunau nanaa hadavechauthau hadnāede. <sup>8</sup> Nau hanaāautheawaude Pedaheau nau Jauneau, Najesaa hadesaanudeva hadavechauthadede, hadevethenauau, hathāhaugaanee. <sup>9</sup> Nau hanaāēdauwunauthee, Daudu hadauvathehāne hadnedauusaanuu? <sup>10</sup> Nau hanaāēdauwunaude, Naune, hāejedānā hedan, hena henane hadnuchaunāna, hadnewauunauau hauānau hadjaāsanenee naje; hadethauguhauva hauauwuu hadnedaujedāde. <sup>11</sup> Nau hadethauva henane hedauauwunede, Hechauhauthethāhe nejeethāne, daudu jādanauauwuu hadnedauvethenauau hadavechauthadede nauguu nāthauguhādaunauau? <sup>12</sup> Nau hadnauhauthethāna vanasaanee dachauauwuu hadneseawaudeanee: hadnesaanuhuu. <sup>13</sup> Nau hanaāeyehauthee, nau haevedenauau neethāedauwunaude: nau hanaāesaaudethee hadavechauthadede. <sup>14</sup> Nau hāenauauchaanee, hanaāejanaugude nauguu vadadauchuneseneē hevadauhanau. <sup>15</sup> Nau hanaāēdauwunaude, hethauwuvadavethenau nuu hadavechauthadede naugu nananena hajesejasauwauwuthānau: <sup>16</sup> Hanau nāedauwunathana, Nadnehauwauthevethe nuu, haunaude hadnauauchauau henajanede Hejavaneauthau. <sup>17</sup> Nau hanaāedanauau vāenau, nau hanaāevāde vaveenede, nau hanaāenehede, Hedanauwuu nuu, nau hadjaanauwauva nehayau: <sup>18</sup> Hanau nāedauwunathana, Naudnehauwuvanethede dadajevenenaje, hanaude henajanede Hejavaneauthau nauauchauyāgu. <sup>19</sup> Nau hanaāedanauau jauaujau, nau hanaāevade vaveenede, nau haejeane, nau haevēna, Nuū nanaa nadanayau havenadenenau: nuu hadneejenauneethedaunena, hathauhuk. <sup>20</sup> Naasauau jea vāenau hāesethunevethehedaanee, Nuū vāenau waunauyauau hesānaavede Navaevaa, hanedaunauwunana, hathauhuk. <sup>21</sup> Hau nauhauvaa, hejadena henee haneavedaundaunade nananenauau nanedauguvānauau vethehedaunaa. <sup>22</sup> Nau hethauwuu Heau henane hadjathāaude, neesedaunade: hau naunauthaanee henee henane haneavedaundaundenenee. <sup>23</sup> Nau hanaāenaunaudedaudadethee nehayau, hanaadee hadnesedaude nuu. <sup>24</sup> Nau hena jea haeneenayaundenauau, hanaadee hadjavaāvasāthaa. <sup>25</sup> Nau hanaāēdauwunaude, Nenauchuwuthee Neauthuu haevahadahethedauwu; nau henee nanethenuu naudahede nanadee hesenaedehehauau neseadagaanee. <sup>26</sup> Hau jevanaathāhee: hau henee havasāthawaunādaunenau, hadenahavaewauva; nau henee naja waude henee henechauthāhehau. <sup>27</sup> Hanaa vanasāthaa, henee vanethede, wauāthe henee henechauthāhe? gaujenane henee vanethede? hau hanedaundaunathana waude henee henechauthāhe. <sup>28</sup> Nananena daudajauaunenethaunena denaunaunauchauthehanau. <sup>29</sup> Nau janenanauwunathana najanede, waude Nāsaunau nejeesejenanauwunānau; <sup>30</sup> Hadevethēhena nau hadevaveyāna navethehedaunaa Nanajanedaunaa, nau hadetheaugudauwuna najatheaugudaunau hadnauchuwuhauna vadadauchuneseneē jajaesenanedanede Israel. <sup>31</sup> Nau Vahadāde hanaāenehede, Simon, Simon, nauhauwune, Haujau nevadaunethenāne, hadvachuuguthāne waude thauauhanewauchunau: <sup>32</sup> Hau nevevethasathane, henee hadethauwuthajaude hadejenadegaundenauau: nau hāejauaugauthethajaunaune hadedāewaunauau hahauwauauau. <sup>33</sup> Nau haenehetha, Vahadāhene, Nananenau hanesaanunau hadnēnenethaunathane, nesauna duguhunauauwuu, nau gaujauaudahedaunaa. <sup>34</sup> Nau haeāedauwuna, hāedauwunathane, Peda, neauthuneāhe hadnehauwunedu nuu

desenenee, hajesejenehenaune nasau hadnethedauwaune henee nananene daujaenaunene. <sup>35</sup> Nau hanaāēdāuwunaude, Deathavejenanathana hāehauwunewauunava nesevāejethāwau, nau newaugusajaānauchu, nau wauaunau, gauhājevathēhāva hayewhu? Hegau, hathauhaugaanee. <sup>36</sup> Hanaāēdāuwunaude, hau hewaunehaa henee nanethenauau nesevāejethāwau nanehaedanaau, nau jea henewaugusajaānauchu; nau henee janethenauau gaugauchu, nanehaeaudaunade heddu, nau jeaudaunau gaugauchu. <sup>37</sup> Hanau nāedauwunathana, henee nuu wauthaunauhuu hethauwunaathauthaunauhunau, Nau haewauhaunau wauwauchudauhuhau: hanau nethauthedauthanau hethauvaa. <sup>38</sup> Nau hathauhaugaanee, Vahadāhene, nauhaudau, heyewnau hanesāe gaugauthau. Nau haeāedauwuna, Naadauchāe. <sup>39</sup> Nau haejenaua, nau haejathāau, nesedaude, haua nee Olives; nau hethauguhādaunau jea haethauguhaa. <sup>40</sup> Nau hāanauusade, haeāedauwuna hevevethahee henee hadejejedāna vasehadede. <sup>41</sup> Nau haejāvesa hehejese nejechauthaunenee, nau haechagujanaugu, nau haevevetha, <sup>42</sup> Nāchau, hith Nananene vadausedaunenagu, jegudanauwune nuu vāenau hehethee Nananenau: hau nāhauwuvathēhaa, hau Nananene, hadnaasauau, hathauhuk. <sup>43</sup> Nau haenauhauva hautheaune hehethee hejavaa, haedadāevaa. <sup>44</sup> Nau haeneenajeneethajau haeneenavevetha: nau heguwauaude waude davathejaneauthēe vaewauau dejanese vedauauwu. <sup>45</sup> Nau hāegauhāde hehethee devevethahede, nau haejeedasa hethauguhādaunau, Haeveena haeseenaugauhunenau hee haudauwuthajaude, <sup>46</sup> Nau haeāedauwuna, Naudu haenaugauhuna? gauhāe nau vevethahee, hadejejedāna vasehadede. <sup>47</sup> Nau hajesanadede, haenauhauwu havathenedanede, nau henee Judas neseade, jasia vadadauchunesenee, haenedauva, nau haeayāedasa Hejavaneauthusaun hadnedanaude. <sup>48</sup> Hau Hejavaneauthusaun hathāhuk, Judas, gauhāavedaundauna Heau henane gauhadneenedanau? <sup>49</sup> Hāene henethauguvādaunau daunauhaudauwunethe hadnesehade, Vahadāhene, gauhadjedauauwaunauau hee gaugauchu? hathauhaugaanee. <sup>50</sup> Nau hanesāde haedauauva hewauwaunavene vasnane vevethahevahew, nau haegauadathāhe hejave. <sup>51</sup> Nau Hejavaneauthusaun haeauchuhananadetha, Hauwaa nanesedau nuu. Nau haevasane henaundaunene, nau haenayauha. <sup>52</sup> Hejavaneauthusaun hanaāenehethaude najavevethahevahēhau, nau haunauyauhauthāhēhau vadannauauwu, nau vachaugananenau, hejewaunedasādaunau, Gauhāejauva, waude hee havedehe, nauuu gaugauthau nau vachau? <sup>53</sup> Denethenaedevathana hayauwusenee vadannauauwu, nananena hāehauwudaneva: hau nuu nauauchaudauna, nau naunauthauau vaneeyauau. <sup>54</sup> Hanaāedanauthēe, nau haejathechauhanaau, nau haejedanaau Vasanane vevethahevahew hedauauwunene. Nau Peda haejesedauchu. <sup>55</sup> Nau hāesewaudeadaunathēe nahethāe hadauvasenejesauau, nau haeauājanaugunauau, Peda haejanaugudauna. <sup>56</sup> Hau jasae hesāhedāeyaune haenauhauvaa daujanaugudaunau hejava hesada, nau haenaunauchaudauhauvaa, nau hathāhuk, Naa henane jea nanethenaedewaude. <sup>57</sup> Nau haethedauwautha, Hesā, nahauwaenaunau, hathauhuk. <sup>58</sup> Nau naunade jachau haenauhauvaa, nau hathāhuk, Nananene jea hanehedāhene. Nau Peda hahagu, Henane, nananenau hegau. <sup>59</sup> Nau hee jasaye denauachauau waunee jachau haethauwunehene, hathāhuk, hethauwu naa jea nanethenaedewaude; hanau nananede Gananaean. <sup>60</sup> Nau Peda hahagu, Henane, Nāhauwaene daun nesenehene. Nau chauchaunu, daunausunadede, neauthuneāhe haenedu.

61 Nau Vahadāde haejaaagu, nau haenāuhauva Pedaheau. Nau Peda haethauchuthajaude hedanadedanene Vahadāhenith, neesenehethāde, Hajesejeneduhude neauthuneāhe, nananene hadnethedauwauchune nasauna. 62 Nau Peda haenaua, nau haeneenavewau. 63 Nau henanenauau henee daununauthēe Hejavaneauthusaun haevavavanauchuhanauau, nau haedaudauauvaa. 64 Nau hāesajeājethauthēe, haeanadeāhenauau, nau haenau-naudedanauau, Haeyāhe, hanaa henee haudauauvāde? nethāhuk, 65 Nau wauthanee haewauwauchuvaa nanāsanadethāde. 66 Nau chauchaunu hasenaugusājenee, vachaugananenauau henanedanede nau najanauau vevethahehehauau nau wauthaunauhāhehauau haeauāchadaunanauau, nau haejedananauau hadauhanadethee, 67 Gauhanane Chris? jeāedauwunāa, hathauhaugaunee. Nau haeāedauwuna, Hith Nananenau hāedauwunathanagu, nananena hanājethauwaudaunena: 68 Nau hith nananenau jea naudedanathanagu, nananena hanājauchuhananadesena, wauāthe hanājejenanena. 69 Hewaunehaa heee Heau henane hadtheaugude hejavese naunaudāhenith Hejavaneauthu. 70 Hanaāenehethee vahee, Gauhanane Heau Hejavaneauthu? Nau haeāedauwuna, Hasenehena Nananenau. 71 Nau hahagaunee, Hehauwauthevathehāanauau naudedauyaunauau? hanau nehayau nandedaunaunauau Nehayau hedenaa.

## 23

1 Nau haunauude henanedanede haegauhadene, nau haeyehau-daunanauau Pinade. 2 Nau hanaāevavasevāde, Vaneenaunauau naa gauchuhuchaudede jajaesenanedanede, nau nedauduwaude hadjevenauthēe hauāyaunau Caesar, daunahagu Chris Nenauchuwude, nethadede, hathauhaugaunee. 3 Nau Pinade haenaudedana, Gauhanane Dauhunauchuwuhunene Jews? hathauhuk, Nau haeauchuhanāedauwunaa, Hethauvāne. 4 Hanaāāedauwunaude Pinade najanau vevethahehehau nau henanedanede, Nāhauwuveedenaune wausaunee naa Henane. 5 Nau haenaunauchauthedauhadene, wauwauyauchudede henanedanede, hanechauhauthethāde hehethee vahee Jewsevedauauwuu, jejasesee hehethee Gananane nauuu nuu vedauauwuu, hathauhaugaunee. 6 Hāene Pinade nedauwauthaude Ganane, haenaudedauva wauau hagananenanene. 7 Nau chauchaunu hāesaenauau henee daunaadāde Herod hadaunajavanethe, haethavenane Herod, jea haenedau Dādaunedan hena hese. 8 Nau hāene Herod nauhauwaude Hejavaneauthusaun haevaseneethajau: heee devadaunauhauwaude dajauaunee hanau dauhuwauthanedauwauthaude; nau haevadaunauhaudauwu jasaa venauneguthau hadnesedaunith. 9 Haenaunaudedana hauwauhuu hanadedanau; hau haejauchuhananadethaa. 10 Nau najanau vevethahehehau nau wauthaunauhāhehau haetheaugunenau nau haenaunaunauchauthevaa. 11 Nau Herod nauuu vauānanenau haejenananauaugaugauyaune, nau haevavavanauchuhanauau, nau haeneenuhanauau neaudahenene hu, nau haevenanauau jea Pinade. 12 Nau hajesesenene Pinade nau Herod haenedaehāvadenauau nesauuu: hanau nedauwuu haeasānavadenauau nehayau. 13 Nau Pinade, hāesauānadethaude najanau vevethahehehau nau hauchuwunanenau nau henanedanede, 14 Haeāedauwuna, Nananena nauuchadaunena naa Henane, nanahagu henee gauchuhuchaudede henanedanede: nau, naune, nananenau, haunauchuwuhauau hathaāhena, nāhauwuveedenaune wausaunee naa henane heee henee hayauhuhau nanāsevasewauna: 15 Hegau, hehauwune Herod: hanau neathavejenanauwunathane; nau naune,



hehauwuneenauau hehauwugaudauwudau. <sup>16</sup> Hadnensesegauhaa, nau hadjenanauau. <sup>17</sup> (Hanau hadnaugauhusenaasedaude hadjenanaude hanesāhenethe vasevethededauneagu.) <sup>18</sup> Nau haunauude haevasānadenauau jasānee, Hausāguthaa naa, nau jejenanauwunāaa Barabbas, hahagaune: <sup>19</sup> (Nananede hanau jasaa nejaevauāde hedan, nau hanau nenaade, nethānade duguhunauauwuu.) <sup>20</sup> Pinade henaheee, haevadaujenana Hejavaneauthusaun, haeanadetha jea. <sup>21</sup> Hau haeneānaune, Saethechuhuu, Saethechuhuu, hahagaunee. <sup>22</sup> Nau haeāedauwuna nanaseauwaunee, Dusee, dusewauchudau? Nāhauwuvedenaune hadneegaujauauthehaude: Hadnaasedaunau hadnensesegauhaa, nau hadnaājejenanauau. <sup>23</sup> Nau haeneenavasānadenauau, haeneenavadausaethechuhunauau. Nau haeneānadenauau nau najanau vevethahehehauau haechauwauauwau-nauau. <sup>24</sup> Nau Pinade haechuwardā henee hadnaasaunee hasevathehāthee. <sup>25</sup> Nau haejenanauwuna nananede henee hanau nejaevauāde nau nenaade haethānau duguhunauauwuu; nananede heenedauwaudenenau; hau haevā Hejavaneauthusaun hathanauwauthee. <sup>26</sup> Nau hāejathechauhauthee, haedananaauau hanesāhenith Simoneau, hehethee Cyrenene, hananeedesade vedauauwuu, nau hananene haenehanauwunanauau naugauchu, henee hadnanewauunauwunith thauguu Hejavaneauthusaun. <sup>27</sup> Nau hena haethauguhaa havathenedanede, nau hesānau, haeau-dauwuthajauha nau haevewauhunauau heee. <sup>28</sup> Hau Hejavaneauthusaun haejaaāne haeāedauwuna, Dādaunedan hedaunauhau, jevahevewauhuu heee Nananenau, hau heevewauhuu nehayau, nau heee hadāeyaunevenau. <sup>29</sup> Hanau, naune, hese janādauuu, hadneenededaunee, Haunauwuthajauau jenesaunehahauau, nau henaudaunenau henee nejethauujanesāthee, nau hethanenau hehauwunethuaunenau. <sup>30</sup> Heee hadnaāejaseseneduu hauane, Gaudaunānauau; naa jauaudane, gaudayauhunauau. <sup>31</sup> Hanau hith heenesedauhaugaunee nuu hayauhuhau janadanegauaheyaugaune hauhadene, haudneedusedaune wautheyaugu? <sup>32</sup> Nau hena haenesenauau gauchuhunee jea, wauwauchudauhuhau, haenethaunaa hadnaugunaade. <sup>33</sup> Nau hāene hāedadu, Calvary hanaaseenee, hena haesaethechuhunauau, nau wauwauchudauhuhau, hanesāhenith hejavese, nau jachau nauwauthe. <sup>34</sup> Haenaāenehede Hejavaneauthusaun, Nāchau jaegudanaunwunene; hanau daujāenuu hasedauthee. Nau haejaanauwaunenau, hedāchaunene, nau haeheedaudausadaunenau. <sup>35</sup> Nau henanedanede haetheaugudaune dauhasauhauvade. Nau hauchuwunanenau jea nauguu haeauchaudanavaa, haseneheyaugaune, Nenayauhaude hauthauau; Nanehanenayauhadede hethauwuu Chrisdeyaugu, Neayāsanāde Hejavaneauthu. <sup>36</sup> Nau vanenanenau jea haenaunaugauthedaunaa, haedasaa, nau haevenaa naneujaudenee dadajevenenaje, <sup>37</sup> Nau hathāhuk, Hethauwunajawaunaudagaunee Jews, henayauhade nehayau. <sup>38</sup> Nau haewauthaunau jea haewauthaunauhune hejavaa hedanadedanene Greek, nau Latin, nau Hebrew, Naa Nanajawaunaude Jews. <sup>39</sup> Nau jachau wauwauchudahu chaunaunauaunith haewauwauchuvaa, Hethauwuu Chrisdenagu, henayauhade Nehayau nau nananee, hathāhuk. <sup>40</sup> Hau jachau haeauchuhananadene haedauduva, Gauhajeadaunau Hejavaneauthu, hanau nananene nanesadee hathauchuwuhane? hathauhuk, <sup>41</sup> Nau neehanauau; hanau hanesedanauwunauau nanāsedanauau: hau Naa hehauwuwauchudau. <sup>42</sup> Nau hanaāenehethaude Hejaneauthusaun,\* Vahadāhene, dauyewuwuthedaune hāanauusanaune Hanajanede. <sup>43</sup> Nau

\* **23:42** “Hejaneauthusaun” possibly should be “Hejavaneauthusaun”. (See note for 18:19.)

Hejavaneauthusaun hathāhuk. Hethauwuu hāedauwunathane, Nuu desenee hadnethenaedevene Paradise. <sup>44</sup> Nau hāethauthaunesade, nau hanaāeveeyauau nanadee vahee hathāauauvaa haunaude nanasuusee hāenauauchauau. <sup>45</sup> Nau hesese haeveenenauau, nau hauguthau Vadannauauwuu haethauwunauau nahethāe. <sup>46</sup> Nau Hejavaneauthusaun hāevasānadede, Nāchau, hajadenaa hadaunaunehau Navadathuwu, hahagu: nau hāesenehede nuu, haevadauwauthauwu. <sup>47</sup> Wauhā vanenenaja hāenauhaudauau hasedaudenenee, Haeauwauaundauna Hejavaneauthu, Hethauwuu naa chaunuvāde Henane, hahagu. <sup>48</sup> Nau vahee henanedanede henee hathāejeauānuusathee hadnauhauwauthee, haenauhaudauwu hanasedaudenenee, haenadesejāhedenuau, nau haejaajegauhudaune. <sup>49</sup> Nau vahee henedaehauhau, nau hesānu hethāethauguhādaunau hehethee Gananee, haetheaugunenau vavāaune, haenauhaudauwu nuu. <sup>50</sup> Nau, naune, henane Joseph haeese, najananadehe; nau haeethā, nau haechuvā: <sup>51</sup> (Naa haejechuwaudā hasenehedaunenee nau hasedaunethe;) haenaadāde Arimathaea, hedan Jews: nananede jea nehayau haejauwuwude henajandedaunene Hejavaneauthu. <sup>52</sup> Naa haeyehau Pinade, nau haenedauwaude hedanayaunene Hejavaneauthusaun. <sup>53</sup> Nau haejanana, nau haeauyauuna naunaujānaunee, nau haejenana nedauthānavathe gaujauaudahehehau hauunaugāe, haunauau henane haejethaujenanau. <sup>54</sup> Nau hena hesee haesaanudaune, nau vadanesee dayānauauchauau. <sup>55</sup> Nau hesānu jea, hejenauunethaunādaunau hehethee Gananee, haethauguhaa, nau haenauhaudauwu hadausaesenanethe, nau hedanayaunene hathaudanee. <sup>56</sup> Nau haejaenauthau, nau haesaanudenauau hathāeneevaudenee nau chauayaunau; nau haedauyānusenauau vadanesee hasauau nanavaavede.

## 24

<sup>1</sup> Wauhā nandedauwaudaa hesee hauchauvadede, hajesejevesesanith haejeedadauwu hadausaesenanith, haenauchaudenauau hathāeneevaudenee heesaanuthaunenau, nau jasae hauthauau nauguu. <sup>2</sup> Nau haenauhauvanauau hauunaugane haeausānene hehethee hadausaese. <sup>3</sup> Nau haejedānauau, nau haejevedenauau hedanayaunene Vahadāhenith Hejavaneauthusaun. <sup>4</sup> Nau hethauwuu daugaudauwuthajauthee heee, naune, hanesenethe henanenau haetheaugudaunā haenauasāaunenau hedāchaunene: <sup>5</sup> Nau daunāthajauthee, nau haenaunauagunauau vedauauwuu, haeāedauwunā, Naudu nananena haenaudehauna hanaededaunaude nethee gaujauaudahehehau? <sup>6</sup> Hehauwanedau hede, hau jaegauhāde: dauyewuwuu neethāedauwunāna denausunanedaude Gananee, <sup>7</sup> Neesenehede, Heau henane hadvenavathe hejadenene wauwauchudanenenau, nau hadsaethechauhude, nau nasese hadjaegauhāde. <sup>8</sup> Nau haedauyewuwunauau hedanadedanene, <sup>9</sup> Nau haenauwuu hehethee needausaesenanith, nau haeauthedaunanauau vahee nuu hayauhuhau jasānee, nau vahee hauthauau. <sup>10</sup> Haenane Mare Magdalene, nau Joanna, nau Mare henaune James, nau hauthauauau hesānauau henee henethaunādaunenau, neauthedaunauthee nuu hayauhuhau vadauhanau. <sup>11</sup> Nau hedanadedanenenau hathanadauwuyaugaune gaugauyaune, nau haejethauwaudaunaunauau. <sup>12</sup> Hanaāegauhāde Peda, nau haeyeseneegau hadausaesenanith, nau haewauguau, haenauhaude naunaujānaunee haeānaudanenu jessaa, nau haenaude, haegauguanade hasaunee. <sup>13</sup> Nau, naune, hanesenethe haeyehaunenau henee hajesesenee hajasee hauauwudan Emmaus haseagu, hehethee Dādaunedan wauau nesaudauchu

nau gauuu daugauha. <sup>14</sup> Nau haenadenauau wauhaunee vahee nuu hayauhuhau hasaunee. <sup>15</sup> Nau hethauwuu, henee, dauanadethee wauhaunee nau haenaunaudedadenauau, Hejavaneauthusau Nehayau haeeachauna, nau haenethauna. <sup>16</sup> Hau hesesānenau haedunenenau henee hadjaenaunauthee. <sup>17</sup> Nau haeēedauwuna, Hayewnau hadanadedauenau nuu henee nananena hānegudaudenenau, daujajāwauaunadena, nau daudaneāauna? <sup>18</sup> Nau jasaa hanaaseede Cleopas, haeachuhananadethaa, Gauhanane vavade dauhadavesane nuu Dādaunedan, nau gauhajaene hayauhuhau hasedaudenee hena nuu hese? <sup>19</sup> Nau haeēedauwuna, Hayewnau? Nau haeēedauwunaa, Heee Hejavaneauthusau Nazareth, nananede Haeyāhe naunaudāde hanasedaude nau hedanadede hathaāhenith Hejavaneauthu nau vahee henanedanede: <sup>20</sup> Nau najanauau vevethahevahehauau nau hadauchuwaneneve neesevānethe gaujauaudahede hadneachuwhude, nau nesaethechauhude. <sup>21</sup> Hau nejauwuwuhaunauau Nananede hadnenayaude Israel: nau nauguu vahee nuu, desenee nanasāe hese hāsesenedaudenee. <sup>22</sup> Haa, nau jasae hesānauau jea hadahenauau nenāvānauau, naugusāge neanedauthee hadausaesenanith; <sup>23</sup> Nau devevedethee hedanayaunene, nejenuusathee, neauthedathee, henee jea haenauhauvanauau hautheaunau neethāhaugaunee henee daujaenaedeyaugaune. <sup>24</sup> Nau hauthauauau hānethaunādaunene deyehaunauau hadausaesee, nau haeveedenauau vavade hesānauau neesenehenethe: hau haejenauhauvanauau. <sup>25</sup> Hanaāedauwunaude, Hau hāhauwaenava nau gaunauanu hadahenau hethauwaudanee vahee henee haeyāhehauau nethauthedathee: <sup>26</sup> Naasauau Chris hadnasenede nuu, nau hadjedāe hadnedauvasāthaa. <sup>27</sup> Nau jeejasesee Mosese nau vahee haeyāhehauau, neevavesāedauwunaude hee vahee hanathauthaunauhunee hayauhuhau hadnesenaedede Nehayau. <sup>28</sup> Nau haeeachauwu hajasee hauauwudan hasesathee: nau nehayau haenandedauneha hadjavesade. <sup>29</sup> Hau haeneenadaunanaunauau, hathauhaugaunee, Hanedaundaunāa: hayānaesade, nau hese hayāenauwusanauau. Nau haejedā hadnandedaundaunau. <sup>30</sup> Nau hethauwuu, daujanaugude haenethevetheheva, Haeedane jauaujau, nau haevaveene, nau haejeane, nau haevena. <sup>31</sup> Nau hesesānenau haegaunanenenau, nau hanaāaenaunauthee; nau haeyauhaudenauau. <sup>32</sup> Nau hadāhene gauhauchāe hethauvaa, hanathadagaunee jae, deanadethānauau jāthee, nau hāegaunanauwunānauau wauthaunauhanau? <sup>33</sup> Nau haegauhānauau chauchaunu nau haejaeyehaunauau Dādaunedan, nau haeveehanaunauau jasānee haeanaundaunāhenenau, nau hauthauau henee hanedaundaunādaunenau, <sup>34</sup> Vahadāde gauhāde hethauwuu, nau haenauhautheha Simon, hathahaugaunee.\* <sup>35</sup> Nau haeauthedanauau hayauhuhau hanasedaunith hadesathee, nau hasaenaunāde daujeanaunau jauaujau. <sup>36</sup> Nau daunausunanadethee, Hejavaneauthusau Nehayau haetheaugu nahethāe hadauthee, nau hathāhaugaunee, Danādauyauau vanenathana. <sup>37</sup> Hau haenānauaunauau nau haenāthajaunauau, nau hasethajauhaugaunee henee haenauhauvanauau vadathu. <sup>38</sup> Nau hathauhuk, Naudu nananena haenāthajauna, nau naudu haegaugauuthajauna gauhānauha hadahenau? <sup>39</sup> Nauhaudauwuu Najadenau nau Nauaudau, henee Nananenau nehayau: Vasanee, nau nauhauwuu; hanau vadathau hehauwudausanune nau hehauwudechaunave, hathauhauwuna. <sup>40</sup> Nau dauhanadede, haenauhautheha hejadenau nau heaudau. <sup>41</sup> Nau haejethauwuthajaunauau

\* **24:34** The last word of the verse is unclear and could be “hathahaugaunee” or “hathahaugaunee”. The former was chosen as being closer to what is used in other instances of direct speech.

heee haunauwuthajaude, nau haegaugauuthajaunauau, Haeāedauwuna, Gauhajeveveneve hede? <sup>42</sup> Nau haevenanauau hanesāhenith nauwu haEAUJAUNENE, nau gauhauaugunaugauye. <sup>43</sup> Nau haeedane, nau haevethe hathaājenethe. <sup>44</sup> Nau haeāedauwuna, NuU nanāe hanadedaunau hāauthedaunathadenenau, denausunethenaedevathana, henee vahee hayauhuhau hadnethauwunauauchuu, hanauthaunauhuu henanavaavede Mosese, nau haeyāhehauau, nau psalms heee Nananenau. <sup>45</sup> Hanaāegaunanauwunaude hadnaenauwunethe, henee hadnaenauwunethe wauthaunauhanau, <sup>46</sup> Nau haeāedauwuna, Hathauthaunauhuu, nau naasauau Chris hadnasenede, nau hadjaegauhāde hehethee gaujauaudahede nasese: <sup>47</sup> Nau henee haugauthegaugauuthajaude nau hadjaegudanee wauchudaudenau hadnautheduhunee heee Heneseede nanadee jajaesenanedanede, hehethee Dādaunedan. <sup>48</sup> Nau nananena haenauwuna nuu hayauhuhau. <sup>49</sup> Nau, naune, Nananenau vanenathana sayānee Nāsaunau hau theauguu hedan Dādaunedan, haunaude nananena hāchawunagu nauuu naudahede hehethee hejavaa. <sup>50</sup> Nau haejasesenedauwauna hajechaudanee Bethany, nau haegauha, nau haeevethasa. <sup>51</sup> Nau hethauwuu, daunausuvevethauchaude, Haenautha, nau haeejchauhau jethee hejavaa. <sup>52</sup> Nau haeevethedaunanauau, nau haejaeyehaunauau Dādaunedan nauuu vaseneethajaude: <sup>53</sup> Nau dajauaunee haenedaunauau jedauwuu Vadannauauwuu, hauwaunede nau haeevethedaunanauau Hejavaneauthu. Hethauvaa.